

الإنسان اثنتا عشرة امرأة في زنزانة

نوال السعداوي



الإنسان

اثنتا عشرة امرأة في زنزانة

تأليف

نوال السعداوي



الناشر مؤسسة هنداوي سي أي سي

المشهرة برقم ١٠٥٨٥٩٧٠ بتاريخ ٢٦ / ١ / ٢٠١٧

٣ هاي ستريت، وندسور، SL4 1LD، المملكة المتحدة

تليفون: ١٧٥٣ ٨٣٢٥٢٢ (٠) ٤٤ +

البريد الإلكتروني: hindawi@hindawi.org

الموقع الإلكتروني: http://www.hindawi.org

إنَّ مؤسسة هنداوي سي أي سي غير مسؤولة عن آراء المؤلف وأفكاره،
وإنما يعبر الكتاب عن آراء مؤلفه.

تصميم الغلاف: ليل يسري.

الترقيم الدولي: ٩٧٨ ١ ٥٢٧٣ ١٦٤٢ ٣

جميع الحقوق محفوظة لمؤسسة هنداوي سي أي سي.

يُمنع نسخ أو استعمال أي جزء من هذا الكتاب بأية وسيلة تصويرية أو
إلكترونية أو ميكانيكية، ويشمل ذلك التصوير الفوتوغرافي والتسجيل على
أشرطة أو أقراص مضغوطة أو استخدام أية وسيلة نشر أخرى، بما في ذلك
حفظ المعلومات واسترجاعها، دون إذن خطي من الناشر.

المحتويات

٧

١٣

١٥

٧٥

ثمن الكتابة

إهداء

الفصل الأول

الفصل الثاني

ثمن الكتابة

مقدمة قصيرة

لا أجد كتابة المُقدِّمات، يمكن أن أكتب قصةً من ألف صفحة، ولا أستطيع كتابة مقدمةٍ من نصف صفحة، أما رفيقة عمري فهي شخصيةٌ عصيَّةٌ على الفهم، تكتب في النوم كما تكتبُ وهي صاحية، لا تهتم بدورة الأرض حول نفسها، أو دورتها حول الشمس. تضحك وتقول: نحن أحرار، ندور كما نشاء؛ حول أنفسنا، أو حول غيرنا، أو لا ندور. لكن عقلي يدور، رغم مشيئتي، في النوم كما في اليقظة.

أصحو من النوم كل صباح على رنين الجرس، صوتها يأتيني من حيث تكون، في أي مكانٍ فوق كوكب الأرض، هي تعشق السفر منذ كانت طفلة، لا تعود إلى الوطن حتى ترحل، مهما ابتعدت وطال الغياب، أراها أمام باب بيتي، بحقيبتها العتيقة بلون النبيذ الأحمر، حرقتها الشمس وأغرقتها الأمطار في الجنوب والشمال، أصبحت أقل حُمره مما كانت، وإن ظلت حمراء اللون، متينة العجلات قوية العضلات، أقل قوةً بمرور الزمن، تجرُّها من خلفها وهي تجتاز المطارات والمحطَّات، تنزلق وراءها بخفَّةٍ فوق الشوارع المرصوفة الناعمة، وتغوص بثقلها في الأزقة حيث الحُفر والمطبات، مليئةً بالكتب وملابسها وأوراقها، مقبضها متين لا ينخلع، يحمل اسمها، داخل قطعةٍ من البلاستيك الأبيض بحجم كفِّ اليد.

اسمها الثلاثي كان مُسجَّلًا في أقسام وزارة الداخلية والشئون الاجتماعية ومصحة السجون وإدارات الرقابة على النشر والكتابة والمُصنَّفات الفنية.

يحملق ضابط الشرطة بمطار القاهرة في اسمها الثلاثي، يتأمل صورتها في جواز سفرها، يبتسم في وجهها: حمد الله ع السلامة يا أستاذة. يدق بالمطرقة على جواز سفرها فتدخل. وإن وصلت القائمة السوداء إليه قبل عودتها، يعتذر لها بِرِقَّة ورثها عن أمه، يناولها كرسياً لتستريح وكوب ماء: آسف يا أستاذة، عندي أوامر لازم أنفذها. وإن كان عضواً بحزب الجهاد أو داعش أو حزب الحكومة، يُكثَّر عن أنيابه مبرطماً بصوتٍ غليظ، ويحجزها مع حقيبتها في غرفة الحجر الصحي؛ حيث تلتقي بأنواعٍ مختلفة من البشر، بعضهم مرضى بالجذام وأنفلونزا الخنازير، وبعضهم مصاب بالجنون أو الكفر، منهم الكوافير سوسو، كان شهيراً في الحي الراقي بجاردن سيتي، اكتسب ثقافة نادرة من الحلاقة للنساء والرجال، أصابعه ماهرة تُدرك أفكاراً مدهشة في الرؤوس التي تغوص فيها، يأتي سكان الحي الراقي إلى محله الأنيق بشارع التتهادات، نساء ورجال من المثقفين أو الطبقة العليا، يؤمنون أن الإنسان تطوَّر عبر ملايين السنين من فصيلة الثدييات على رأسها الشمبانزي الأم الكبرى، وأن الأرض كروية تدور حول الشمس وليس العكس، وأن الكون نشأ بالصدفة البحتة حين حدث الانفجار الكبير وانتشرت في الفضاء ذرات، تتناثرت وتجمَّع بعضها لتكوين أول مادة أو أول كتلة مادية في الوجود.

وكان من زبائن الكوافير سوسو، أيضاً، البوابون والطباخون في قصور الباشوات القدامى والجدد في جاردن سيتي، منهم الحاج منصور الشهير باسم طبّاخ الباشا؛ رجل سمين مملوء بالسمن البلدي والطعام الفاخر الذي يبتلعه سراً.

وبينما هو يترك رأسه بين يدي الكوافير سوسو، يحكي الحكايات القديمة عن الممالك والأتراك، كيف عاشوا في الأناضول، ولا بد أن يذكّر الأسلاف من أجداده وعلى رأسهم جده الكبير، الذي حكى له وهو صغير أن الله خلق للثور قرنين؛ لأنه يحمل الأرض فوق قرن، وإن تعب من ثقلها حرك رأسه ونقلها إلى قرنه الثاني.

ويضحك الكوافير سوسو: مش معقول يا حاج منصور.

– لا، معقول يا سوسو، أمال الزلازل والبراكين والبرق والرعد بييجوا منين؟

ثمن الكتابة

- منين يا حاج منصور؟
- لما الثور يحرك الأرض على راسه من قرن لقرن يحدث البرق والرعد، والزلازل تهز الأرض.
- يضحك الكوافير سوسو: مش معقول يا حاج منصور.
- لا، معقول يا سوسو.
- الكلام ده كان زمان قبل جاليليو.
- جاليليو خواجه يهودي نصراني ما يعرفش ربنا.
- لازم تعرف حاجة عن جاليليو يا حاج، اسمعني.
- سامعك يا خويا.
- جاليليو أمه ولدته في إيطاليا بعد العدرا مريم ما ولدت المسيح بألف وخمسميت سنة أو أكثر، وكانت إيطاليا وأوروبا كلها محكومة بالكنيسة وعاشية في الجهل والظلام، درس جاليليو الطب والهندسة والفلك، واكتشف أخطاء العلماء الي قبله في اليونان، منهم أرسطو.
- أرسطو كان مؤمن بربنا يا سوسو؟
- أرسطو كان مؤمن بالكنيسة يا حاج منصور وبينشر أفكارها في كتبه، واعتبرته الكنيسة الفيلسوف الأعظم وأغدقت عليه الأموال والمناصب، لكن جاليليو عمل منظار جديد واكتشف خطأ أرسطو، وإن الأرض بتدور حول نفسها وحول الشمس، غضبت منه الكنيسة واتهمته بالكفر والإلحاد والخيانة؛ لأنه بيعارض الكتاب المقدس وتعاليم الكنيسة ونظرية أرسطو عن إن الأرض ثابتة لا تتزعزع ولا تتحرك أبد الدهر، قدموا جاليليو للمحاكمة وأدانوه، ومات فقير مسكين معزول في بيته.
- مين قال لك الكلام ده؟
- الباشا الي باحلق له شنبه ودقنه.
- الباشا بنفسه يا سوسو؟
- أيوة يا حاج منصور.
- لازم كلامه صح مية المية، لكن أنا مش حاسس إن الأرض بتدور يا سوسو!
- لأنها بتدور بسرعة كبيرة يا حاج، وانت جزء منها وبتدور معاها.

- مش معقول يا سوسو.
- مثلاً وانت راكب جوة القطر يا حاج، لا يمكن تحس إنه بيجري بسرعة.
- لكن القطر غير الأرض يا سوسو، ولا إيه؟
- إيه يا حاج!
وينفجر الكوافير والحاج منصور في الضحك.
تخرج هي، رفيقة العمر، تجرُّ حقيبتها الحمراء ذات العجلات، من غرفة الحجر الصحي بالمطار بعد عدة ساعات، أو عدة أيام حسب مزاج الحكومة والمخابرات، ثوبها مكرمش وشعرها منكوش، نامت على الكرسي وإلى جوارها الحقيبة، تلمسها بيدها إن أفاقت في الظلمة فجأة، تخشى أن يسرقها أحد وهي غارقة في النوم، أو غائبة عن الوعي من شدة التعب، وفي أحد الصباحات، دون سابق إنذار، يأتي الضابط مُبتسماً، ويقول: مبروك يا أستاذة، صدر العفو الرئاسي عن بعض المعتقلين والمعتقلات بمناسبة العيد.
- أي عيد؟
الأضحى الكبير، أو العبور العظيم، أو شم النسيم في بداية الربيع، يصحو الناس في الصباح الباكر ليُشموا البصل والرنجة والفسیخ، يتمشون على شاطئ النيل، الأغنياء منهم يشمون النسيم في المنتجعات الجديدة على شاطئ البحر الأبيض بالساحل الشمالي، أو في الغردقة وسواحل البحر الأحمر.
لكن يظل الفسیخ اللذيذ من نبروه، مع أصناف الطعام الفاخر ومعه البصل الأخضر والمليان. والرنجة من ضرورات العيد، لإعادة الذاكرة الطفولية والخصوصية الثقافية وتاريخ الأجداد.
كنت أحب الفسیخ وهي لا تُطيق رائحته، لا تزورني أبداً في المواسم، لا تحتفل بالأعياد، وعيد ميلادها لا تذكره، إن نكَّرتها به تمطُّ شفتها السفلى وتنهك في الكتابة.
- كم عمرك؟
- مش فاكرة.
- مش معقولة انتي.
- انتي الي مش معقولة.
- ازاي؟

ثمن الكتابة

- إيه يهكم من عمري؟
- عاوزة أعرف انتي عشتي كام سنة.
- ليه؟
- مش عارفة.

(انتهت المقدمة.)^١

نوال السعداوي
القاهرة
٢٢ مارس ٢٠١٧

^١ تتصدر هذه المقدمة كافة أعمال الدكتورة نوال السعداوي.

إهداء

إلى كل من عَرَف القهر في البيت أو في السجن.

نوال السعداوي

القاهرة ١٩٨٢

الفصل الأول

(المسرح مُظلم تماماً، صمتٌ كامل، المسرح خالٍ).

(يتدلّى من سقف المسرح صورة رجل كبيرة داخل إطار سميك مُدَّهَب، حول الصورة لمبات نور صغيرة تُضيء وجه الرجل في الصورة، له ملامح صارمة ونظرة حادّة قاسية لكن شفثاه مُبتسّمتان في ابتسامةٍ عريضة ناعمة.)

(ضوء خفيف يزحف كضوء الفجر، صوت الكروان، سكون.)

(صباح المتسوّلة تمشي وحدها تعرّج، ترتدي جلباباً مُمزّقاً، شعرها منكوش، على كلّ خدٍّ من خديها لطة سوداء (طين أو زفت)، تجلس على الأرض وتنبّش في كوم قمامة وهي تُغني بصوتٍ حزين، لا أحد ولا شيء على المسرح سواها.)

صباح المتسوّلة (تُغني): آدي الزمن اللي لوع اللي كان على كيفة، وبلبل الصبر في الفنجان وسقاه على كيفة، وآدي بنت الحلال في الوحل مرمية وابن الهيفة بيتحكم على كيفة، الصبر كُله حِكَم واللي شبك أهو بان، من برّه مزوق ومن جوّه مليون دخان، واصبر يا عين ده كل شيء بأوان.

(تنهض وتمشي تعرّج وهي مَحْنِيّة، تُردّد بصوتٍ حزين.)

صباح المتسوّلة:

بنت الحلال في الوحل مرمية،
وابن الهيفة بيتحكم على كيفه.

(فجأة يظهر عسكري شرطة. يُمسكها من قفاها بقسوة.)

الشرطي: تعالي هنا يا شحاتة يا بنت الشحاتة، مليون مرة قلنا لك يا بت الشحاتة هنا ممنوعة بالقانون، أيوه بالقانون، كل حاجة بالقانون، كل حاجة هنا بالقانون يا بت، خدي! خدي!

(يضربها بالعصا.)

الشرطي: وابن الهيفة ده مين يا بت الي بتقولي عليه؟
ايه؟ مين يا بت؟ ايه؟ خدي! خدي!

(يضربها مرّة أخرى.)

صباح (تتوجّع وتقول): هي بتغني لبنتها، مالهم بيها، وابن الهيفة أبوها مالهم بيها، هي ماشية في حالها، ما يسيبوها في حالها.

الشرطي: بنتها مين وأبوها مين، قدامي، قدامي.

صباح: حياخدوها تاني، كل ما يشوفوها ياخدوها، يودوها ويجيبوها، ويجيبوها ويودوها، مالهمش شغلة غيرها.

(الشرطي يشدُّ صباح. يظهر عددٌ من رجال الشرطة، يحوطونها ويضعونها في سيارة بوليس.)

(يُسمع صوت الأحذية الثقيلة السريعة على الأرض، وصوت بوق سيارة البوليس.)

(ظلام، صمت.)

(يُسمع صوت سلاسل حديدية، صوت وقع أقدامٍ على الأرض، صوت مفتاح حديديّ يدور ثلاث مراتٍ في باب حديدي.)

(صرير باب حديدي يُفْتَحُ وَيَنْغَلِقُ، يَتَكَرَّرُ الصوتُ عدَّةَ مرَّاتٍ في سكونٍ كاملٍ).
(صمت، ظلام).

صوت صباح المُتَسَوِّلة: مالهُمشُ شُغلةٌ غيرها، بيجيبوها ويودُّوها.

(يزحف ضوء الفجر الخفيف، يكشف عن صباح المُتَسَوِّلة جالسةً في فناء السجن الخارجيِّ بجوار بابٍ حديديٍّ ضخمٍ له قُضبان. أعلى الباب على الجدار رقعةٌ نحاسيةٌ صغيرة كُتِبَ عليها: عنبر المُتَسَوِّلات.)

(يقود الباب إلى حوشٍ صغيرٍ داخليٍّ، ثم إلى بابٍ حديديٍّ آخر ضخمٍ يقود إلى عنبر المتسولات. تمدُّ يدها من خلال القُضبان الحديد لتشدَّ عود جرجير من الأعواد القليلة المزروعة في الحوش الداخلي الصغير، لكن يدها لا تصل إلى عود الجرجير. العنبر له جدرانٌ عالية جداً، والحوش أيضاً له جدرانٌ عالية جداً تعلوها الأسلاك الشائكة.)

(صوت الكروان.)

(ترفع وجهها إلى السماء كأنما تبحث عن الكروان.)

صباح المُتَسَوِّلة (تغني وهي تنظر إلى السماء): آدي الزمن الي لوع الي كان على كيفه، وبلبل الصبر في الفنجان وسقاه على كيفه، وآدي بنات الحلال في السجن مرمية وابن الهيفة بيتحكّم على كيفه، الصبر كلُّه حكّم واللي شبك أهو بان، من بره مزوق ومن جوّه مليون دُخان، واصبر يا عين ده كل شيء بأوان.

(رجل زبال يلمُّ من فناء السجن الخارجي في صفيحة كبيرة، يترك بعض الزبالة قُربَ الباب إهمالاً وكسلاً.)

الزبال: امشي يا بت من هنا.

لو الشاويشة شافتك هنا نهارك مش فايت.

صباح المُتسوِّلة: هي تمشي تروح فين؟ مالهاش حتّة.
الزبّال: مالكيش حتّة إزاي يا بت، السجن واسع أهه وكلّه زنازين وعنابر.
يا بت الحوش واسع قدامك، واقفة في الحتّة دي ليه؟
صباح المُتسوِّلة: هي دي حتّتها.
الزبال: ده كان زمان يا بت، دلوقتِ بقّه عنبر السياسيات.
صباح المُتسوِّلة: هي دي حتّتها، خدوها منها، وهي دي جرجيرتها خدوها رُخرة.
كل حاجة ياخدوها منها. مالهمش شغلة غيرها، ياخدوها، ويجيبوها ويجيبوها
ويودوها، مالهمش شغلة غيرها!

(يخبِطها الزبّال بالمقشّة في يده فتنهض وتمشي وتعرّج في فناء السجن ثم تختفي
وهي تغني):

بنت الحلال في السّجن مرميّة،
وابن الهيفة بيتحكم على كيفه.

(يزحف ضوء الفجر تدريجيّاً، ويكشف عن العنبر، بابهِ الحديدي الضخم ذي
القُضبان المُغلقة، والحوش الداخلي الصغير أمامه بابهِ الحديدي الضخم ذي
القُضبان.)

(باب العنبر في مُواجهة باب الحوش تماماً بحيث يظهر فناء السجن الخارجي
لمن يكون داخل العنبر.)

(حبل غسيل منشور عليه بعض الملابس القليلة، يقسّم العنبر إلى قسمين: في
القسم الأيمن مجموعة من المسجونات. في القسم الأيسر المجموعة الأخرى من
المسجونات. في نهاية العنبر باب صغير يقود إلى دورة المياه.)

(على أرض العنبر بعض الحقائق، وعلب كرتون، وواپور، وقمامة في الرُّكن على
الأرض.)

(يشغل القسم الأيمن من العنبر النساء والفتيات المُحبّبات والمُنقّبات. بجوار
الأسيرة أو المراتب على الأرض فُرشت بطانيّة قديمة تُستخدَم كسجّادة للصلاة.)

الفصل الأول

(تظهر نفيسة الفيشاوي راکعةً تُصلي وهي مُحجَّبة، وجهها ناحية الجدار.)

(من خلفها ركعت رشيدة ونفيسة واعتدال، الثلاث مُنقبات.)

(هادية تقرأ في مُصحف وهي جالسة على الأرض، وقد خلعت النقاب وظهر شعرها الطويل.)

(سالمة واقفة عند الباب، تُمسك القضبان الحديدية بيدها وتنظر ناحية الحوش والفناء الخارجي، تصعد فوق القُضبان بقدميها، شعرها طويل تمشطه، يبدو عليها القلق والضيق والترقُّب.)

(في القسم الأيسر تظهر بسيمة شرف الدين، وهي لا تزال راقدةً على المَرْتبة أو السرير.)

(وعزّة لا تزال نائمة. مديحة ونجاة بجوار الوابور تصنعان الشاي.)

(ليبية جالسة وحدها تُمسك رأسها بيدها، يبدو عليها الضيق.)

(تظهر الشاويشة فهيمة في الفناء الخارجي تحمِل في يدها مفتاحين كبيرين، وتهوّل مُسرعةً في اضطراب.)

(سالمة تراها من خلال قُضبان باب الحوش وباب العنبر.)

سالمة: الشاويشة جايّة يا جماعة!

(تجري سالمة لتجلس على مرتبتها أو سريرها.)

(سميرة تُنهي الصلاة وتنهض، وتفعل مثلها رشيدة ونفيسة واعتدال.)

(ليبية تفكُّ يديها من حول رأسها. مديحة ونجاة تُخبئان الوابور داخل علبة كرتون، بسيمة تجلس وتُشعل سيجارة. عزّة تصحو من النوم، تفتح صندوق كرتون صغيراً، وتبدأ في لفّ شعرها «بالرولو» تنظر في المرآة وهي تلفّ شعرها.)

(الشاويشة تُكلم نفسها قبل أن تدخل إلى الحوش، وقد رأَت بعض الزبالة عند الباب.)

الشاويشة فهيمة: يا مصيبتى! إيه الوسّاحة دي كلها، هو عنبر الدّعارة بيرمي زبالته هنا ولا إيه؟

(تفتح باب الحوش الحديدي الضخم ذا القضبان. المفتاح ضخم جدًّا وثقيلٌ في يدها. يُسمَع صوت المفتاح يدور في الباب الضخم ثلاث دَوّرات، تدفع الباب الحديدي بيدها. الباب ثقيلٌ جدًّا وضخْمٌ. له صرير غليظ ينفَتِح عن شقٍّ صغيرٍ تدخلُ منه إلى الحوش، تُغلق الباب وراءها.)

الشاويشة فهيمة: والحوش كمان عاوز كَنس ورش، والجرجيرة خلاص نَشِفَت وقرّبت تموت.

(تفتح باب العنبر الحديدي الضخم.)

(يُسمَع صوت المفتاح يدور في الباب ثلاث دَوّرات.)

(تدفع باب العنبر الحديدي الضخم بيدها. يظهر أن الباب ثقيلٌ جدًّا، في نفس حجم باب الحوش ويُقابله تمامًا، له صرير غليظٌ شديده بالباب الآخر تمامًا.)

(تدفعه قليلًا، ينفَتِح الباب عن شقٍّ صغيرٍ تدخلُ منه إلى العنبر بسرعةٍ واضطراب.)

الشاويشة فهيمة: المدير الكبير اللي فوق المدير واللي فوق المأمور جايز يبجي النهارده، وجايز يكون فيه تفتيش كمان، ماحدش عارف، بس أول ما اعرف هاجي أقولكم. وضابط المباحث هنا من الصبح وقاعد مع المأمور في المكتب.

(الشاويشة تُفتش بعينها بسرعةٍ الجُدران والأركان والأشياء على الأرض؛ علب كرتون وحقائب ومراتب.)

الشاويشة: المُهم خُلُوا اليوم يُفوت على خير، مش عاوزة حدّ يلاقي عندكم حاجة من المنوعات. الناس الكبار دول مافيش في قلوبهم رحمة لا عليّ ولا عليكم، وأنتم لسه في فترة التكدير، وأنا صاحبة عيال، مش عاوزة مشاكل، مش كده ولاّ إيه يا ستّ بسيمة؟
بسيمة: طبعاّ طبعاّ يا ستّ فهيمة، إن شاء الله مافيش مشاكل.
عزّة: وفترة التكدير دي حتخلص إمتة؟

(الشاويشة ترى المرآة في يد عزّة.)

الشاويشة: خبّي المِراية يا ستّ عزّة، إنتم عارفين المِراية ممنوعة، والوابور، والسكينة، خبّوا الحاجات دي كلها.

سالمة (في سذاجة): وهي المِراية ممنوعة ليه يا شاويشة؟

الشاويشة: فيه واحدة انتحرت السنة اللي فاتت بِحِتة مِراية صغّيرة.

سالمة (في سذاجة): وانتحرت ليه؟

رشيدة (تلكزها في كنفها): يعني مش عارفة الناس بتنتحر ليه في السجون؟ اسكّني يا بتّ بلاش هبل!

(الشاويشة لا تزال تُفتّش العنبر بعينها وهي تتمشى فيه.)

الشاويشة: وأنتم عارفين كل المنوعات، لا فلوس، ولا جورنال ولا راديو ولا ورقة ولا قلم. خالوا بالكم، الورقة والقلم في عنبر السياسة أخطر من الطبنجة. لو لُقوا عندكم طبنجة أهون عندي من الورقة والقلم.

سالمة: الحمد لله أنا لا عندي لا ورقة ولا قلم ولا باعزف أكتب ولا اقرا.

(الشاويشة تفتح باب دورة المياه وتدخل لتفتّش الدورة.)

بسيمة (في اضطراب): اللي معاها حاجة تخبيها بسرعة مش عاوزين مشاكل!
لبيبة (في غضب): كل يوم تفتيش تفتيش! مرة المأمور، مرة المدير، مرة الخفير، دي حاجة تقرف، هم مالهْمش شغلة غيرنا؟!

(الشاويشة تخرج من دورة المياه.)

الشاويشة: الدورة عاوزة تنظيف، والعنبر عاوز يتمسح، والحوش كمان لازم يتكنس وينرش. مش عاوزة حد يقول علينا حاجة. بقالي في السجن ده عشرين سنة وسُمعتي عند المأمور والمدير زيّ الجنيه الذهب، قبل ما ييجوا عاوزاكم كده ولاّ إيه يا سالمة؟

سالمة: واشمعني يعني يا سالمة؟ هو مافيش غير سالمة في العنبر؟

ما تقوليش ليه باعتدال ولاّ يا هادية؟

هادية (في غضب): أنت مالكيش شُغلة طول النهار.

سالمة (في غضب): ويعني انت بتعملي إيه؟ ما انت قاعدة طول النهار برضه.

هادية: قاعدة باقرا قرآن.

سالمة (في غضب): دي قراية القرآن دي شُغلة؟

سميرة (تنتفض واقفة في غضب): إيه؟ بتقولي إيه؟ استغفري ربنا بسرعة! قراية

القرآن أعظم شُغلة، قراية كلام ربنا أعظم عمل في الدنيا!

الشاويشة: ولما كلكم تقعدوا تقروا القرآن طول النهار، مين اللي يمسح العنبر؟

سميرة: فيه في العنبر ناس ما بتقراش قرآن، ولا بتصلّي ولا لها شُغلة ولا مشغلة،

واحدة فيهم تمسح العنبر.

(بسيمة تُشعل سيجارة.)

بسيمة (في سخرية): والله يا ستّ فهيمة أنا شخصياً مقدرش أمسح البلاط، أولاً

بحكم السن، ثانياً عمري في حياتي ما مسحت بلاط بيتنا، عشان أمسح بلاط السجن.

عزة: وهو معقول واحدة فينا تمسح الأرض، ده اللي ناقص يا ست فهيمة.

لبيبة (في تكبرٍ وغضب): أنا عندي ثلاث خدامين في البيت يا ست فهيمة!

الشاويشة: هو أنا قلت حاجة يا ستات؟ أنا عارفة إنكم كلكم ناس مُتعلّمين مُحترمين

وولاد ناس.

سالمة: ويعني أنا مش بنت ناس؟

الشاويشة (في غضب): أنت لسه صغيرة يا بت يا سالمة، عاوزة تعملي نفسك زي

واحدة منهم؟

سميرة (في غضب): طبعًا هي زي أي واحدة فيهم، مافيش في العنبر ده كبيرة وصغيرة، ولا غنيّة ولا فقيرة، ولا واحدة عندها ثلاث خدامين وواحدة معندهاش! سالمة زي أي واحدة فيهم، ويمكن أحسن. على الأقل هي بتصلّي وتغطيّ شعرها وتخاف من ربنا!

لبيبة (في غضب): أنا ما أسمحلكيش إنك تتكلمي علينا بالشكل ده!
الشاويشة: يا جماعة هُدُوا أعصابكم، المسألة بسيطة، أنا حاروح أجيب لكم واحدة من المسجونات تمسح العنبر وتكنس الحوش وتغسل لكم هدمكم كمان.

(تخرج الشاويشة من العنبر. تجتاز الحوش الصغير ثم تخرج إلى الفناء الخارجي، تُغلق باب الحوش الحديدي بالمفتاح.)

سميرة (تُقلد لبيبة في تكبرها ولهجتها): أنا عندي ثلاث خدامين في البيت يا ستّ فهيمة! يا سلام على الناس اللي بيدافعوا عن الطبقات الفقيرة من الشعب!
لبيبة (في غضب): يا سلام على الناس اللي ما بيعملوش حاجة في الدنيا إلا الصلاة وقراية القرآن.

سميرة (في غضب): الصلاة والقرآن والتقرّب إلى الله هي كل حاجة في الدنيا، الدنيا كلها زائلة وفانية ولن يبقى إلا وجه ربك الكريم. المفروض أن يكدح الإنسان لله بالصلاة وقراءة القرآن.

قال الله تعالى: ﴿يَا أَيُّهَا الْإِنْسَانُ إِنَّكَ كَارِحٌ إِلَىٰ رَبِّكَ كَدْحًا فَمُلَاقِيهِ﴾ صدق الله العظيم.
لبيبة: ومين بقّه اللي يشتغل ويصرف عليكى؟ ربنا؟!
رشيدة: استغفر الله العظيم، الرزق من عند الله.
نفيسة: نعم، الرزق ليس في حاجة إلى سعيّ لأنه من عند الله، والعنبر ليس في حاجة إلى مسح أيضًا؛ لأنّ النظافة من الإيمان والوساخة من ...

سميرة (في غضب): من الكفر!
بسيمة: وبعدين يا جماعة اهدوا شويّة ورانا حاجات أهم من الخلافات البسيطة دي، عاوزين نستعد للتفتيش والتكدير والنكد بتاع كل يوم، مش ناقصين مشاكل ومش ناقصين نكد.

(تظهر الشاويشة في الفضاء الخارجي. تفتح باب الحوش الحديدي ثم تُغلقه وراها. تجتاز الحوش وتدخل العنبر. باب العنبر مفتوح.)

الشاويشة: بعد شوية هاتجيلكم زينب تمسح العنبر وتكنس الحوش وتغسل لكم الهدوم، هي نضيفة زيّ الفل، أنضف واحدة في عنبر الدّعارة.
سميرة (تنتفض): الدعارة؟ لا يُمكن، يعني مش ناقصين إلا واحدة من الدّعارة يا ست فهيمة؟!

رشيدة ونفيسة (في نفس واحد): يا خبر اسود!
الشاويشة: مالهم بنات الدّعارة، لولا الملامة لقلتُ عليهم أنضف ناس. أنا بقى لي هنا عشرين سنة في السجن، عِشت مع كل الأنواع، ومع القتالات وتاجرات المُخدرات والنشّالات والمُتسوّلات والدعارة والسوابق، وكل الأصناف، وبصراحة كده ياما سُفت فيهم ناس بَنِي آدمين بصحيح، عندهم كلمة، وعندهم شهامة وعندهم شرف، وعندهم عزّة نفس، غيرش الزَمَن هو اللي غدار. ياما في الحبس مظالم يا ستات، يعني انتو كنتوا عارفين إنكم حتدخلوا السجن وتقعُدوا كمان في عنبر المُتسوّلات؟!

(سميرة تنتفض فجأةً وتصرُخ صرخةً حادّةً.)

الجميع (في فزع): فيه إيه؟ فيه إيه؟
سميرة (في فزع): صرصارا!

(سالمة تُمسك الشبشب وتجري وراء الصرصار وتضربه وتقتله وتضعه على حافة الشبشب وتخرج إلى الحوش، تبقى في الحوش واقفةً بجوار حوض الجرجير الصغير بعد أن تُلقِي الصرصار خارج باب الحوش، في الفناء الخارجي.)

الشاويشة: يا مصيبتِي! أنا افكرت حاجة جَرِت؟! حدّ يخاف من صرصار بالشكل ده؟!
سميرة: أنا بخاف من الصرصار أكثر من التّعبان.
الشاويشة: يا ساتر يا رب! السجن بتاعنا مافيهوش تعابين، عندنا صراصير وخنافس وسحالي ...
لبيبة: وقَمَل وبَق ...

عزّة: وجراد وعِرْس وقُطط، وتتخاَنق طول الليل وتدخل علينا من الحوش.
الشاويشة: ما هو لازم الحوش يتكنس كل يوم وينرش، والعنبر يتمسح ودورة الميَّة، النظافة مُهمَّة يا ستَّات، النظافة من الإيمان، والوساخة من إيه؟ بلاش أقول، أما أروح أنا دي زينب زمانها رجعت من الزيارة، دي بنت زي الفل وأمينة، لا يمكن أجيب لكم واحدة مش كويسة.

سميرة: عندك مساجين كثير يا ست فهيمة، بلاش بتاعة الدعارة دي، هاتي واحدة مُتسوِّلة ولا نشَّالة ولا حتى قتَّالة.

الشاويشة: القتَّالة لا يُمكن تمسح بلاط، مناخيرهم في السما، القتلات جابين من بيوتهم على طول، ما داروش، ما راحوش هنا ولا هنا لحظة غضب وخلص، وفيهم ناس ما قتلوش خالص، أحسن ناس هنا في السجن هما القتلات، لكن الدعارة، دول غلابة واتلطموا كثير، كلهم غلابة وياما في السجن مظالم.

(تظهر في الفناء الخارجي صباح المُتسوِّلة بجلبابها الممزَّق وشعرها المنكوش وخديها المُلطَّخين بالطين أو الزفت، حافية تمشي تعرُّج حتى تصل إلى باب الحوش الحديدي فتمسك القضبان بيديها. سالمة واقفة في الحوش تنظر إليها.)

صباح المُتسوِّلة: ناوليها عود جرجير من الجرجيرة بتاعتها.

سالمة: مين هي دي؟

(الشاويشة وهي واقفة في العنبر قرب الباب ترى سالمة في الحوش وهي تكلم صباح المُتسوِّلة.)

الشاويشة: ممنوع يا سالمة الكلام مع المسجونات، وأنتِ يا بت يا صباح امشي من هنا، مش عاوزة أشوف وشك هنا!

صباح المُتسوِّلة: ليه؟ ماله وشي؟ وشي ماله؟

الشاويشة: وشك اسود زيَّ الهباب، أنتِ حاطة عليه إيه يا بت؟ ماله لونه إسود كده؟!

صباح المُتسَوِّلة: لون الدنيا! وثِّي لون الدنيا.
الشاويشة: أسود من الدنيا كلها، ده لون المدخنة دي السوداء ولون الهباب الأسود
الي طالع منها علينا طول النهار، امتي ربنا يتوب عليّ من السجن ده؟

(الشاويشة تخرج إلى الحوش الصغير.)

الشاويشة: امشي يا بت، المدير والمأمور جاين هنا ومش عاوزاكي تجيبيلي الكلام.
صباح المُتسَوِّلة: والمدير والمأمور جاين هنا ليه؟
الشاويشة: جاين هنا ليه؟ شوفوا الوليَّة المجنونة؟ انتِ اللي جاية هنا ليه؟
صباح المُتسَوِّلة: هي جاية عشان هي ساكنة هنا، وهي اللي زرعت الجرجيرة اللي

هنا.

الشاويشة: ادّيهها عود جرير يا سالة.

(سالة تقطع من الأرض عود جرير وتُعطيه لها، صباح المُتسَوِّلة تضعُ عود
الجرجير في فمها!)

الشاويشة: اجري يا بت ناديلي زينب.
صباح المُتسَوِّلة: زينب الحرامية ولأ زينب القتالة.
الشاويشة: لا زينب دِعاره.
صباح المُتسَوِّلة: حاضر يا شاويشة.

(تمشي في الفناء وهي تعرّج وتنادي بأعلى صوتها.)

صباح المُتسَوِّلة: يا زينب، يا زينب دِعاره.

(تظهر أمامها سجينة في الفناء، تضربها بيدها.)

صباح المُتسَوِّلة: أنا بقول زينب دِعاره، عاوزة تعملي دِعاره على آخر الزمن! امشي
يا تسوّل يا دِعاره غلط.

(سالة تدخل إلى العنبر. الشاويشة تدخل وراءها إلى العنبر. تمشي حتى تصل
إلى الركن الذي تجلس فيه بسيمة.)

الشاويشة: نسيت أقول يا ستّ بسيمة، لما زينب تكنس وتمسح وتغسل لكم الهدوم ابقى اديها سيجارة ولا اثنين.

بسيمة: يبقى في الحالة دي عاوزين سجاير زيادة من الكانتين؛ أنا مَعنديش غير السجاير بتاعتي، ما أقدرش أعيش من غير السجاير بتاعتي، ما أقدرش أعيش من غير سجاير، إنتِ عارفة كده يا ستّ فهيمة.

(نفيسة كانت واقفة قرب الباب تُراقب الحوش.)

(سالمة تتمنى في العنبر تتأمل الجدران. فجأة تقع عينها على صورة الرجل الضخمة داخل الإطار السميك أعلى الجدار.)

(سالمة تسأل الشاويشة وهي تُشير بيدها إلى الصورة.)

سالمة: هو الراجل ده مين يا شاويشة؟

الشاويشة (في فزع): يا مصيبتى! ده مش راجل يا بت ده المدير اللي فوق فوق خالص.

سالمة في سذاجة: فوق فوق خالص يعني فين؟

الشاويشة: فوق فوق فوق فوق ... (وهي تُشير بيديها إلى أعلى.)

سالمة: في السما يعني؟

الشاويشة (لا تزال رافعة يديها إلى أعلى): فوق، فوق، كمان.

سالمة (في دهشة): فوق السما كمان؟ فوق ربنا يعني؟

الشاويشة: استغفر الله العظيم من كل ذنبٍ عظيم، هو فيه بني آدم فوق ربنا برضه

يا سالمة، أنتِ مش مؤمنة ولا إيه؟

رشيدة (في غضب): يا بت بطلي هبل يعني أنتِ مش عارفاه، ما هو اللي جايبك هنا

في السجن يا بت!

سالمة (في دهشة وأكثر سذاجة): هو اللي جايبيني هنا؟ هو عارفني؟ أنا ماعرفوش

ولو باشبه عليه، زي ماكون شفته قبل كده.

(الشاويشة تضربها على كتفها وهي تضحك.)

الشاويشة: شفتيه إيه يا بت يا سالمة، هو ده حدّ بيشفوفه، ده فوق فوق قوي ولا حدّش يشوفه ولا يطوله أبداً.

رشيدة (في سخرية): باتشبهّي عليه يا بت؟ لازم بيت شبه أبوكي ولا أخوكي؟!

(رشيدة تضحك في سخرية.)

سالمة (في غضب): ويعني أبويا ولا أخويا مش راجل ولا مش راجل؟

الشاويشة: طبعاً راجل وستّين راجل، بس قوليلنا بقّه كده هو شبه مين فيهم؟

سالمة (في ضيق): هو أنا فاكرة شكل أبويا؟ لكن الي أنا فاكرة شكله جوز أمي، أهو

أنا كنت أقول له يابه برضه، وأهو كان يشبه الجدع الي في الصورة ده!

(جميع العنبر يضحك. بسيمة تُشعل سيجارة.)

الشاويشة: بقى لي عشرين سنة في السجن. أول مرة في حياتي أشوف في عنبر

السياسة واحدة زيّك يا سالمة.

سميرة (في غضب): أقطع دراعي إذا ما كانتش البنّت دي عاملة هابلة وساذجة.

بسيمة (تهمس في أذن عزة): الله يلعن الزمن الي خلانا نعيش مع الأشكال دي!

(ترنُّ صرخة حادّة في العنبر.)

(نفيسة تصرخ فجأة وهي تجري بعيداً عن الباب.)

الشاويشة (في فزع): إيه؟ إيه؟ إيه؟ صرصار تاني؟

نفيسة: لا، لا.

الشاويشة: راجل! راجل!

(نفيسة تجري مُسرعةً لترتدي العباءة والنقاب. وكذلك تجري الأخريات كل

واحدة ترتدي عباءتها ونقابها أو حجابها.)

(الشاويشة تتَّجه نحو الباب بسرعةٍ وهي تقول):

الشاويشة: يا مصيبتِي، ده المدير العام مش راجل!

(تخرج إلى الحوش بسرعةٍ وتفتح باب الحوش.)

(يظهر المدير العام مُمسِّكًا بعضًا يُحرِّكها في يده كالصولجان. من خلفه المدير والمأمور وضابط المباحث والضابطة. ضابط المباحث يرتدي نظارةً سوداء على عينيه.)

(الشاويشة تفتح لهم باب الحوش. يدخلون إلى الحوش. الضابطة تنظر إلى الأرض في ضيق. تهمس في أذن الشاويشة وهما يسيران خلف الموكب.)

الضابطة (في غضب): ماحدث كنس الزبالة دي ليه؟!
الشاويشة (في جزع): حالاً يا ستّ سنيّة، حالاً يتكنس!

(يسيران خلف الموكب بضع خطواتٍ داخل الحوش، المدير العام يتفقد جُدران الحوش العالية تعلوها الأسلاك الشائكة.)

(المأمور يقترب من الضابطة ويهمس في أذنها.)

المأمور (في غضب): ماحدث كنس الزبالة دي ليه؟
الضابطة (في جزع): حالاً يا بيه، حالاً يتكنس!

(يتقدّم المدير العام بضع خطواتٍ في الحوش وهو يتفقد الجُدران بعينه ويحرِّك العصا في يده بكبرياءٍ شديدة كالصولجان.)

(المدير يتخلف خطوةً أو خطوتين عن المدير العام. يقترب من المأمور ويهمس في أذنه.)

المدير (في غضب): ماحدث كنس الزبالة دي ليه؟

المأمور (في جزع): حالاً يا فندم! حالاً يتكنس!

(الشاويشة تقترب من المدير العام في اضطرابٍ وخوف. تُوقِّفه قبل دخوله العنبر.)

الشاويشة (وهي تتلعثم): لحظة واحدة يا سعادة البية، بس ... عبال البنات المنقبات ما يلبسوا، أصلهم يا سعادة البية من الجماعة دول اللي مش مُمكِن ينكشِفوا على راجل. **المدير العام (في غضب شديد):** راجل إيه؟ وكلام فارغ إيه؟ أنا المدير العام! **المأمور (يلكِّزها في كتفها):** ده المدير العام يا حمارة مش راجل! **يتلعثم المأمور (قصدي، قصدي، مش أيِّ راجل!**

(تتنحَّى الشاويشة جانباً في اضطراب. يسير المدير العام نحو باب العنبر الحديدي المفتوح عن فتحةٍ صغيرة. يتوقَّف لحظةً عند الباب ثم يستدير للضابطة.)

المدير العام: أنتِ ستِّ زيِّهم. ادخلي انتِ الأول شوفيهم لابسين وجاهزين ولأ.

(تدخل الضابطة إلى العنبر، ترى المنقبات والمُحجَّبات جالسات في الرُّكن الأيمن على الأرض. سميرة تجلس وحدها مُحجَّبة وفي يدها المُصحف تقرأ. رشيدة ونفيسة إلى جوار بعض لا يظهر منهما أي شيء. هادية واعتدال يظهر منهما فقط العينان ويرتديان قفَّازات في أيديهما. سالمة جالسة وحدها بالقرب منهما وقد غطَّت شعرها بالطرحة وارتدتُ جلباباً طويلاً واسعاً. في الركن الأيمن تجلس على الأرض (بطَّانية أو مرتبة على الأرض) بسيمة ومن حولها تجلس عزَّة ولبيبة ومديحة ونجاة. كلهن سافرات الوجه والشعر ظاهر، يرتدين جلابيب أو أثواب قصيرة عادية. بسيمة تُشعل سيجارة وتدخن.)

(المدير العام ينتظر عند الباب ومن خلفه الموكب، يحرك عصاه في يده.)

المأمور (بلهجة اعتذار): أصلهم يا سعادة البية ...

المدير العام (في غضب): أصل إليه وفصل إليه! مش فاهم إزاي بيشتغلوا بالسياسة وعاملين دوشة في البلد وقالبين الدنيا على رجل، وعاوزين يقبلوا نظام الحكم وهم مش بينكشفوا على رجالة!

(تطلُّ الضابطة من بين قضبان الباب وهي داخل العنبر وتكلم المدير العام.)

الضابطة: اتفضل يا سعادة البيه، كلهم جاهزين!

(يدخل المدير العام ومن خلفه الموكب.)

(يتمشَّى في العنبر فاحصًا الجدران والوجوه وهو يحرك العصا في يده بكبرياء وغطرسة.)

(سميرة جالسة في يدها المصحف والسبحة تُسبح، وقد ارتدت العباءة والحجاب، تُظهر وجهها وكفيها فقط.)

(رشيدة ونفيسة جالستين إلى جوار بعض وقد اختفَيْن تمامًا تحت عباءة سوداء تغطي الرأس والجسم حتى الأرض.)

(هادية واعتدال يرتدين نقابًا فيه فتحات للعيون فقط. يرتدين قفازات في الأيدي لإخفاء الكفوف.)

(سالمة جالسة وحدها بالقرب منهنَّ وقد أخفت شعرها تحت الحجاب لكن وجهها ويديها ظاهرة.)

(في القسم الأيسر من العنبر، بسيمة جالسة على المرتبة إلى جوارها لبيبة وعزة ومديحة ونجاة.)

(الجميع صامتات ينظرن إلى المدير العام دون حراك. عيون الموكب تفحص الجدران والمسجونات. ضابط المباحث يرتدي النظارة السوداء. يفتش الجدران بعينه وينقل بصره من واحدة إلى واحدة وهن جالسات صامتات.)

المدير العام (يُحرِّك عصاه بزهوٍ شديد): أرجو إنكم تكونوا مبسوطين هنا، معانا.
(ولا واحدة تردُّ عليه.)

الشاويشة: مبسوطين قوي يا سعادة البية، بوجودك.
المدير العام (بغضب): اسكتي انت، أنا مش بكلمك انت.
المأمور: اسكتي يا فهيمة.

الضابطة: أنت مالكيش كلام قدام البية المدير العام.
المدير العام: يا ترى فيه أي واحدة فيكم لها طلبات.
(سائلة تنهض بسرعة وتقترب من المدير العام.)

سائلة (في سذاجة): أيوه، أنا.
المدير العام: أنت اسمك إيه؟
سائلة: اسمي سائلة أبو خليل.
المدير العام: أيوه يا سائلة عاوزة إيه؟
سائلة (في سذاجة): عاوزة أعرف أنا هنا ليه؟!

(الشاويشة تخفي وجهها في الجدار وتضحك. الضابطة تزم شفيتها لتخفي ابتسامه. عضلات وجه ضابط المباحث تتقلص في تكشيرة. المأمور يشعر بالحر.)

المدير العام: أنت مش عارفة أنت هنا ليه؟
سائلة (في سذاجة): لأ معرفش.
المدير العام: على العموم ده مش اختصاصي.
(الضابطة تشدُّ سائلة من يديها بعيداً عن المدير العام.)

الضابطة: ده مش اختصاص البية المدير العام.

سالمة (في سذاجة): أمال مين؟

المأمور: بكرة تعرفي لما تنزلي التحقيق.

سالمة (في ضيق): تحقيق إيه؟ كل يوم يقولولي بكرة تنزلي التحقيق، بكرة تنزلي التحقيق، لا فيه نزول ولا فيه تحقيق!

(الشاويشة تستدير وتُخفي وجهها في الجدار. والمأمور والضابطة يُكشَّران في ضيق. ضابط المباحث يقترب من سالمة وينتحي بها جانبًا ويقول لها شيئًا. لا أحد يسمع ماذا قال لها.)

(سالمة تسكُت وتجلس على الأرض إلى جوار هادية واعتدال.)

المدير العام (يحرك عصاه بغرور): أي طلبات أخرى؟

بسيمية (تنهض وتخاطبه): يا سيادة المدير، احنا كلنا لغاية دلوقت مش عارفين إيه التُّهم الموجَّهة إلينا. عايشين في السجن في عنبر المُتسوِّلات زيِّ ما حضرتك شايف.
المأمور: ده أحسن عنبر في السجن، وعندكم دورة ميه، مافيش حد عنده دورة ميه غيركم؟

عزة: يا سيادة المدير احنا عايشين تحت ظروف سيئة جدًّا، لا عندنا زيارات ولا أكل بيحي من برّه، ولا نشوف جورنال، ولا نسمع راديو، وطول النهار المدخنة تحدِف علينا دخان وهباب أسود.

سميرة: وطول الليل تزحف علينا الصراصير والبَق.

اعتدال (بصوتٍ ضعيفٍ خائف): ولا نشوف أهالينا ولا أهالينا تعرف احنا فين.

بسيمية (بصوتٍ ضعيفٍ خائف): يا سيادة المدير دي حياة لا يُمكن يرضى بيها حد، احنا تعبنا، تعبنا، خلاص! صحَّتنا الجسمية والنفسية هلكت، هلكت!

مديحة (في هدوء): مش عارفين ليه مش بيحَقِّقوا معنا يا بيه؟

المدير العام: والله ده مش تخصُّصي، أنا مليش دعوة بالتحقيق.

مديحة: على الأقلِّ يصرِّحو لنا يا بيه إن احنا نشوف المُحامين بتوعنا.

المدير العام: ده برضه مش تخصُّصي.

لبيبة: أُمال تخصُّص مين يا فندم؟
المدير العام: والله مش عارف، كل الأمور حتتَّضح عن قريب إن شاء الله. مش كده
ولأيه يا محمد بيه؟ (ينظر إلى ضابط المباحث).
ضابط المباحث (في أدبٍ شديد): أيوه يا فندم، احنا مُنتظرين الأوامر من فوق.
(سألة تنهَض بسرعةٍ وتقول في سذاجة غريبة وهي تنظر إلى فوق.)

سألة: من فوق مين؟!

(الشاويشة تُخفي وجهها بيديها. الضابطة تستدير وتنظر للحائط. المأمور
يُمسك سألة من يدها وهو يبتسم في حرج.)

المأمور: اقعدني يا سألة جنب زميلاتك.
المدير العام: أي طلبات أخرى.
اعتدال (بصوت ضعيف): عاوزة قلم وورقة عشان ابعت جواب لأمي.

(المدير العام يُكثّر فجأةً وتبدو عليه الصرامة الشديدة.)

المدير العام: إلا الورقة والقلم! في العنبر ده أخطر من الطبنجة، مفهوم! أنا بقه
ليّ في مصلحة السجون ثلاثين سنة، سُمعتي معروفة، معروف عني الحسم والحزم. أنا
واضح جدًّا وصريح، والأوامر واضحة وصريحة. إلا الورقة والقلم. الأوامر هي الأوامر ومش
عاوزين مشاكل. ممنوع الاتّصال بالخارج بأيّ شكل، لا جواب يدخل ولا جواب يخرج، لا
ورقة ولا قلم لغاية ما تيجي لنا أوامر أخرى مفهوم!

الشاويشة: هم كلهم فاهمين يا سعادة البيه، وكويسين قوي، ده أحسن عنبر عندنا.
الضابطة: فعلاً يا بيه، كلهم سلوكهم طيّب وهاديين.

المأمور: طبعًا، كلهم ناس مُتعلّمة وعارفة النظام والقوانين، واللوائح.
سألة (تهمس في أنف اعتدال): اللوائح إيه؟ عارفة اللوائح تبقى إيه يا اعتدال؟
اعتدال (تُسكتها في ضيق): هو احنا عارفين حاجة اسكتي يا بت.

عزّة (تهمس في أدن لبيبة): قوانين؟ هو فيه قوانين؟ لو كان فيه قوانين كنا بقينا هنا؟

لبيبة: اسكتي أنا خلاص هانفجر!
عزّة: لأ وحياتك امسكي أعصابك خيي اليوم يفوت على خير.

(المدير العام يتحدث مع المأمور في حديث جانبي.)

المدير العام: المأمور بيقول إن الأكل كويس، مش كده؟!

(يبتسم وينظر إلى سالمة.)

المدير العام (يخاطب سالمة): مش الأكل كويس يا سالمة؟!
الضابطة (تهمس للشاويشة): كويس قوي، أحسن من الأكل في بيتها.

(سالمة تنهض وتقول في هدوء وسذاجة الأطفال):

سالمة: بس أنا باجوع هنا، رغيين مش بيكفوني في اليوم.
المدير العام (للمأمور): رغيين ازاي؟ ليه مش ثلاثة أرغفة؟ في كل السجون ينصرف ثلاثة أرغفة لكل واحد.

المأمور: أصل المسألة ...

المدير العام (مقاطعه): لا أصل ولا فصل، من النهاردة لازم ينصرف لكل واحدة منهم ثلاثة أرغفة.

المأمور: حاضر يا سعادة البية.

لبيبة (تسعل): مدخنة السجن طول النهار تحديف علينا دخان، صدري اتملى دخان وبقيت أئح، وممكن يجيلي نزلة شعبية أو حتى سل، عنبر السل جنبنا على طول. (تهرّش) وكمان بقت باهرش، باين جالي جرب.

سميرة (تنفض فزعة): إلا الجرب.

المأمور: السجن بتاعنا مافيهوش جرب يا سعادة البية.

لبيبة: أنا سمعت إن كل المُتسوّلات اللي كانوا هنا في العنبر ده، كلهم كان عندهم جَرَب.

المأمور: غير صحيح يا سعادة البية.

الضابطة: السجن بتاعنا مافيهوش جَرَب أبدًا.

الشاويشة: السجن بتاعنا نضيف زي الفل. إيه الكلام ده، جرب إيه وبتاع إيه؟

الضابطة: الحاجات دي مش عندنا، مش من جَوَّه السجن. الحاجات دي بتيجي لنا من برّه، وأول ما تدخل عندنا واحدة جربانة ولَّا مَسْلولة ولَّا عندها أي مرض مُعدي، على طول بادّي أمر بعزلها في المُستشفى يا بيه.

المأمور: عندنا عنابر مَخصوصة في المُستشفى للحاجات دي.

الضابطة: وبالنسبة لبنات الدعارة يا سعادة البية، كل واحدة فيهم بينكشف عليها، وإذا كان عندها أي حاجة بتتعالج على طول، مافيش أي تقصير يا بيه من ناحيتنا.

المدير العام: لا يا أستاذة ... الاسم إيه من فضلك؟

لبيبة: لبيبة.

المدير العام: لا يا أستاذة لبيبة، لا جَرَب ولا حاجة، أنتِ بس حسّاسة شوية، وطبعًا لسة مش واحدة على الحياة الجديدة هنا، مجرد تغيير جو طبعًا بيأثر. الجو هنا طبعًا مُختلف عن البيت، لكن بكرة حتتعوّدوا، وكل حاجة تبقى سهلة. وعلى العموم يا سيادة المأمور، إذا الأستاذة لبيبة استمرّت تشتكي من مسألة الهَرش دي، يبقى مُمكن دكتور الجلد يشوفها.

المأمور: حاضر يا بيه.

(المدير العام يتمشى مزهوًّا وهو يحرك العصا.)

المدير العام (يهزُّ العصا مزهوًّا بنفسه): أي طلبات أخرى؟!

(صمت كامل، ولا واحدة ترد.)

المدير العام (يبتسم في زهوٍ ويخاطب ضابط المباحث): السكوت علامة الرضا، يقولوا

كده على السّتات يا محمد بيه، مش كده ولَّا إيه؟!

(يضحك ضحكة قصيرة مُفْتَعلة.)

ضابط المباحث (في أدب): تمام يا فندم، تمام.
المدير العام: ما دام كله تمام، أمشي وأنا مطَّمنٌ ياللا بينا يا محمد بيه.
ضابط المباحث: لو سمحت لي، أنا حقعد معاهم شوية؛ عاوز منهم شوية بيانات بسيطة.

المدير العام: كده! طيب! سلامو عليكم.

(يُخرج المدير العام ومن خلفه يُهرول الموكب فيما عدا ضابط المباحث الذي يظلُّ بالعنبر.)

ضابط المباحث: عندي شوية بيانات ناقصة عنكم أحب أكملها.

(يُخرج من جيبه ورقةً وقلماً ويبدأ في التسجيل.)

ضابط المباحث: بسيمة شرف الدين.

بسيمة: أيوه.

ضابط المباحث: حضرتك غير مُنزوجة مش كده؟

بسيمة: زوجي مُتوفِّي.

ضابط المباحث (في برودٍ لزج): آه، مُتأسَّف، البقيَّة في حياتك.

بسيمة (في برودٍ أشد): وحياتك الباقية، ده مات من عشر سنين.

ضابط المباحث (ببرود): آه، مُتأسَّف.

(يسكُت لحظة. ينظر في الورقة.)

ضابط المباحث: و حضرتك عندك عمارة في مصر الجديدة؟

بسيمة: ده بيت من أربع أدوار بس مش عمارة.

ضابط المباحث (في برود): إن شاء الله تكملِّيهم عشرة وعشرين دور، مافيش حاجة

بعيدة على ربنا، ربنا قادر على كل شيء، يُعطي ما يشاء بغير حساب. (يسكُت لحظة)
والبيت ده جالك منين يا ستُّ بسيمة؟!

بسيمة (في برود): من عند ربنا!

سألته (تهمس): أيوه ربنا هو اللي بيدي عبيده زي أمي ما بتقول.
اعتدال (تلكزها): اسكُتي يا بت، إيه اللي جاب سيرة أمك دلوقت.
ضابط المباحث (في ضيق): أنا عارف إن كل حاجة من عند ربنا يا ست بسيمة، لكن البيت ده ورثته عن المرحوم جوزك؟
بسيمة: لأ، أنا ما ورثتش حاجة من حد، لا من أبويا ولا من جوزي. البيت ده من عرق جيبيني، أنا لي منصبى وباشتغل في الحكومة من ثلاثين سنة.
ضابط المباحث (في برود): ادخارات يعني؟
بسيمة (في ضيق): أيوه ادخارات، والدولة بتشجع الادخار، مش كده؟!
عزة (تهمس في أذن لبيبة): لأ دلوقت عاوزين يشجعوا الاستهلاك عشان الناس تشتري البضائع المستوردة.
لبيبة (تهمس لها في غضب): الراجل ده أنا حاشتمه!
عزة: امسكي أعصابك خالي اليوم يفوت على خير.
لبيبة: ده ما عندهاش غير حتة بيت مايسواش حاجة. يروح يسأل اللي عملوا ملايين وملايين.

(يتجه ضابط المباحث نحو عزة.)

ضابط المباحث: عزة مُرتضى؟!
عزة: أيوه.

ضابط المباحث (في برود): حضرتك مُتزوجة مش كده؟
عزة (في ضيق): لأ مش مُتزوجة.

ضابط المباحث (في برود): أرملة برضه زي الست بسيمة.
عزة (في ضيق): لأ مش أرملة!

ضابط المباحث (في برود لزج): أمال إيه يا ترى؟
عزة (في صوت مُحرج وشيء من الخجل): مُطلقة.

ضابط المباحث: آه، مُتأسف، وعندك بنت عندها ستاشر سنة، مش كده ولا إيه؟

عزّة (في برود وضيق): ما البيانات كلها عندكم؟
ضابط المباحث: يعني يا ستّ عزّة، مش أحسن برضه إنك تربّي بنتك بدل القعدة هنا.

عزّة (في غيظ وبرود): لأ القعدة هنا أحسن.
ضابط المباحث (في برود): على العموم إنتِ مآنسانا.
عزّة (في برود): الله يآنسك.

(يَتَّجِه ضابط المباحث إلى رشيدة ونفيسة، لا يظهر منهما أي شيء، الرأس والجسم كله مُغطّى بغطاءٍ أسود كثيف لا يُظهر شيئاً، لا الوجه ولا العينين ولا أي شيء.)

ضابط المباحث: بالطريقة دي لا يُمكن أعرّفكم من بعض، واحدة منكم تكشف وشّها عشان أعرّفها (يُشاور على رشيدة) إنتِ مين فيهم؟

(لا تتحرّك واحدة من مكانها ولا تكشف وجهها. رشيدة صامتة، لا تردُّ عليه.)

سميرة (في ضيق): هم لا يُمكن يكشفوا وشُّهم قُدّام راجل.
ضابط المباحث (لسميرة): أَمال أنتِ كاشفة وشك ليه؟
سميرة: كل جماعة لها رأي، أنا رأيي إن وجه المرأة وكفيها ليست عورة، النبي ﷺ...
رشيدة واعتدال وهادية ونفيسة (في نفس واحد): ﷺ.
سميرة (تُكَمَل كلامها): أباح للنساء إنهم يكشفوا الوجه والكفين أثناء الحج.

(ضابط المباحث يُشاور على رشيدة.)

ضابط المباحث: طيب أنتِ مين فيهم؟

(رشيدة صامتة لا ترد.)

سميرة: صوت المرأة كمان عورة.

ضابط المباحث (لسميرة): أَمال أنتِ نازلة كَلام لِيه؟ هُو أنتِ مَش امرأَة وَلا إِيه؟!
سميرة (فِي غَضِبٍ شَدِيدٍ): لَأ مَش مَرَأَة، المَرَأَة خُلِقَت مِن ضَلَعِ أَيْسَرِ أَعْوَجِ، النِّسَاءِ
نَاقِصَاتِ عَقْلِ وَدِينِ، أَنَا مَش مَرَأَة، أَنَا إِنْسَانٌ.

ضابط المباحث: كَدِه؟! وَالله البَيَانَات دِي مَش عِنْدِي وَحَضْرَتِكَ بَقَه اسْمِكَ إِيه؟
سميرة (فِي كِبْرِيَاءٍ): الأَسْتَاذَة سَمِيرَة الفِيشَاوِي.
ضابط المباحث (فِي بَرُودٍ): تَشْرَفْنَا يَا أَسْتَاذَة، وَحَضْرَتِكَ بَقَه كَدِه مُتَزَوِّجَة وَلاَ مَطْلَقَة
أَوْ أَرْمَلَة؟

سميرة (فِي غَضِبٍ شَدِيدٍ): لا هَذَا وَلا ذَاك، أَنَا لَمْ أَتَزَوَّجْ أَبَدًا، لَسْتُ فِي حَاجَةٍ إِلَى زَوَاجٍ،
وَهَبْتُ نَفْسِي لِلَّهِ، تَزَوَّجْتُ اللَّهَ.

سالمَة (تَهْمِسُ فِي أُذُنِ اعْتِدَالٍ): هُو رَبَّنَا بِيْتَجَوِّزُ!
اعتدال (تَلَكِّزُهَا): اسْتَغْفِرُ اللَّهَ العَظِيمِ، اسْكُتِي يَا بَت، قَطَعَ لِسَانِكَ.
ضابط المباحث (فِي بَرُودٍ): آه، فَهَمْتُ، حَضْرَتِكَ يَعْنِي عَانِسُ.
سالمَة (تَهْمِسُ لِنَفْسِهَا فِي سَدَاجَةٍ): عَانِسُ يَعْنِي إِيه.
سميرة (فِي غَضَبٍ): أَرْجُوكِ، القَامُوسُ بَتَاعِي مَا فِيهُوشِ الكَلِمَة دِي.
ضابط المباحث (فِي بَرُودٍ): مُتَأَسِّفٌ يَا أَسْتَاذَة سَمِيرَة، مُتَأَسِّفٌ (يَتَّجِهَ الضَّابِطُ
نَحْوَ اعْتِدَالٍ).

الضابط: وَأَنْتِ اسْمُكَ إِيه؟
اعتدال (بِصَوْتِ ضَعِيفٍ عَاجِلٍ): اسْمِي اعْتِدَالُ مُحَمَّدِ الشَّيْخِ.
ضابط المباحث: أَنْتِ فِينِ يَا اعْتِدَالُ؟
اعتدال (بِصَوْتِ خَافَتِ): فِي المَدْرَسَة.
ضابط المباحث: أَنْتِ عَارِفَة إِنْ خَلَّصَ صَدْرَتِ الأَوَامِرِ بِمَنْعِ ارْتِدَاءِ النُّقَابِ فِي المَدَارِسِ.
(اعْتِدَالُ تُطْرِقُ إِلَى الأَرْضِ وَتَسْكُتُ.)

نَفِيسَة (تَرُدُّ مِن تَحْتِ النُّقَابِ): مَش ضَرُورِي المَدْرَسَة.
الضابط: مِينِ دِي الِلي بَتَتَكَلَّمُ.
(نَفِيسَة تَسْكُتُ وَلا تَرُدُّ.)

الفصل الأول

الضابط (في غضب): مين الي اتكلمت دِلوقت.

نفيسة (بصوت خائف): أنا.

الضابط: إنت مين فيهم؟

نفيسة (بصوت خائف): نفيسة.

الضابط (بهدهوء): وانت فين يا نفيسة؟

نفيسة: في الجامعة، طالبة.

الضابط: يعني خلاص، مش هاتروحي الجامعة يا نفيسة؟

نفيسة: أروح بالنقاب.

الضابط: لأ، النقاب بقّه ممنوع.

(نفيسة تُطرق إلى الأرض وتسكت.)

الضابط: عليكى تختاري يا النقاب يا الجامعة.

(نفيسة مُطرقة لا تُرد.)

الضابط: هيه؟ اخترت إيه؟

نفيسة: النقاب. الآخرة أبقى من الدنيا.

سميرة (بشدة): على العموم التعليم مش في المدارس ولا في الجامعة.

الضابط (في برود): آمال فين يا حاجة؟

سميرة: التعليم في كتاب الله. الله هو المُعلّم الوحيد.

الله والرسول ﷺ

الأخوات (في نفس واحد): ﷺ.

(الضابط يتّجه إلى سالمة.)

الضابط: وانت يا سالمة؟ إنت فين؟

سالمة: أنا في بيتنا.

الضابط (مُبتسماً): قصدي في مدرسة إيه؟

سالمة: أنا مارحتش مدارس.

الضابط: وبتقري وتكتبي.

سالمة: لا باعرف اقرا ولا اكتب!

الضابط: مش معقول؟

سالمة: ولا عندي لا قلم ولا ورقة.

الضابط: إزاي ده؟

سالمة: وإذا ما كنتش مصدقني تعالي فتشني.

أنا أهو.

(تقف سالمة وتقترب من ضابط المباحث وهي ترفع يديها إلى أعلى.)

الضابط (يبتسم): مصدقك والله. قوليلي يا سالمة أبوكي بيشتغل إيه؟

سالمة: معرفش، ماشفتش أبويا، هو مطلق أمي وأنا صغيرة.

الضابط: وعندك اخوات؟

سالمة: كثير.

الضابط: كام؟

سالمة: معرفش عددهم، أصل أبويا اتجوز كثير وخلف كثير، أمي ماتعرفش عنه حاجة، بتسمع عنه من الناس.

الضابط: وأنت عايشة مع أمك يا سالمة؟

سالمة: لأ. (صوتها فيه ألم خفيف) أمي أتجوزت، وجابت عيال كثير من جوزها،

وجوزها مايقدرش يصرف على عياله وعيال غيره.

الضابط: يعني بتشوفي أمك يا سالمة؟

سالمة: طبعا باشوفها، حد مش بيشف أمه، ساعات أزورها، وساعات هي تزورني،

لازم أمي حتيجي تزورني هنا، بس حد يدبها العنوان.

الضابط (يكتفم الضحك): وانت عايشة مع مين يا سالمة؟

سألة: عايشة مع سني أم أمي، لكن سني ماتقدرش تيجي تزورني، أصلها بعد عنك عامية مابتشوفش، لكن لو لقت حد يجيبها تيجي.

سألة (تكلم نفسها): أيوه لو لقت حد يجيبها لازم تيجي، زمانها بتدور علي.

(نجاه تخفي رأسها بين يديها وتجهش بالبكاء.)

(ضابط المباحث يضع الورقة والقلم في جيبه.)

لبيبة (في عصبية): كفاية بقه أعصابنا تعبت!

(تمسك رأسها بيديها.)

ضابط المباحث (يتجه نحو الباب): متأسف، أنا آسف، أنا كمان أعصابي تعبت.

عزة: هو انتم مالكوش شغلة غيرنا ولأ إليه؟

ضابط المباحث: يا ريت كنتم انتم بس، ده أنا ورايا غيركم كتير ومن كتر الشغل لا

بارجع بيتي ولا باشوف الولاد. والله ما شفت ولادي من يوم ما جيتم هنا.

عزة: يعني احنا اللي بنشوف ولادنا؟ خليك زينا.

الضابط (في ألم): والله العظيم انتم مرتاحين عني؛ أنا شايل مسئولية قد الجبل على

راسي من فوق (يرفع يده إلى أعلى ودون أن يقصد تشير يده إلى الصورة العلوية المعلقة).

(سألة تتابع حركة يده وهي ترتفع وتشير نحو الصورة.)

سألة (تهمس في أذن اعتدال): هو إيه ده اللي فوق؟

اعتدال (في سذاجة): جبل؟ هو فين الجبل ده؟

الضابط (يكرّر في ألم): أنا متأسف يا جماعة، أرجوكم ماتضايقوش مني لو جيت

لكم كل يوم. دي شغلتي. أنا مسئول عنكم لغاية ربنا ما يفرجها وتخرجوا من عندنا

بالسلامة. والله أنا مستني قرار الإفراج عنكم كأنه قرار الإفراج عني أنا، أنا محبوس هنا

معاكم في السجن زيكم تمام، ويمكن أكثر، ربنا بس اللي يعلم!

(يسكت لحظةً ويُطرق إلى الأرض في ألمٍ وتأثُّر).

(الجميع صامتات).

ضابط المباحث (في رِقَّةٍ مُفاجئة): أي طلبات، أنا تحت أمركم، أي طلبات يا ستُّ
بسيمة؟

بسيمة (في ألم): لأ، شُكرًا.

(يخرج ضابط المباحث).

(صمتٌ وسكون، الجميع صامتات واجمات).

سميرة (في غضب): كلهم كده! شاطرين في التمثيل!

ناعمين زي التَّعابين وقرصتهم تموت.

بسيمة (في غضب): فعلاً، لك حق يا سميرة، يقول على البيت عمارة؟ عاوز يقول

إني حرامية الحقير! يروح يدور على الحرامية الكبار!

عزة (في غضب): ويقولِي رَبِّي بِنْتِكَ أَحْسَن؟ مين قاله الحقير إني أنا ماربتش بنتي؟

سميرة (في غضب): وأنا عانس؟ ابن الكلب!

(رشيدة تخلع النقاب وينسدل شعرها الطويل).

رشيدة (تقلد صوته وحركاته): وأنت مين فيهم بَقَه؟

نفيسة (تخلع النقاب وتقلد صوته): يا النقاب يا الجامعة. تختاري إيه؟

إن شاء الله ربنا حيحدفك في النار حدف!

(سالمة تخلع الطرحة. شعرها الطويل ينساب. تُقلد مشيته وحركاته وصوته ثم

تقول):

سالمة: وأنت عايشة مع مين يا سالمة؟ وأنت مالك؟ عايشة مع اللي عايشة معاه،

مالك أنت!

(تقلد حركاته مرةً أخرى، وهي تضحك بصوتٍ عالٍ ومَرِحٍ شديدٍ كالأطفال.)

سميرة (في غضب): اسمعي بَقَه يا ستُّ سالمة انت! مش علينا شغل الهَبَل ده والسذاجة وكل حاجة مش عارفاه، الراجل ده خَدِك على جنب وقال إيه؟

سالمة (في دهشةٍ وفَزَع): راجل مين؟

سميرة: مش عارفة راجل مين؟ الراجل اللي كان هنا، ضابط المباحث.

سالمة (في خوف): حيقولي إيه؟

سميرة (في تشكُّك): أَمَال خَدِك على جنب ليه؟ ما قاليكيش ليه قُدَّامنا كلنا؟!

سالمة (في ضيق): أنا عارفة!

سميرة (في استجواب): وقال إيه؟ قولي قالك إيه؟

سالمة: قالي كلام كده مافهمتوش، زي ما يكون بيرطُن بالإنجليزي.

سميرة (في غضب): إنجليزي؟

رشيدة (في سخرية): هو أنتِ بتعرفي عربي أما حتعرفي إنجليزي.

سميرة: بطلي استهبال يا سالمة وقولي قالك إيه؟

عزّة: قولي يا سالمة ماتخافيش.

سالمة: أنا مش خايفة، أنا معرفش هو قالي إيه. أقول حاجة ماعرفهاش.

بسيمة (في غضب): ما هو لازم تقولي، غصب عنك لازم تقولي، كفاية اللي فينا، مش

عاوزين كمان واحدة معانا في العنبر تكون ...

(تسكت بسيمة ولا تكمل الجملة.)

سالمة (في ألم): تكون إيه؟ أنا مش عارفة حاجة!

سميرة (في غضب): تكون بتجسس علينا.

سالمة (في دهشة): بتجسس؟ يعني إيه؟

سميرة (في غضب): يعني جاسوسة! مش عارفة جاسوسة يعني إيه؟!

سالمة (في غضب): جاسوسة؟ أنا جاسوسة؟

ليه بَقَه؟ أنا عملت إيه؟

(تُرَدُّد في غضبٍ هذه الجملة عدّة مرات، ثم تُمسك رأسها وتبكي بحُرقةٍ شديدة وهي تُرَدُّد):

سألمة (تبكي): أنا جاسوسة، حرام عليكم، ده أنا ما أعرفش حاجة، والله ما أعرف حاجة خالص (تبكي).

(تظهر الشاويشة فهيمة ومعها زينب (بنت من عنبر الدّعارة) ترتدي جلبابًا طويلًا أبيضَ مشقوقًا عند الصدر، يكشف قليلاً من نهدبها الصغيرين. رشيقة تمشي إلى جوار الشاويشة وهي تتراقص في مَرِحٍ وحيوية. في يدها مقشّة، تُطرقع لبانة.)

(الشاويشة تفتح باب الحوش الحديدي. يُسمع صوت المفتاح بدوراته الثلاث. تدخل زينب وحدها في الحوش ومعها المقشّة. الشاويشة تُغلق الباب مرةً أخرى، وتكلم زينب من بين القضبان الحديد.)

الشاويشة: اكنسي الحوش واروي الجرجيرة أحسن قرّبت تموت، وإيك تُدخلي عندهم ولا تكلمي واحدة فيهم إلا لما أجيلك. ماتجيبيش ليّ مشاكل يا زوبة. مفهوم؟
زوبة (تطرقع اللبانة): مفهوم يا ماما فوفو! انت يا كايدهم يا دويل كريم! (تضحك).
الشاويشة: اختشي يا بتّ؛ انت مش في عنبر الدّعارة. دول سياسيات يا بت وما يحبوش الكلام ده، وفيهم مُحجّبات ومُنقّبات. إوعي تقربّي من واحدة منهم أحسن والله ما يحصلك طيب أبدًا يا بتّ يا زوبة! مفهوم؟
زوبة: مفهوم يا ماما فوفو! رُوحى انت كُلي؛ ماكلتيش من الصبح. الأكل بتاعك هناك مع ماما شوشو، وابقى خليلي حتّة قرقوشة طرية يا طرية!
الشاويشة (تبتسم): أنا عضمتي ناشفة زيّ الحديد يا بت، إنت اللي طرية إنت وامك. صحيح بنت دعارة بصحيح.

(تركها الشاويشة وتختفي في الفناء الخارجي.)

زوبة (تُمسك المقشّة وتبدأ في كُنس الحوش. تُدندن لنفسها وهي تكنس بإحدى الأُغنيات الشائعة):

اللي حيتجوزني يوريني شهاداته
قبل ما ينرفزني يقولي تاريخ حياته

(من داخل العنبر، رشيدة تراها من بين قضبان باب العنبر المفتوح قليلاً.)
(رشيدة تكلم نفسها وهي واقفة وراء القضبان وقد بدا عليها الغضب والضيق.)
رشيدة (تكلم نفسها): شوفوا البنت عاملة في نفسها إيه وعمالة تترقص وتغني،
إلهي يكسفك يا شيخة!

(نفيسة وهادية واعتدال ينهضن كلهن بسرعة لينظرن من بين القضبان على
زوبة وهي تكنس.)

اعتدال (تضرب على صدرها بيدها): يا مصيبتني ده صدرها كله باين!
نفيسة (في غضب): مش مُمكن تدخل عندنا واحدة بالشكل ده!

(نجاة ومديحة ولبيبة يقتربن من الباب وينظرن أيضاً من بين القضبان على
زوبة.)

نفيسة: لا يُمكن نوافق إن واحدة زي دي تدخل هنا!

(سالمة أيضاً تنهض وتسير وتنضم إليهن.)

زوبة (لا تزال تغني):

اللي حيتجوزني يُوريني شهاداته
قبل ما ينرفزني يقولي تاريخ حياته

سالمة: أنا سمعت راديو الجيران بيغني الأغنية دي، هو مين اللي بيغنيها؟
رشيدة (في غضب): احنا مش بنسمع راديو يا بت.
لبيبة: أنا خايفة يكون عندها مرض من الأمراض الخبيثة! ممكن تعدينا كلنا.
اعتدال (تُخفي وجهها بيديها): يا مصيبتى! أمراض خبيثة كمان؟
سالمة (في سذاجة): وهي الأمراض الخبيثة دي تبقى إيه؟
هادية: اسكتي يا سالمة، دي حاجات مش مفروض نعرفها.
سالمة: وليه مانعرفهاش؟ مش جايز تعدينا كلنا زي ما بتقول الست لبيبة.
رشيدة: اسكتي يا سالمة بلاش فضايح.
نفيسة (في غضب): لا يُمكن واحدة زانية، تدخُل عندنا!
اعتدال: يا مصيبتى! وهي «زانية» كمان؟
رشيدة: أمال دِعارة يعني إيه؟ يعني «زنا».
هادية (في قلق): دي مُمكن تفسد أخلاقنا.
اعتدال: فعلاً، ممكن تفسد أخلاقنا بسهولة.

(عزّة تشترك في الحوار وهي جالسة على مرتبتها على الأرض.)

عزّة (في سُخرية): وهي أخلاقكم ممكن تنفسد بسهولة كده؟

(سميرة تنبّري لها في غضب.)

سميرة (في غضب): لأ يا ستّ عزّة! أخلاقنا مش ممكن تنفسد بسهولة!
أخلاقنا قويّة والحمد لله.

لكن احنا مش ناقصين واحدة زانية، كفاية اللي عندنا!

عزّة (في غضب): أنا بكلمهم هم مش بكلمك انت! إنت مالك؟

سميرة: طبعا مالي! أنا وهُمّ واحد!

بسيمة (تتدخل): يا جماعة هدّوا أعصابكم، لما تيجي الشاويشة نخليها تجيب لنا

واحدة غيرها. يعني مافيش غيرها. السجن مليون.

رشيدة: أيوة! السجن مليان!

نفيسة: يعني مافيش غير بتاعة الدّعارة دي اللي معندهاش شرف ولا أخلاق؟
السجن مليان مسجونات شريفات، على الأقل أشرف من بتوع الدّعارة.

هادية: طبعًا، النشّالات والمتسوّلات وتاجرات المخدرات والقتلات وغيرهم، كلهم أشرف من الدّعارة.

عزة: ليه بقّه؟ هي السرقة والقتل مش حرام؟

هادية: أيوه حرام لكن الدّعارة حرام أكثر.

عزة: هو فيه عندكم حاجة حرام أكثر وحرام أقل؟

هادية: أيوه، طبعًا، فيه أخطاء كبيرة هي الكبائر، وفيه أخطاء صغيرة هي الصغائر، وفيه المعصية، أنا مثلاً ممكن أعمل معصية لكن أفضل مؤمنة وربنا ممكن يغفر ليه المعصية.

سميرة (في غضب): إيه يا هادية الكلام الفارغ اللي بتقوليه ده، مافيش حاجة اسمها معصية وصغائر، فيه كبائر وبس. وإذا كنت مؤمنة لا يُمكن تعملي معصية.

هادية (في غضب): ما تقوليش كلام فارغ، أنا عارفة كويس أنا بقول إيه.

رشيدة (في غضب): إنت عارفة حاجة يا هادية؟

هادية (في غضب): طبعًا عارفة أكثر منك على الأقل.

نفيسة: يا جماعة هدّوا أعصابكم، وانت يا هادية اسكتي.

هادية: أسكت ليه؟ أنا بقول رأيي.

نفيسة: خلي رأيك لنفسك.

هادية: من حقّي إني أقول رأيي.

سميرة: مش عاوزين نسمع رأيك.

هادية: لكن أنا عاوزة أقوله.

سميرة: واحنا مش عاوزين نسمع.

هادية: وأنا عاوزة أقول، سدّوا ودانكم إذا كنتم مش عاوزين تسمّعوا.

بسيمة: يا جماعة صلّوا على النبي، يلعن دين بتوع الدّعارة على بتوع المخدرات على النشّالات على القتلات، كلهم جرايم أشنع من بعض.

سميرة: أيوة يا بسيمة كلها جرايم. احنا قلنا كده.
هادية: وأنا قلت كده برضه، لكن جرايم عن جرايم تفرق. حدّ يقول إن السرقة زيّ الزنا أو الزنا زي القتل؟ ربنا أباح السرقة إذا كان الإنسان مُمكن يموت من الجوع.
سميرة: وربنا أباح قتل الكافر! قتل الكافر ثواب عند الله! وعدم طاعة الله كفر، والزنا كفر وفسق وفساد!

(يرنُّ في الجوّ صوت زوبة، وهي لا تزال تُندِن وتُغني وهي تكنس):

يا حبيبي تعالي الحَقني شوف اللي جرافي، من بعدك
سهرانة من وجدي بناجي خيالك، مين قدك
وأنا كاتمة غرامي، وغرامي هالكني، لأبكي وأشكي وأبكي، يا غرامي.

(رشيدة ونفيسة تَسَدان آذانهما بأصابعهما حتى لا تسمعا الغناء.)

(سميرة تُمسك السبحة وتُسبِّح وتقرأ في المصحف.)

(تدخل زوبة من باب العنبر وتقف عند الباب الحديدي.)

زوبة: عن إذْلكم يا سياسيات، حاخد شوية مية من الدّورة عشان أروي الجرجيرة.

(لا أحد يرد.)

عزة: ادخلي يا زوبة، الجرادل عندك تحت الحوض.

(زوبة تدخل دورة المياه. تخرج ومعها جرادل. تجري بسرعة ونشاط وتروي
الجرجيرة في الحوش، ثم تعود، وتبدأ مسح العنبر.)

(فجأة تنتفض سميرة وتصرخ وهي مفزوعة.)

زوبة: فيه إيه؟ فيه إيه؟

سميرة (تصرخ): صرصار!

(تُمْسِكُ زُوبَةَ الشَّبَشَبِ وَتَضْرِبُ الصَّرْصَارَ وَتَقْتُلُهُ، ثُمَّ تَكْنُسُهُ بِالْمَقْشَّةِ.)

زُوبَةُ (فِي أَلْمِ): إِنْتُمْ بِتَخَافُوا مِنَ الصَّرْصَارِ؟ رَبِنَا يَنْتَقِمُ مِنَ الْيَاسِ جَابِكُمُ السَّجْنَ!

(تَرْفَعُ يَدَيْهَا إِلَى فَوْقِ. عَنِ دُونَ قَصْدٍ تُصَبِّحُ يَدَاهَا نَاحِيَةَ الصُّورَةِ الْمُعْلَقَةِ.)

زُوبَةُ (كَأَنَّهَا تَدْعُو اللَّهَ): إِلَهِي يَنْتَقِمُ مِنْهُ!

(تَعُودُ زُوبَةُ إِلَى مَسْحِ الْعَنْبَرِ. شَمَرَتْ عَنِ ذَرَاعِيهَا وَسَاقِيهَا، وَرَاحَتْ تَمْسَحُ بِهَمَّةٍ وَنَشَاطٍ.)

(رَشِيدَةٌ وَنَفِيسَةٌ وَاعْتِدَالٌ. جَلَسَ الثَّلَاثُ يَقْرَأُونَ الْقُرْآنَ.)

(سَمِيرَةٌ جَالِسَةٌ وَحَدَّهَا تُسَبِّحُ وَتَقْرَأُ الْقُرْآنَ. هَادِيَةٌ جَالِسَةٌ فِي مَكَانٍ آخَرَ وَحَدَّهَا صَامِتَةٌ شَارِدَةٌ. سَالِمَةٌ جَلَسَتْ إِلَى جِوَارِ نَجَاةٍ تَتَحَدَّثُ مَعَهَا. بِسِيمَةً وَعِزَّةً وَلَبِيبَةً وَمَدِيحَةً، الْأَرْبَعُ جَالِسَاتٍ إِلَى جِوَارِ بَعْضٍ يَتَحَدَّثْنَ.)

(هَادِيَةٌ تَنْهَضُ وَتَسِيرُ نَحْوَ الْبَابِ. شَعْرُهَا هِيَ الْأُخْرَى طَوِيلٌ. تَرْتَدِي جَلْبَابًا وَاسِعًا طَوِيلًا. تَنْظُرُ هَادِيَةٌ مِنْ خِلَالِ الْقُضْبَانِ عَلَى الْحَوْشِ الصَّغِيرِ، وَالْفَنَاءِ الْخَارِجِيِّ وَاسِعٍ.)

(فَجَاءَتْ تَصْرُخُ هَادِيَةٌ وَتَجْرِي إِلَى رُكْنِهَا.)

(الْجَمِيعُ يَنْتَبِهْنَ. زُوبَةُ تَتَوَقَّفُ عَنِ الْمَسْحِ فِي فِزَعٍ.)

زُوبَةُ: فَهَ إِيه؟ فِيهِ إِيه؟ صَرْصَارُ تَانِي؟

هَادِيَةُ: لَأُ، رَاجِلُ!

(مَا إِنْ تَسْمَعُ الْأَخْرِيَاتُ كَلِمَةَ رَاجِلٍ حَتَّى تُسْرِعَ كُلُّ وَاحِدَةٍ إِلَى ارْتِدَاءِ الْعِبَاءِ وَالْحِجَابِ أَوْ النِّقَابِ.)

زوبة تجري نحو الباب وهي تقول):

زوبة: هو فيه رجاله! ده الدنيا هنا كلها حريم!

(ترى المأمور قادمًا نحو الحوش، ومن خلفه الشاويشة تجري وفي يدها حقيبة ملابس).

زوبة: يا مصيبتى، ده المأمور! مش راجل!

(تجري زوبة وتختفي في دورة المياه. الشاويشة تفتح باب الحوش للمأمور. يدخل ثم تدخل وراه. يتوقف المأمور لحظة عند باب العنبر.)

المأمور: ادخلي يا فهيمة، شوفيهم لابسين وجاهزين عشان أدخل.

(الشاويشة تدخل العنبر.)

الشاويشة: المأمور يا جماعة، إنتم لابسين وجاهزين.

سميرة: أيوة.

الشاويشة: اتفضل يا بيه.

(يدخل المأمور.)

المأمور: فين الست بسيمة؟

بسيمة (في اضطراب): أيوه، فيه حاجة!

المأمور: فيه واجد برة بيقول إنه خالك وجاب لك شنطة الهدوم دي.

بسيمة (متأثرة): أيوه، لازم خالي محمود، ويا ترى هو فين؟

المأمور: قاعد في مكتبي.

بسيمة: مقدرش أشوفه؟

المأمور: أنت عارفة يا ست بسيمة الزيارات ممنوعة، تحبّي أقوله حاجة.

بسيمة (في تأثر): قوله إنني كويسة وصحتي كويسة، ده راجل كبير في السن وعيان

كمان، ومايقدرش يستحمل.

(بسيمة تمسح دموعها. تُشعل سيجارة.)

المأمور: اديها الشنطة يا شاويشة، أنا مُتأسِّف؛ ضابط المباحث فُتِّش الشنطة، والملابس بس هي اللي مسموح تدخل. إنتم عارفين المسموح واللي مش مسموح.

(يخرج المأمور ومن خلفه الشاويشة، تُغلق باب الحوش الحديدي. تخرج زوبة من دُورة المياه.)

(بسيمة جالسة على مرتبتها، تفتح الشنطة، تمسح دموعها وهي تشمُّ ملابسها في الحقيبة، فجأةً تبكي بصوتٍ عالٍ.)

بسيمة (تنشج): ريحة دولابي وسريري وأوضة نومي وبيتي.

(زوبة وعزة ومديحة يواسينها.)

زوبة: بكرة إن شاء الله تُخرجي وتروحي بيتك يا ماما بسيمة.

بسيمة (لا تزال تبكي): خالي راجل كبير في السن وعنده ذبحة وجايز يروح فيها! ما يستحملش البهدلة دي!

عزة: خالك راجل قوي ويتحمل كل حاجة يا أستاذة بسيمة، وعنده مراته وولاده، بلاش تهدي في صحتك وأعصابك كده، أمال أنا أعمل إيه اللي سايبه بنتي لوحدها. **مديحة:** أنا حولِّع الوابور وأعمل لك شاي يروق مزاجك يا أستاذة بسيمة.

(زوبة تضع يدها على خدِّها وقد بدا عليها الألم والحزن فجأةً.)

زوبة: وانت عندك بنت يا ستَّ عزة.

عزة (في ألم): أيوه.

زوبة: يا بختها! اللي معهاش حدُّ أحسن من اللي معاها. الدور والبقية على بنتي أنا. عمرها حذاشر سنة ومعاها راجل إلهي ربنا ياخذُه.

عزة: ومين الراجل ده؟

زوبة: الراجل اللي ميِّل بختي وبختها، جوزي وأبوها، ربنا ياخذُه. أبويا جوزهولي وأنا عندي أربعناشر سنة. قبض القرشين ورماني في جهنم، ربنا يسامحك يابه، إنما هو ربنا مش حيسامحه أبدًا. لولا الخوف من جهنم كنت قتلته وأخذت فيه تأبيدة. وبدل عنبر الدعارة يبقى عنبر القتالات. وأهو كله سجن.

عزّة: وجوزك ببيعلم فيكي وفي بنتك إيه؟

زوبة: ما هو اللي شغلني. لولا هو ماكنتش عرفت الصنعة المهبّبة دي. في يوم قُلت أقتله وأستريح، لكن قلت لنفسي تضيّعي نفسك عشان راجل مش مُحترم. لو كان راجل مُحترم يمكن كنت قتلته. الرّجالة المُحترمة هي اللي تستاهل القتل، لكن الراجل الي مایسواش بصلّة حُسارة فيه القتل.

(زوبة تسكّت لحظة، يبدو عليها الألم فجأة.)

زوبة: لولا بنتي ياسمين أنا كنت قتلت نفسي، لكن (تبكي) مالهاش غيري، وأنا عاوزه أربيها كويس عشان تطلع ستّ مُحترمة، مش زي أمها.

(تمسح دموعها فجأة ثم تبتسم، وتُخرج من صدرها صورة صغيرة.)

زوبة: صورتها أهي معايا، لا يُمكن صورتها تفارقني. شوفي يا ماما بسيمة بنتي حلوة ارّاي، شوفي يا ماما عزّة، شوفي يا ... أنا مش عارفة أساميكم لسه (تدور عليهن جميعًا في العنبر تُفرّجهن صورة ابنتها).

بسيمة (في تأتّر): حلوة قوي.

عزّة: زي القمر.

مديحة: زي أمها.

سالمة: ربنا يخليها لكي يا زوبة.

(هادية واعتدال تنظران إلى الصورة ولا تقولان شيئًا.)

(سميرة تُشبح بوجهها من على الصورة في ضيق.)

زوبة: مش عاجباكي صورة بنتي يا ماما؟

سميرة (في غضب): مش عاوزه أشوف صور.

رشيدة: الصور عندنا حرام.

زوبة (تضرب على صدرها): حرام ليه الصور بقّه؟

الفصل الأول

نفيسة: « لا تدخلوا بيوتاً بها كلب وصور.»

(زوبة تُدسُّ الصورة في صدرها مرةً أخرى.)

زوبة: يا مصيبتِي، طب والكلب ليه كمان؟

سميرة (بلهجةِ أَمَرة): إنْت مالِكيش في الكلام بتاع ربِّنا.

بسيمة: تعالي هنا يا زوبة مالِكيش دعوة بالكلام ده، تعالي كمِّلِي مسح العنبر وامسحي دورة المياه، نضفيها كويس أحسن الصراصير جوَّها بتمشي.

زوبة: حاضر يا ماما بسيمة.

(تُسرع زوبة إلى الخيشة والجرَدَل وتدخل إلى دورة المياه وهي تقول): ياما

تعيشي يا زوبة وتشوفي!

(صمت. الجميع وإجماتٍ صامتات. مديحة تُوزِّع أكواب الشاي على الجميع.)

عزة (وهي تشرب الشاي): اللي يشوف بلاوي الناس تهون عليه بلوئته.

بسيمة: امتى ربنا يفرِّج عنا بَقَه!

لبيبة (في غضب): هو ربنا اللي حبسنا؟

بسيمة: لأ مش ربنا اللي حبسنا، لكن نعمل إيه؟ لازم نقول يا رب! لنا مين غيره؟

ربنا موجود.

عزة: طبعا ربنا موجود، لكن فيه برضه لنا ناس موجودة برَّه مُمكن تدافع عن

حقوقنا. الدنيا مش سايبه، وواحد لوحده مش ممكن يتحكم في أربعة وأربعين مليون.

بسيمة: أهو اتحكَّم ورمانا كلنا زيِّ الكلاب في السجون. لازم نكون وإقعيين

ونعترف بالحقيقة المُرَّة.

لبيبة (في غضب): مهما اتحكَّم لازم يجيله يوم يعرف إن الله حق.

عزة: ويعرف إن مش ممكن يكسِّر القوانين ويضرب يمين وشمال ويحبس نُص البلد.

بسيمة: طول عُمرنا نقول مش ممكن، مش ممكن، وأهو عمل وكسَّر وضرَب، حد

يقدر يقف قُدَّامه؟

عزة: ماحدث عارف يا أستاذة بسيمة بكرة حيحصل إيه. بلاش التشاؤم ده. أنا قلبي مقبوض.

بسيمة: هو الواقعية تشاؤم يا عزة.

عزة: أنا معاكي لكن مش عارفة ليه النهاردة صحيت من النوم قلبي مقبوض. بالليل جالي كابوس، شفت المرحوم أبويا واقف في الصلاة في بيتنا القديم في الزقازيق وأنا واقفة قُصَّادُه باترِعرش من الخوف، ماعرفش عملت إيه، وشفت إيدَه مرفوعة في الهواء، وبَعدين بَصَّيت لِقيت نفسي في الهرم قُدَّام أبو الهول. أبو الهول رافع إيدَه لفوق، وعلى الحجر مكتوب كلام بالهيروغليفي. وناس كتير واقفة وبيقولولي ترجمي، وأنا مش عارفة أترجم ولا كلمة، وصحيت على صوت سميرة الفجر وهي بتقول الله أكبر.

بسيمة: تعرني يا عزة إن سميرة والمجموعة بتاعتها مستريحين عننا؛ طول النهار والليل يصلوا ويقروا قرآن. المسألة عندهم بسيطة، وجوه السجن زي بره السجن؛ ما هو بره السجن هم حابسين نفسهم في البيوت وبيقروا قرآن برضه وبيصلوا، مافيش فرق خالص، يمكن السجن أحسن شوية فيه حرية أكثر، وبيكلّموا بعض وبيشوفوا ناس تانية زينًا، وزيّ الشاويشة، والمأمور، والمدير، والزبال وغيرهم. وبالنسبة لسالة السجن أحسن من بيتها بالتأكد، وكمان الأكل هنا أحسن من بيتها، لكن احنا اللي تعبانين.

عزة: فعلاً يا أستاذة بسيمة، الحياة في العنبر ده صعبة بعد حياتنا بره اللي كان كلها حركة ونشاط ولجان وكتابة وعمل وندوات وسفر ومؤتمرات. أنا مش عارفة ازاي أنا عايشة من غير ما أشوف جورنال ولا أسمع راديو ولا مزّيكة، ولا ورقة ولا قلم ولا كتاب ولا حاجة خالص.

بسيمة: اسكتي يا عزة أحسن أنا أعصابي خلاص تعبت. ساعات يتهيأ لي إن الجنون مسألة سهلة قوي في السجن.

عزة: لا يا أستاذة بسيمة، ده إحنا عاوزينك تشجعينا وتقويننا.

بسيمة: أشجع إيه وأقوي إيه؟ أنا خلاص البنزين خالص.

عزة: لا لا، لسة كتير يا أستاذة، وبكره نخرج ونبقى نفتكر الكلام ده ونضحك.

بسيمة: والله ما باين لنا خروج يا عزة. الراجل مش مخلي حاجة ولا حد.

عزة: بلاش نرجع للتشاؤم تاني.

بسيمة: لا تشاؤم ولا حاجة، ربنا معانا وربنا كبير أكبر منه.

عزة (باسمة): لا يا أستاذة بسيمة، إنت اليومين دول كل حاجة ربنا ربنا، إيه الإيمان اللي نزل عليكي مرة واحدة كده. أنا خايفة بعد شوية تليسي حجاب، وتخرجي من هنا مُنتقبة وماحدّش يعرفك.

(عزة تضحك. بسيمة تشاركها الضحك. بسيمة تضع يدها على فمها لتكتم الضحك.)

بسيمة: وطيّ صوتك وانت بتضحكي أحسن سميرة تسمعك تقولك إن الضحك حرام وإن الله لا يحبُّ الفرحين!

(عزة تضحك وتضع يدها على فمها. بسيمة تُشعل سيجارة. زوبة تخرج من دورة المياه.)

زوبة: الدورة بقت زي الفل، ادّيني سيجارة بقّه يا ماما بسيمة.

(بسيمة تُعطيهها سيجارة. زوبة تُشعلها، تَقِف تدخّن.)

زوبة: أهى السيجارة دي عندي تساوي مليون جنيه. لا آكل ولا أشرب ولا حاجة خالص، بس أشرب سيجارة.

عزة (باسمة): سجاير بس يا زوبة؟

زوبة: والي يقدرني عليه ربنا، برشامة، اتنين. أنا مش باخد من الحجات دي كتير، إنما البنات عندنا في العنبر طول الليل يضربوا ماكس. الواحدة منهم تأخذ في الليلة الواحدة ٩ سنتي ماكس غير البرشام. أصلهم كلهم ولاد حرام.

(سالة تنهّض وتقترب منها.)

سالة (في دهشة): بتقولي إيه ماك؟ إيه هو الماكس ده؟

(سميرة تشخّط في سالة بحدّة.)

سميرة (في حدّة): بس! اسكتي! مش عاوِرةَ أسمع كلام فارغ!
زوبية (تجري إلى خارج الحوش وهي تقول): يا ماما!

(ترى الشاويشة قادمةً ناحية باب الحوش.)

زوبية: افتحيلي يا ماما فوفو عشان أخرج من هنا، العنبر والحوش ودورة المية، وكل حاجة بقت زيّ الفل.

الشاويشة: جدّعة يا بتّ يا زوبية. الساعة بقت أربعة ولازم أقفل عليهم.
التمام يا ستّات.

(تشدّ الشاويشة باب العنبر وتُغلقه وهي تقول لهم من خلال القضبان. يُسمع صوت المفتاح يدور ثلاث دورات.)

الشاويشة: تصبّحوا على خير يا جماعة.

الجميع: وانت من أهله يا ستّ فهمية.

الشاويشة: مش عاوزين حاجة؟

بسيمة: ماتنسيش الجاز أحسن الوابور فاضي. مانقدرش نعيش من غير شاي والسجاير يا ست فهمية. السجاير بتاعتي قرّبت تخلص وماقدرش أعيش من غير سجاير.
الشاويشة: حاضر يا ستّ بسيمة.

(الشاويشة تُغلق باب الحوش الحديدي. يُسمع صوت المفتاح يدور ثلاث دورات. الجميع يرقّدن على مراتبهن أو على الأسيّرة. الأخوات المُسلّمات يقرأن القرآن أو يُسبّحن أو يُصلين، ما عدا اعتدال التي جلست قرب الباب ساهمةً تنظر من بين القضبان.)

لبيبة (في ضيق): معقول ننام من دلوقت؟

مديحة: تعالوا نعمل حاجة.

عرّة: نعمل إيه؟

مديحة: إيه رأيك يا أستاذة بسيمة تكلمينا شويّة في السياسة أو في التاريخ، ولّا انت يا عرّة احكي لنا شوية عن مؤتمر فرنسا، ما هو لازم نستفيد بوقتنا.

عزّة: أنا مُستعدّة أتكلّم عن البحث بتاعي الأخراني.
مديحة: كويس خالص، تعالي يا نجاة اسمعي معانا، مالك قاعدة كده لوحك؟

(نجاة جالسة وحدها، تبكي.)

مديحة: مالك يا نجاة.

نجاة: أبداً ولا حاجة، افكرت أمي.

مديحة: تعالي هنا جنبنا، تعالي.

(نجاة تنهّض وتجلس بجوارهن.)

(فجأة ترتّمي اعتدال على الأرض بجوار الباب الحديدي. عضلات جسمها تتقلّص في هيستريا وهي تردّد في حالة تُشبه الإغماء، ترفّس بيديها وقدميها على الأرض وتغيب عن الوعي.)

(الجميع يُسرّع لإنقاذها وتفويقيها. تعود إلى الوعي تدريجياً.)

(تبكي وهي تقول): آه يأمّه.

(مديحة تُقرّب من أنفها زجاجة كولونيا.)

(سميرة تشدّ الزجاجة بعيداً عن أنفها وتقول في حدّة وغضب):

سميرة: ابعدى الإزازة دي عن مناخيرها!

مديحة: دي كولونيا تفوّقها.

سميرة: الكولونيا حرام.

مديحة: حرام.

سميرة: أيوة فيها كحول يعني خمرة.

مديحة: وهي حتشربها؟ دي بتشمّها بس؟

سميرة: الاستنشاق مثل الشرب!

(لبيبة تُمسك رأسها بيديها وهي تقول):

لبيبة: آه يا راسي! حتنفجر!

(الجميع يُعدن إلى مراتبهنَّ ويجلسنَ أو يرقدن.)

(الظلام يزحف تدريجياً.)

(لبيبة ترقد على مراتبها وتنام.)

(ظلام وسكون وصمت كامل.)

(يستمرُّ الظلام والصمت بضَع لحظاتٍ فقط.)

(فجأةً يرنُّ صوت سميرة العالي الحاد في السكون التامَّ وكأنها تصرخ): الله أكبر، الله أكبر، الله أكبر!

(تهبُّ لبيبة من نومها مفزوعة.)

لبيبة (في فزع): فيه إيه! فيه إيه!

(ترى سميرة واقفةً تُصلي، وجهها ناحية الحائط ومن خلفها وقفت رشيدة ونفيسة واعتدال مُنقباتٍ يُصلين وراءها. الجميع في صوتٍ واحد): الله أكبر، الله أكبر.

لبيبة (تُمسك رأسها في غضب): مش معقول! مش قادرة أنام، مش عارفة أنام. مش معقول أصحى على الأصوات المُفزعة دي!

سميرة (تستدير إليها وتقول في غضب): دي مش أصوات مُزعجة يا كافرة، دي صلاة لربنا. لو كنتِ مُسلمةً بصحيح كنتِ قُمتِ وصلَّيتِ بدل ما أنتِ نائمة في حُسن إبليس.

لبيبة (في غضب): أنا حرةٌ أصلي ماصليش، أنام في حُسن إبليس ولا في حُسن عزرائيل مالكيش دعوة.

الفصل الأول

سميرة (في غضب): وأنا كمان حُرَّة أصلي زي ما أنا عاوزة.
عزة (تنهض): ما حدش منَعك من الصلاة يا سميرة، بس صلِّي بصوت واطي؛ فيه
ناس نايمة وفيه ناس تَعبانة.

سميرة: الصلاة الجماعة لازم تكون بصوت عالي. حدّ يقول على الصلاة زَعيق
وأصوات مُفزعَة. دي أحلى حاجة إن الواحد يصحى على صوت بيذكر الله. مافيش أحسن
من اسم الله.

عزة: اسم الله على عِينًا وراسنا بس مش بالطريقة دي.
سميرة: هي دي طريقتنا الوحيدة واللي مش عاجبها تشوفلها عنبر ولَّا زلزلة
لوحدها.

(سميرة تستدير ناحية الجدار. ترفع يديها إلى أعلى وتُصلي بصوت عال.)

سميرة: الله أكبر، الله أكبر.

(رشيدة ونفيسة واعتدال من خلفها واقفاتٍ يستعدن للصلاة.)

(هادية تستعد للصلاة وحدها على بُعد منهم.)

رشيدة (تُخاطب هادية): تعالي يا هادية صلِّي معانا جماعة.

هادية: لأ، أنا حصلي لوحدي.

رشيدة: صلاة الفرد ما تنفعش، لازم تصلي جماعة.

هادية (في غضب): مين قال إن صلاة الفرد ما تنفعش؟

رشيدة: ربنا يا بتّ الي قال.

هادية: ربنا ما قالش.

رشيدة: لأ ربنا قال.

هادية: لأ ربنا ما قالش.

سميرة (تستدير في غضب): وبعدين بقه؟ سيبها تصلي لوحدها يا رشيدة، سيبها
تصلي لوحدها. أصلها فراموية!

هادية: أنا فراموية يا خومينية يا علوية!
عزة (تهمس في أذن بسيمة): والله احنا مش في سجن، احنا في سراية المجانين.

(بسيمة تنهض وتُشعل سيجارة. يبدو عليها التعب والإرهاق.)

بسيمة: جسمي ثقيل وصدري مكتوم، أنا خائفة يكون عندي القلب أو جت لي ذبحة صدرية.

عزة: بعد الشر عنك يا أستاذة بسيمة، حاقوم أعملك كوباية شاي.

السجاير بتقطع النفس.

مديحة: أنا باعمل شاي.

بسيمة: والنفس أصله مقطوع.

عزة: لا مقطوع ولا حاجة، بس يا ريت تقللي السجاير أو تبطلها خالص، على الأقل في السجن.

بسيمة: بالعكس، دي السجاير في السجن بتسليني، وبتنسني. مش عارفة من غير سجاير كنت أعمل إيه.

عزة (تضحك): كنت تاخدي برشام أو تضربي ماكس.

(بسيمة تضحك وتغطي فمها بيدها.)

بسيمة: وطّي صوتك؛ مش عاوزين مشاكل، ربنا يخرّجنا من هنا على خير.

عزة: تعالي يا لبيبة نعمل الشاي سوا. عاوزينك تكلمينا شوية عن آخر حاجة عملتيها.

لبيبة: ما عنديش دماغ لحاجة خالص.

عزة: طب قوليلنا حلمت إيه امبارح.

لبيبة: الكابوس هو هو.

عزة: والله كله قلق وتشاؤم مالوش لازمة. زوجك رجل أفكاره متقدّمة ومخلص.

لبيبة: هو فيه راجل اسمه مخلص.

عزة: مهما كان مش ممكن دخولك السجن يَأثر عليه، بالعكس يحترمك أكثر.

لبيبة: ده كلام خيالي.

عزة: والله إذا خرجت ولقيتيه، كان بها، وإذا ما لقيتهوش يبقى كويس اللي مشي واستريحته منه.

لبيبة: هو مش مُهم، أنا قاعدة معاه طول السنين اللي فاتت بس عشان البنت. هو طول عمره بصباص، ودلوقت بقه يبص للبنات أصحاب بنته. على العموم أمي هي اللي حطمت حياتي، وكنت هاعمل نفس الغلطة مع بنتي.
عزة: كلنا بناتك يا أستاذة بسيمة.

(الأخوات أنهين الصلاة، وجلسن يقرأن القرآن. اعتدال تقترب من مديحة لتأخذ شايًا من الإبريق.)

مديحة: ازيك يا اعتدال دلوقت.

اعتدال (بصوت ضعيف): الحمد لله كويسة.

مديحة: تعالي اقعدني هنا جنبنا شوية.

(مديحة تصب لها الشاي. اعتدال تجلس بجوارها.)

اعتدال: أنا قلقانة قوي على أمي؛ خايفة يجرى لها حاجة لو عرفت إنني أنا هنا في السجن.

مديحة: لأ أبدًا، ماتقلقيش، مش حيجمي لها حاجة، وبكره تخرجني وتلاقيها كويسة خالص.

اعتدال: يسمع منك ربنا.

مديحة: ابترسمي. أيوه كدة ابتسامتك الحلوة.

عزة: أنا باحبت ابتسامة اعتدال قوي؛ وشها زي الملاك.

(اعتدال تبتسم ويبدو عليها السرور.)

عزة: كنا بنحكي عن أحلامنا في السجن.

اعتدال: كل أحلامي في السجن كوابيس.

(عزة تضحك.)

عزّة: الكوابيس بتاعتك لازم غير الكوابيس بتاعتنا.

(اعتدال تشرب الشاي.)

اعتدال: كل ليلة أحلم حلم واحد، إن أمي ماشية تدور لي في الدكاكين على فُستان الفرحة. كل ما نروح دكان يقولنا مافيش، مافيش، وأخيراً أمي تعبِت قوي وأنا تعبِت ودخلنا آخر دكان قال مافيش، أمي قالت ليه بس مافيش؟ قالولها ما عندناش فُستان فرحة لخريجة السجون!

(عزة تضحك ومديحة. اعتدال تُشاركهما الضحك بصوتٍ خافتٍ خجول.)

عزّة (في دهشة): إنت بتحلّمي بفستان الفرحة يا اعتدال؟

اعتدال: ما هو إذا كان منعوا النّقاب في المدارس يبقى حاقعد في البيت واتجوّز.

فيه واحد من الإخوة قايل علي.

مديحة: من الإخوة؟

اعتدال: أيوه طبعا من الإخوة. لا يمكن أتجوّز إلا واحد من الإخوة. لا يمكن أتجوّز

راجل ما يعرفش ربنا.

عزّة: والمدرسة مش خسارة يا اعتدال.

اعتدال: خسارة خسارة، في ستين داهية المدرسة، مش أحسن من إن ربنا يعذبني

واتحرق في النار، وكمان عذاب القبر.

مديحة (في دهشة): عذاب القبر؟

اعتدال: أمال إيه؟ ما هو اللي ماتلبسش نقاب تتعذب في القبر، وبعد عذاب القبر

تروح جهنم كمان.

عزّة: يا ساتر! عذابين يعني مش عذاب واحد.

اعتدال: أيوه، أمال، عذابين، طبعا عذابين، ده يمكن كمان أكثر من عذابين، يمكن ثلاثة أربعة خمسة، ستة، عشرة، عشرين عذاب وعذاب. أنا بخاف ربنا وأخاف عذابه وناره، بخاف من النار والحرق. وكمان باستخسر نفسي في النار والحرق، وأنا مستخسراكم في النار والحرق وعذاب القبر، ليه مش بتصلوا وتغطوا شعركم؟ أنتم مسلمين موحدين بالله. **مديحة:** صحيح أنا مسلمة وموحدة بالله، لكن اتولدت في بيت ماحدش فيه بيصلي، لا أبويا ولا أمي ولا حتى جدتي، ولا جدي. جدي أبو أبويا مسلم، لكن جدي أبو أمي كان قبطي.

اعتدال: قبطي؟ جدك كان كافر؟

(مديحة تنظر إلى نجاة. نجاة تشعر بالضيق والألم. تنهض وتترك المكان.)

مديحة: كده زعلتها يا اعتدال؟

اعتدال: يا مصيبيتي، أنا نسيت خالص إنها مسيحية.

لبيبة (في غضب): يعني إيه نسيتي؟ إنت عارفة إنها مسيحية، ودي حاجة تتنسي؟ **اعتدال (في حرج وألم):** والله العظيم نسيته، ولا يمكن أظف بربنا كذب. كل واحد بينسى وهي كمان شكلها مش قبطية أبداً. اللي يشوفها يقول عليها مسلمة زينا.

لبيبة (في غضب): والأقباط دول بيبقى شكلهم إيه؟ مش بني آدمين زينا.

اعتدال (بصوت ضعيف وحرج): طبعا بني آدمين، أنا قلت حاجة؟

لبيبة (في غضب): قلت إنها كافرة.

اعتدال (في اعتذار): معلش. غلطة وتفتوت والمسامح كريم.

(سميرة تتدخل وهي جالسة في مكانها تُسبح وفي يدها المصحف، كانت تتابع من

بعيد الحديث دون أن تتدخل، لكنها تنهض فجأة، وتقول بصوتٍ غاضبٍ حاد):

سميرة (في غضب): لأ مش غلطة! غلطة ازاى يا اعتدال؟ ربنا قال إن مافيش غير الإسلام وسيدنا محمد عليه السلام آخر الأنبياء، عاوزة تعيرني كلام ربنا، أيوه المسيحيين كفره وحيروحو جهنم إن شاء الله، والمسلمين كمان اللي مش عارفين ربنا حيروحو جهنم الحمر. تعالي هنا يا اعتدال اقري القرآن بدل ما أنت قاعدة تضييعي وقتك في كلام فارغ.

(اعتدال تنهض في ألمٍ وتذهب لتجلس إلى جوار رشيدة ونفيسة وهما تقرأن

القرآن. تجلس إلى جوارهما حزينه صامته ثم تقرأ معها!)

(نِجاة وحدها جالسة صامتة، تمسح دموعها في صمت.)

(مديحة تذهب إليها وتجلس إلى جوارها.)

مديحة: ماتزعليش يا نِجاة، مش انت بس الي كافرة هنا، احنا كلنا كفرة معاكي، ولا يهْمُك، يعني هي كانت ربنا، ربنا بس هو الي مُمكن يقول ده كافر أو ده مش كافر. **نِجاة** (وهي تبكي في ألم): أنا مش كافرة يا مديحة، أنا بصلي الصلاة بتاعتنا. من صغري وأنا بروح الكنيسة مع أمي كل يوم أحد.

مديحة: وحتى لو مكنتيش بتروحي الكنيسة ولا بتصلي، ربنا بس هو الي ممكن يقول انت كافرة ولا لاء، أنا مثلاً مش بصلي، عمري ما شُفت حد في بيتنا بيصلي أو بيقرأ قرآن. ما عرفش في القرآن غير الفاتحة، وحتى العربي بتاعي مكسر. دخلوني مدرسة فرنساوي وأنا صغيرة، اتعلمت فرنساوي وإنجليزي حتى ألماني، لكن ماتعلمتش عربي. **نِجاة** (تمسح دموعها): على الأقل أنت مُسلمة يا مديحة، مش بيقدروا يقولوا عليكِ كافرة.

مديحة: بيقولوا عليّ كافرة برضه عشان مش بصلي ومعريّة شعري. أنت مش بتسمعي سميرة طول النهار واللّيل تقول علينا كفرة.

نِجاة: أيوة يا مديحة، لكن برضه كلامها عنكم غير كلامها عني. دي مرّة بصت لي بصة، أنا خُفت منها. أنا خلاص مش قادرة أستحمل أعيش معاهم في عنبر واحد، حاقول للمأمور ينقلني في زنزانا لوحدي.

مديحة: أوعي تعلمي كده يا نِجاة؛ مش عاوزين حد يعرف المشاكل الي بينا. دول نفسهم إن تحصل مشاكل، دول حطينا مع بعض مخصوص عشان نتخايق مع بعض، ونصفي بعض.

نِجاة: أنا كمان تعبانة يا مديحة، وكلمة كافرة دي بتتعبني أكثر وأكثر، كافرة ازاي بس يا ربي. أنا مؤمنة بربنا والمسيح والروح القدس. أنا اتولدت لقيت أبويا مسيحي وأمي مسيحية. ربنا عاوزني أكون مسيحية. هو أنا الي عملت نفسي مسيحية. ربنا هو الي عملني مسيحية، يعني كنت حاخالف إرادة ربنا.

الفصل الأول

مديحة: وربنا هو اللي عملهم مسلمين، يعني هي فيه واحدة منهم اختارت الإسلام، كل واحدة منهم اتولدت لقت أبوها مُسلم بقت مسلمة.

نجاة: يا ريت كنت اتولدت لقيت أبويا مسلم. طول عمري أقول الحكاية دي. في المدرسة كان كل البنات مسلمين إلا أنا، وكنت دايمًا لوحدي، والبنات يبيعدوا عني، ويقولوا عليّ كافرة برضه، هي أول مرة يا مديحة اسمع الكلمة دي؟ ده أنا طول عمري اسمعها (تبكي نجاة، تبكي بصوت مكتوم).

مديحة: تعالي تعالي نخرج شوية في الحوش نشم شوية هوا، تعالي يا نجاة، بلاش توجعي قلبك.

عزة: تعالي نعمل حاجة بدل ما احنا قاعدين كده ننعي همومنا، حدّ يكلمنا أو تقولنا محاضرة تحرك مُخنا شوية؛ أنا حاسة إن مُخي واقف.

بسيمة: مُخنا بس، أنا حاسة إن جسمي كله همدان، المسألة طالت قوي يا جماعة، وباين عليها حاطول كمان وكمان. باين مش هانخرج من هنا، باين البلد مش خارجة من الأزمة دي.

عزة: مش ممكن يا أستاذة بسيمة، البلد لسه بخير والناس بخير، مش ممكن الناس تسكت على الظلم ده، مش ممكن!

بسيمة: ما هي ساكتة أهه.

عزة: لأ مش ساكتة! مين قالك إنها ساكتة؟

بسيمة: مش سامعين حدّ قال حاجة، كل الناس ملهية في حياتها ومشاكلها. واحنا خلاص اترميننا في السجن واتنسينا خالص.

عزة: لأ يا أستاذة بسيمة، إحنا لا يمكن نتنسي، الناس كلها فاكرانا، هو احنا قليلين في البلد، لازم فيه اعتراضات واحتجاجات.

بسيمة (في سخرية): وجايز كمان مظاهرات، يا سلام على التفاؤل الساذج، يا سلام على السذاجة.

عزة (بشيء من الغضب): لأ أرجوك ماتقوليش السذاجة. أنا مش ساذجة، أنا فاهمة كويس.

بسيسة: وأنا يعني اللي مش فاهمة؟ أنا أكبر منك وعندي خبرة أكثر منك.
عزة: صحيح حضرتك أستاذتي، لكن أنا برضه بافهم وعندي عقلي، وكمان مش
عاوزين تشاؤم زيادة عن اللزوم، التشاؤم ده بيضعف، عاوزين نشجّع بعض لغاية
الأزمة ما تمر، وضروري حتمّر، وضروري حانخرج من هنا، طبعا حانخرج من هنا، أمال
يعني حانموت هنا؟

لبيبة (في ضعفٍ كاملٍ وانهيّار): إن كان عليّ أنا خلاص حاسّة إنني هاموت هنا
(تسكت لحظة وهي تنظر أمامها شاردة).

(الجميع في وجوم، صامتات.)

(يُسمَع صوت في الفناء الخارجي يُشبه صراخ النسوة والولولة على ميت.)

(اعتدال وسالمة وهادية ومديحة يُسرعن إلى الباب وينظرن خلال القضبان. يرى
في الفناء الخارجي بعض مسجونات يجرين ناحية الصوت. زوبة تجري معهن.)

زوبة (وهي في الفناء الخارجي): واحدة ماتت، واحدة ماتت في عنبر القتالات.

(اعتدال وسالمة وهادية ومديحة يتركن الباب ويجلسن في وجوم وصمت.)

هادية (بصوت حزين): ربنا ريحها من عذاب السجن.

اعتدال (بحزن): أيوه، ربنا ريحها.

هادية: ربنا تاب عليها من السجن، وأهي خرجت أهي.

اعتدال: خرجت من غير تصريح من الأمور.

(مديحة تضحك فجأة. سالمة تضحك أيضًا.)

مديحة: ولا أوامر عليا!

(سالمة تنهض وتسير وهي تقلد مشية المدير العام المتكبرة وتحرك يدها كأن
معها عصا.)

سالمة: ولا قرار من فوق.

(سالمة ترفع يديها إلى فوق وتقلد حركة المدير المتكبرة وتشير بيدها دون قصد منها إلى الصورة العلوية.)

اعتدال: يا بختها، عُقبالي يا ربّ ما تخرّجني من هنا.
مديحة: إن شاء الله حُتُرجي يا اعتدال، أول واحدة فينا حتخرج هي اعتدال.
(اعتدال يبدو عليها السرور، تكاد تقفز فجأة من السرور.)

اعتدال: والنبي، يا ريت، من بُقك لباب السما.
(سالمة واقفة عند الباب، تضع قدمها على القضبان وتُخرج رأسها من بين القضبان كأنها تلعب وتقفز.)

سالمة: أنا كمان حاخرج مع اعتدال، وأنا وهي أول ناس حنُخرج.
(تقفز على قضبان الباب، شعرها طويل يتناثر حول رأسها.)

(الأخريات جالسات بعيدات عن الباب فوق مراتبهن في أماكن المعتادة. سميرة في ركنها البعيد جالسة تقرأ القرآن، ورشيدة أيضاً، ونفيسة وقد انضمت إليها الآن اعتدال، هادية وحدها تجلس على بُعد غير قليل منهن تقرأ القرآن.)

(سالمة لا تزال في حالة من المرح الطفولي تلعب أمام الباب وتحرك ذراعيها وساقها، كأنها تقوم ببعض الحركات الرياضية الخفيفة.)
(تقع على الأرض وتضحك بصوت عال.)

(سميرة ترفع رأسها فجأة من فوق المصحف. تنظر إلى سالمة في غضب.)

سميرة (بغضب): انت مش عارفة إن الضحك بصوت عالي واحنا بنقرأ القرآن حرام؟ وعمالة تتنططي زي الأطفال وانت طويلة طول الباب؟ وواقفة كده قصاد الباب وشعرك عريان!

سألة: وهو فيه رجالة في الحوش؟ الحوش فاضي مافيهوش رجالة، لا مدير ولا مأمور، ولا ضابط المباحث، ولا حتى الواد محمد الجدع الي بيثيل الزبالة.
سميرة (في دهشة): هو الجدع الي بيثيل الزبالة اسمه محمد.
سألة: أيوه اسمه محمد، ماله اسمه كمان؟ اسمه على اسم النبي.
سميرة: أول مرة اسمع إن اسمه محمد.
سألة: لأ، اسمه محمد فيها حاجة دي؟
سميرة (في غضب): أيوة فيها حاجة، إنت عرفت اسمه منين؟ عرفت اسمه ازأي؟
 احنا كلنا معاكي هنا في العنبر ماحدث عرف اسمه. حدّ يا جماعة فيكم عرف ان الجدع اسمه محمد؟

(الجميع صامتات.)

رشيدة: وحانعرف اسمه منين؟ هو احنا بنكلّم رجالة؟
سألة (في غضب): ويعني أنا الي بكلم رجالة؟ ده أنا كنت واقفة في الحوش وهو كان بيكلم البت صباح.

اعتدال: صباح مين فيهم؟ الحرامية ولّا القتالة؟
سألة: لا دي ولا دي، صباح المتسوّلة الشحاتة. كان واقف بيكلّمها وسمعتها بتقوله يا محمد. سمعتها بتقوله يا محمد، كفرت يعني لما سمعتها بتقوله يا محمد؟ كفرت ولّا كفرت؟ أسدّ وداني ولّا أسدّ وداني.
سميرة: لأ ماتسدّيش ودانك، ماحدثش قالك سدّي ودانك، لكن تقفي في الحوش ليه وفيه راجل في الحوش؟

سألة: ده كان في الحوش الكبير الي برّه، وأنا في الحوش بتاعنا، والباب الحديد مقفول.

رشيدة (في غضب): وهو الباب مسدود يا بت، ماهو يقدر يشوفك وانت واقفة في الحوش.

سألة: ده كان بعيد عنّي خالص، مش مُمكن يشوفني ولا أشوفه، وضهره كمان مش وشّه هو الي كان ناحيتنا.

رشيدة (في سخرية): وشفتي ضهره ازاي لما هو بعيد عنك خالص ومش ممكن يشوفك ولا تشوفيه؟

نفيسة: وإذا كان ضهره هو اللي ناحيتنا ما هو يقدر يدور ويبص عليكي.

رشيدة: طبعا يقدر يدور ويبص. كل الرجالة اللي بتمر في الحوش بتمر علينا.

نفيسة: مالهمش شغلة غير البص علينا.

سالة: هو فيه رجالة بتمر في الحوش يا ناس؟! ده السجن كله حريم، وما فيش راجل بيمشي.

رشيدة (في سخرية): أمال الجدع اللي بيثيل الزبالة ده اللي اسمه محمد، ده مش راجل ولأ مش راجل؟

سالة: طبعا راجل، لكن كل أربعة أيام لما يمر في الحوش مرة واحدة.

رشيدة (في سخرية): كل أربعة أيام؟ واش عرفك إنهم أربعة أيام، لازم قاعدة تعدّي الأيام يا بت.

سالة (في ألم): أيام إيه اللي حاعدّها يا رشيدة، أنا قلت أربعة أيام، يمكن خمسة يمكن ستة، يمكن عشرة، أنا لا باعد ولا باحسب، قصدي أقول إنه كل حين وحين لما حد يشوفه في الحوش.

سميرة: مش أحسن لك يا سالة بدل الكلام الفارغ ده تقعدني وتقريك آيتين قرآن، جايز ينفعوكي في الآخرة وربنا يتوب عليكي.

(سالة تنهض وتجلس إلى جوار هادية وتنظر معها في المصحف.)

لبيبة (تهمس في أذن بسيمة): امتي ربنا يتوب علينا احنا من الهم اللي احنا فيه ده! **بسيمة (في أسى تُشعل سيجارة):** والله باين إنه مش هایتوب علينا. المسألة طوّلت قوي، وأنا خلاص زهقت وتعبت.

عزة: أنا لسه عندي أمل في الناس اللي برّه، مش ممكن ينسوننا بالشكل ده، والكابوس لازم ينزاح.

مديحة: تعالوا نعمل حاجة.

لبيبة: نعمل إيه؟ لا قلم نكتب ولا كتاب نقرأ. مافيش في العنبر غير كتاب واحد، القرآن.

مديحة: تعالوا نقرأ قرآن.

بسيمة: اقري انت، أنا شخصياً مش عاوزة اقرا حاجة.

عزة: طب كلمينا يا أستاذة بسيمة في أي موضوع.

بسيمة: وكمان مش عاوزة اتكلم؛ أنا تعبت من الكلام والمحاضرات. حاجة واحدة أنا عاوزاها، وهي إني أنام. أحسن حاجة في السجن النوم.

(ترقد بسيمة على مرتبتها وهي تدخن. تواصل كلامها):

بسيمة (شاردة): قبل ما يمسوني هربت كام يوم. ما تتصوروش تعبت أد إيه، ورُحت وسلّمت نفسي. أنا اللي سلمتهم نفسي، وبقيت استعجلهم عشان يجيبوني السجن، وقلت لنفسي يا سلام أول ما أحط راسي على المرتبة حانام نوم، ولا حافكر في حاجة، ولا حاكون مسئولة عن حاجة خالص، حتى نفسي مش مسئولة عنها.

عزة: أنا كان مُممكن أهرب خالص ولا يعرفوش طريقي خالص، لكن قلت: واهرب ليه هو أنا عملت إيه؟ أنا قلت رأيي ورأيي هو كده، واللي يعملوه يعملوه. خدوا منا كل حاجة، خدوا شبابنا وطفولتنا، خدوا وظائفنا وفلوسنا، خدوا كل حاجة فينا ومافضلش غير إن احنا نقول رأينا. هو مش عاوزنا نقول رأينا كمان؟ ده إيه ده! ده ولا ربنا!

مديحة (في أسي): صحيح والله ولا ربنا!

لبيبة (في غضب): أكثر من ربنا، ربنا مش ممكن يظلم.

(لبيبة تُمسك رأسها بيديها وتُطرق إلى الأرض.)

(صمتٌ ووجومٌ يُخيم على الجميع.)

(سميرة تُسبح وتهمس لنفسها وهي تُحرّك السُّبحة في يديها.)

سميرة: الله فوق الجميع، الله فوق الجميع، الله فوق الجميع.

الفصل الأول

(وفجأةً تنتفض سميرة وهي تصرخ.)

(تهبُّ اعتدال مفزوعةً وهي تصيح.)

مديحة (تصيح): إيه! فيه إيه! صرصار والأا راجل؟

(ظلام.)

(انتهى الفصل الأول.)

الفصل الثاني

(ظلامٌ كامل، صمْتُ كامل.)

(يُسْمَعُ صوت دَقَّاتٍ عَنيفَةٍ على بابٍ خشبي.)

(الدَقَّاتُ تزدادُ عُنْفًا حتى يَنْكسرِ الباب.)

(صوتُ وقعِ أحذيةٍ جلدِيَّةٍ سميكةٍ تجري على الأرضِ بسرعة.)

(صوتُ أنفاسٍ تلهُتُ بسرعةٍ جدًّا.)

(صوتُ امرأةٍ حادَّةٍ وقوي): لأ.

(ظلامٌ وصمْتُ كامل.)

(صوتُ صرخةٍ طفلٍ مولودٍ عمره أيام قليلة.)

(ظلامٌ وصمْتُ كامل.)

(صوتُ الأحذيةِ الثقيلةِ على الأرضِ لكنَّها لم تُعدْ سريعة.)

(وقع الأقدامِ بطيء. يضعُفُ ويضعُفُ الصوت حتى ينعِدِمُ تمامًا.)

(ظلامٌ وصمْتُ كامل.)

(صوتُ مفتاحٍ يَدُورُ في البابِ ثلاثَ دوراتٍ، صريرِ بابٍ حديديٍّ ينفِتح.)

(ظلامٌ وصمتٌ كامل.)

(وقع أقدامٌ ثقيلة على الأرض بطيئة.)

(ظلامٌ وصمتٌ كامل.)

(صوت مفتاح يدور في الباب ثلاثَ دورات. صرير بابٍ حديدي ينفتح.)

(ظلامٌ وصمتٌ كامل.)

(صوت المفتاح يدور في الباب ثلاثَ دورات، صرير باب حديدي ينغلق.)

(ظلامٌ وصمتٌ كامل.)

(وقع أقدامٌ ثقيلة على الأرض وبطيئة.)

(ظلامٌ وصمتٌ كامل.)

(صوت مفتاح يدور في الباب ثلاثَ دورات. صرير باب حديديّ ينغلق.)

(وقع أقدامٌ ثقيلة على الأرض وبطيئة. يخفُّ الصوت تدريجياً حتى ينعدم تماماً.)

(ظلامٌ وصمتٌ كامل.)

(ينقشع الظلام بالتدرّج عن نفس المنظر في الفصل الأول.)

(العنبر في السجن.)

(واقفة عند باب العنبر الحديدي المغلق سجينٌ جديدة هي عليّة إبراهيم شوقي. طويلة القامة، شابّة ممشوقة يبدو عليها الغضب. شعرها غزير قصير. ترتدي ثوباً أبيض بسيطاً وعادياً. في يدها منديل يدٍ أبيض. تتأمل العنبر بعينيهما الحادّتين النفاذتين.)

(حبل الغسيل لا زال يقسم العنبر. وفي الجزء الأيمن ترقد الأخوات المحجّبات. وفي الجزء الأيسر ترقد المجموعة الأخرى.)

(الجميع نائمات.)

سالمة تنهض وترى عليّة. تقترب منها في دهشة.)

سالمة: مين انت؟

عليّة: أنا عليّة إبراهيم شوقي، جيت دلوقت.

سالمة: جابوكي مين؟

عليّة: من بيتي. وانت جابوكي مين؟

سالمة: من الشارع. كنت ماشية في الشارع رايحة أزور أمي مسكوني. وأنت خدوكي

من بيتك؟ دخلوا بيتك ازأي؟

عليّة: كسروا الباب ودخلوا. الأول خبّطوا، وفضلوا يخبّطوا، سببتهم يخبّطوا.

سالمة: معقول حدّ يفتح لهم الباب.

عليّة: وماكانش معاهم أمر رسمي من النيابة ولا من المحكمة ولا من القضاء، ولا

قانون ولا أي حاجة.

سالمة: هم بيقولوا حاجة خالص، ده مسكوني كده على طول من غير ما اعمل

حاجة، وأنا ماشية في الشارع. وانت ماكانش معاكي حدّ في البيت؟ ماكانش فيه جيران،

ناس كده تزعق والأ تصوّت؟

يا ريتهم كانوا جُم خادوني من البيت؛ كانت الحارة كلها اتلمّت عليهم وضربوهم لما

موتوهم. إلا خلّوني ماشية في الشارع ومسكوني. وتعرفني لو قالولي انهم واخديني السجن،

كنت صوّت وليّت عليهم الشارع، إلا كذبوا عليّ. تعرفني الضابط قاليّ إيه؟

عليّة: قالك إيه؟

سالمة (تبتسم في سذاجة الأطفال): قال: انت رايحة فين يا شاطرة؟ قلت له: رايحة

لأمي. قال: طيب تعالي معانا واحنا نودّيك لأمك، بس الأول حناخد منك كلمتين. قلت له:

كلمتين إيه؟ قالي: كلمتين بس. وراح مدخّلي العربية. تعرفني لولا كده والله والله ما كانوا

يقدرنا ياخادوني أبداً؛ ده أنا ألمّ عليهم الناس، والناس كثير قوي، الشارع مليون ناس،

وحارتنا مليانة ناس.

(سميرة ترفع رأسها وهي راقدة.)

سميرة (في تشكُّك): واقفة تكلمني مين يا سالمة؟
سالمة: دي واحدة مسجونة جديدة.

(سميرة تنهض وتسير نحو عليّة. عليّة لا تزال واقفة عند الباب.)

سميرة: انت مُسلمة ولأ مسيحية؟
عليّة: سؤال غريب قوي. ماحدش سألني السؤال ده من ثلاثين سنة. كان عمري ست سبع سنين، والناظرة سألتني السؤال ده، ومعرفتش أجاب عليه.
سميرة (في ضيق): لازم مسيحية.
عليّة: لأ.

سميرة: أمال إيه؟ مُسلمة؟

عليّة: لأ.

سميرة (في فرح): يا مصيبتني!

(لبيبة تنهض من نومها مفزوعة.)

لبيبة (في غضب): مش معقول، كل يوم نصحي على الزعيق ده!

(عزة تنهض هي الأخرى.)

عزة: إيه فيه إيه، صرصار والأ راجل المرّة دي.

سميرة: لأ مش راجل، ده لو كان راجل كان أرحم.

جت لنا مسجونة جديدة، كافرة من جميعه والله الحمد!

(عزة ترى عليّة.)

عزة (في فرح): عليّة! مش معقول!

(تنهض عزة وتجري وتُعانق عليّة.)

(بسيمة تنهض وتجلس في مكانها.)

(الأخريات ينهضن.)

الفصل الثاني

عزّة: أنا مبسوطة قوي إنك جيتي معانا.
بسيمه: مبسوطة إيه يا شيخة، حد يتبسّط لما حد يدخل السجن؟ والله أنا زعلت لما شفّتها.

عزّة: بصراحة أنا ما زعلتتش، ماقدرش أكذب. عليه صاحبتني وأنا باحبّها. يا ريت كل اللي باحبّهم يكونوا معايا هنا.

بسيمه: دي أنانية منك يا عزّة.

مديحة: فعلاً أنانيّة.

عزّة: لأ مش أنانية، دي صراحة.

عليّة: عزّة صريحة، وأنا باحبّ الصراحة.

سالمه: أنا الست عليّة عاجباني وشكلها كده مش لايق على السجن، بس فيه حاجة واحدة مزعلاني منها.

عليّة: إيه هي؟

(سالمه تهمس في أذن عليّة، عليّة تضحك.)

عليّة: أبويا مُسلم وجدّي أبو أبويا مسيحي، وأمّي مُسلمة وجدّها أبو أبوها قبّطي، يبقى أنا إيه؟

سالمه: تبقي مُسلمة ما دام أبوكي مُسلم.

عليّة: خلاص يا ستّي ماتزعليش بقّه.

سالمه: خلاص مش زعلانة، أصلك كده عاجباني قوي، وكنت مستخسراكي، والحمد لله طلعت مسلمة.

(سالمه تسير وتدخل دّورة المياه.)

(عليّة تجلس إلى جوار عزّة.)

عليّة: إيه حكاية مُسلمة ومسيحية دي؟

عزّة: اسكتي احنا هنا مش في سجن، احنا في مُرستان.

(عزّة تنظر إلى عليّة. عليّة يبدو عليها الألم والحزن.)

عزّة: وانتِ يا عليّة، عمّلوا فيكي إليه؟ وعملتِ إليه في ابنك؟ ده انت لسه والدة قُريب.
هو عمره كام دلوقتِ؟

عليّة (في ألم): بُكرة يبقى أربعة وأربعين يوم.
عزّة: يا خَبر! ده لسه صغِير قوي، وسيبتيه مع حد؟
عليّة: ليّ جارة كويّسة أخذته عندها مع ولادها لغاية مارجع.
(عزّة تصمّت في ألم.)

عليّة: وانتِ عملتِ إليه مع بنتك؟
عزّة: بنتي مهما كانت كبيرة وتعرف تاخذ بالها من نفسها.

(مديحة تُولّع الوابور لتعمل شيئاً. نجاة تُساعدُها. لبيبة تنهض وتسير ناحية الباب. سميرة والأخوات المُسلمات يُصلّين ويقرآن القرآن. بسيمة فتحت حقيبتها تُخرج بعض الفوط والصابون. تُخرج فوطاً وصابونة. تظهر الشاويشة فهيمة في الفناء الخارجي.)

(لبيبة تراها وهي واقفة عند الباب.)

لبيبة: الشاويشة جايّة.

(بسيمة تُغلق الحقيبة بسرعة.)

بسيمة: الشاويشة جاية، اللي معاها حاجة تشيلها.

(تفتح الشاويشة باب الحوش. يُسمَع صوت دورات المفتاح الثلاث. تدخُل إلى الحوش، ثم تفتح باب العنبر، تُعلن وهي خارجة عن قدوم ضابط المباحث.)

الشاويشة: ضابط المباحث جاي لكم كمان شوية. خلّوا بالكم جايز يكون فيه تفتيش. خبّوا الوابور، واللي معاها حاجة تشيلها. أنا النهاردة تعبانة وسايبة الرجل عيَّان في البيت. دماغي وجّع عاوزه وجّع دماغ (تترك باب العنبر مفتوحاً، ثم تُغلق باب الحوش وتخرج.)

الفصل الثاني

عزّة (في ضيق): أهو كل يوم من ده. عَكَنَنَة وَقَرَف وَوَجَع دماغ. هو الراجل ده مالوش شُغلة غيرنا والأإيه؟

(عليّة صامئة شاردة.)

بسيمية: أنا مش شايفة معاكي شنطة ولا حاجة. إنت جايّة من غير هدموم.
عليّة: هدموم إيه؟ ده كَسَرُوا الباب والضابط كذب وقالي ساعتين اتنين وترجعي البيت.

بسيمية تُغلق حقيبتها وتضعها في الرُّكن. تحمِل فوطّة وصابونة وتدخُل دورة
المياه.)

عزّة تنهض. تفتح حقيبة صغيرة تُخرج منها جلبابًا وفوطة. تمزّق الفوطة
نصفين.)

عزّة: حُدي يا عليّة. أنا عندي جلبيتين، إنت واحدة وأنا واحدة، وعندي فوطة واحدة،
إنت نُص وأنا نص. أنا كمان كذبوا عليّ لكن أُختي بَعَت ليّ شوية حاجات، ويمكن تبعت
لي تاني. الهدوم بس هي المسموح دخولها لنا وأي حاجة تانية لأ، والأكل ممنوع من برة،
عندنا أكل السجن وبس. حاجة تقرف!

(مديحة تُناول عليّة كوب شاي.)

عليّة (تبتسم): على العموم كويس إن فيه شاي، ده أنا كنت مُتصوّرة السجن
مافهوش حاجة خالص ولا حتى شاي.

(تخرج بسيمية من دورة المياه، تُشعل سيجارة.)

عزّة: شاي وسجاير.

(تسكت عزّة لحظة.)

عزة: شاي وسجاير وبرشام وماكس واسفكس!

(عزّة تضحك. عليّة تُشاركها الضحك.)

عزّة: دي حاجات لزوم عنبر الدّعارة.

عليّة: ويا ترى فيه دورة مية هنا والأا جردل البول؟

بسيمة: هي اسمها دورة الميّه، لكن هي إيه؟ مش مُهم!

عليّة: المُهم فيها ميّه أغسل وشي أو آخذ دش.

بسيمة: ميه باردة زيّ التلج.

(تنهض عليّة ومعها الفوطة والجلباب وتسير نحو دورة المياه.)

عليّة: باردة باردة. أنا واحدة على الميه الباردة. كويس إن فيه ميه. أنا كنت مُتصوّرة

السجن مافيهوش ميّه.

(تدخل إلى دورة المياه وتُغلق الباب خلفها.)

(تظهر الشاويشة في الفناء الخارجي وهي تسير، ومن خلفها رجل. تلمحها

نفيسة وهي جالسة تقرأ القرآن قُرب باب العنبر.)

نفيسة (تنهض بسرعة وهي تصرخ): راجل!

(الأخوات المُسلمات، كل واحدة منهنّ تجري وترتدي نقابها وعباءتها.)

(سالمة تلفُّ طرحتها بسرعة حول رأسها وتنظر من خلال قضبان الباب.

الشاويشة لا تزال تفتح باب الحوش ومن خلفها الرجل.)

سالمة: ده ضابط المباحث!

(سالمة تُردّد وهي تضحك في سخرية.)

الفصل الثاني

سالمة: ده ضابط المباحث مش راجل يا جماعة!

(سميرة تنظر إليها في غضبٍ وتشكُّك.)

سميرة: طبعًا، مبسوطه، مبسوطه قوي، جاي ياخذ منك المعلومات.

سالمة (في دهشة): معلومات إيه؟

سميرة: المعلومات اللي بتجمعها مننا.

سالمة (في ضيقٍ وألم): أنا مش فاهمة، إنت بتقولي إيه.

سميرة (في سخرية): هو انتي بتفهمني حاجة يا مسكينة!

(ضابط المباحث ينتظر لحظةً في الحوش. يرتدي نفس النظارة السوداء.)

الشاويشة: جاهزين يا جماعة، لابسين يا بنات يا مُنقَّبات، ضابط المباحث موجود.

(تُطلُّ الشاويشة من الباب. الجميع جاهزات مُرتديات النقاب والحجاب والعباءات. الأخريات جالسات في أماكنهن المعتادة. مديحة أخفتِ الواوبر وأكواب الشاي. بسيمة أشعلت سيجارة. عزة وليبية ونجاة جالسات إلى جوار بعض. عليَّة لا تزال في دورة المياه، لم تخرُج بعد.)

الشاويشة: اتفضل يا بيه.

(يدخلُ ضابط المباحث. ينظر إلى كلِّ واحدةٍ ببرودٍ ودقَّة. يدور على كلِّ واحدة فيهن وينظر إليها.)

ضابط المباحث: أمَّال فين الستُّ عليَّة إبراهيم شوقي؟

(ولا واحدة تردُّ عليه.)

ضابط المباحث (ينادي بصوتٍ عالٍ): عليَّة إبراهيم شوقي.

(تخرج عليَّة من دورة المياه، ترتدي الحجاب الطويل الذي أخذته من عرَّة. على كتفها نصف الفوطة. شعرها مبلول وقد أخذت دُشًا باردًا. قامتها طويلة ممشوقة. رأسها مرفوع يبدو عليها النشاط والقوَّة والتحدِّي.)

(تسير بخطواتٍ بطيئةٍ واثقة، وتقترب من ضابط المباحث حتى تُصبح على بُعد خطوةٍ منه. تنظر إليه نظرةً واثقةً وقوية، ثم تقول بصوتٍ هادئٍ مليءٍ بالقوة والثقة بالنفس.)

عليّة: أنا عليّة إبراهيم شوقي.

ضابط المباحث (بصوتٍ بارد فيه نوع من الأدب أو التأدّب المزيّف): مُتأسّف يا ستّ عليّة، بس أحبُّ أخذ من حضرتك شوية بيانات ناقصة.

عليّة (في اندهاش): بيانات ناقصة؟ غير معقول!

ضابط المباحث: غير معقول ليه؟

عليّة (في سخرية): عندكم أجهزة حديثة، آخر اكتشاف تكنولوجي، وخبراء من برّه. **ضابط المباحث** (في غيظ): حضرتك يعني عارفة البير وغطاه.

(عليّة تنظر حولها في العنبر ثم تنظر إليه.)

عليّة: لا عارفة البير بس! هو ده البير بصحيح، بير تحت الأرض!

ضابط المباحث: باين عليك مش مبسوطه من الجوّ هنا.

عليّة (وهي تتمشّي في العنبر وتتلفّت حولها): بالعكس، الجو هنا أحسن من الجو برّه، على الأقلّ مانشوفش جرايد ولا صور.

(في هذه اللحظة تصطدم عيناها بالصورة المعلقة العلوية.)

(تتوقف عن الكلام لحظة.)

عليّة: هي الصورة دي هنا كمان.

فوق الأرض وتحت الأرض وانا وانا؟!!

ضابط المباحث: حضرتك ساكنة فين يا ستّ عليّة؟

عليّة: في البيت اللي مسكتوني فيه.

ضابط المباحث: أه، مُتأسّف، و... و... حضرتك مُتزوّجة؟

الفصل الثاني

عليّة: لأ.

ضابط المباحث: حضرتك غير مُتزوّجة؟

عليّة: لأ.

ضابط المباحث: حضرتك أرملة؟

عليّة: لأ.

ضابط المباحث: حضرتك لامؤاخذة مُطلّقة؟

عليّة: لأ مش مُطلّقة، إنما ...

ضابط المباحث (في دهشة): إنما إيه يا فندم؟

عليّة: مُطلّقة، بكسر اللام.

الضابط: بكسر اللام! يعني إيه يا فندم؟

عليّة: يعني الفاعل مش المفعول به.

ضابط المباحث: آه، متأسّف ماكنتش عارف.

(يكتب في الورقة اللي معه.)

ضابط المباحث: الفاعل مش المفعول به. ويا ترى اسم المفعول به إيه يا فندم؟

عليّة: مش مُتذكّرة الاسم.

ضابط المباحث: آه متأسّف. و حضرتك عندك أولاد.

عليّة: لأ.

ضابط المباحث (في دهشة): أ مال مكتوب عندي إن عندك طفل عمره يبقى بكرة

أربعة وأربعين يوم بالتمام والكمال.

عليّة: ولأ عندك كل البيانات باليوم والساعة، بتسألني ليه؟

ضابط المباحث: آه، متأسّف، ويا ترى اسم ابنك إيه؟ عاوزين اسمه بالكامل، الاسم

التّلاثي.

عليّة: وعاوزين تعرفوا اسمه بالكامل ليه؟

ضابط المباحث: دي مُجرّد بيانات. خانة عندنا لازم تتملي، اسم الأب، اسم الأم، اسم

الابن، اسم الزوج، اسم الجدّ وهكذا.

عليّة (تقلّد ضابط المباحث في طريقة كلامه): آه، مُتأسّفة، ماكنتش عارفة!
الضابط: أيوه، أنا مُنتظر، الاسم إيه؟
عليّة: الاسم ده بالذات حاجة تخصّني أنا، وملكي أنا، وأنا مُمتنّعة عن الرد.
ضابط المباحث (في هدوء): مُمتنّعة دي كلمة مش باحبّ أسمعها.
عليّة: وأنا باحبّ أقولها.
ضابط المباحث: وأنا مش باحبّ أسمعها.
عليّة: وأنا باحبّ أقولها.
ضابط المباحث (في ضيق): وبعدين معاكي؟ أنا ماسك أعصابي، بعدين مش
يحصل طيب.
عليّة: ده تهديد والأ إيه؟
ضابط المباحث: مُتأسّف لا تهديد ولا حاجة، بس أنا عاوز أخلّص شُغلي وأمّشي؛
ورايا غيرك كثير.
عليّة: كثير قوي، انتو خليتو حد!
ضابط المباحث: إن كان عليّ أنا ماكنتش دخلت حدّ السجن. أنا مُجرّد واحد بيأدي
الواجب اللي عليه.
عليّة: كده؟ آه! مُتأسّفة.
ضابط المباحث (في ضيق): إنت بتعامليني كأني أنا اللي دخلتك السجن، كأن السجن
ده بتاعي!
عليّة (في دهشة): أُمّال السجن ده بتاع مين؟
ضابط المباحث (في غضب وزهق): معرفش بتاع مين! بتاع ربنا!
عليّة (في برود): آه، بتاع ربنا، ماكنتش عارفة إنه بتاع ربنا، هو ربنا عنده سجون؟
ضابط المباحث (في ضيق): أيوه ربنا عنده سجون، خلصيني بقّه!
(سميرة تنتفض من جلستها في غضبٍ وتصيح بصوتٍ حادّ عال):
سميرة (في غضب، تحرّك يديها في غضبٍ وعصبية): استغفر الله العظيم من كل
ذنبٍ عظيم. أراي تقول يا أستاذ إن ربنا عنده سجون؟ السجن دي بتاعة الظالم،
السجون بتاعة الظالم، الظالم، مش بتاعة ربنا!

الفصل الثاني

(تشوّح ببيديها في غضب. ودون قصد تُشير يدها وهي تتحرّك بعصبيةٍ إلى الصورة العلوية.)

سميرة (تردّد): الظالم، الظالم، الظالم.

(تنتاب سميرة حالةً عصبيةً هستيرية وهي تردّد كلمة الظالم ثم تبكي وتتشنّج بعصبية، الأخوات يُسرعن إليها.)

عزة (في غضب): حضرتك كل يوم تيجي تتلف أعصابنا كده، كفاية بقّه يا شيخ. **ضابط المباحث:** أنا قلت حاجة.

رشيدة (في غضب): أيوه قلت، بقّه هو ربنا عنده سجون؟ بقّه يصحّ إن واحد زيك يتكلم عن ربنا بالشكل ده؟ يا أخي استغفر ربنا!

ضابط المباحث (في ارتباك): هو أنا قلت حاجة على ربنا. أستغفر الله العظيم، إنتم حتكفّروا الواحد وهو مش دريان والآ إيه؟ هو أنا قلت حاجة على ربنا أستغفر الله العظيم. عاوزين تكفّروني على آخر الزمن؟ أنا عارف ربنا كويس، كويس قوي، أكثر منكم. أنا مسلم زيكم وأكثر. الإسلام مش هدم الواحد يلبسها أو ما يلبسهاش. الإسلام إيمان في القلب، وإيمان بالعقل. ثم أنا ماقلتش حاجة تمسّ ربنا خالص. بالعكس، أنا قلت إن ربنا يملك كل حاجة حتى حتّة الأرض اللي أنا واقف عليها دلوقت. ربنا سبحانه وتعالى هو الله، بيملك السماوات كلها والأرض وما عليها، والسجون مش جزء من الأرض وما عليها والآ عاوزين تقولوا إن السجون خارج ملكوت السماوات والأرض؟

عزة (في غضب): والله يا أستاذ محمد إحنا مش عاوزين حاجة خالص. عاوزين إن حضرتك تسيبنا في حالنا، كفاية اللي احنا فيه (في غضب) مش كفاية السجن، كل يوم بيانات بيانات، كفاية بقّه طلّعت روحنا.

ضابط المباحث: أنا اللي طلّعت رُوحكم والآ هي اللي طلّعت روحي، لو قالت الاسم كُنّا خلصنا من زمان. فيه إيه بس الاسم؟

عليّة (في غضب): وعاوزين الاسم ليه؟ عاوزين إيه من ابني تاني؟ طفل رضيع مولود انتزعوه من أمه! عاوزين إيه تاني؟ (في غضب) عاوزين إيه تاني؟!

(صمّت يُخيم على العنبر كله. سكونٌ ووجومٌ يخيم على الجميع، حتى سميرة أصبحت جالسةً هادئةً شاردة.)

ضابط المباحث (في اعتذارٍ وألم): مش عارف أقول إيه، أنا مُتأسّف برضه، لكن الخانة دي لازم تتملي، ماقدّرش ما ملهّاش وإلا أبقى مُقصرّ في شُغلي واتحاسب. والله العظيم أتحاسب، وممكن بيتي يتخرب فيها.

(يسكت لحظةً بشيءٍ من المسكنة.)

يعني فكركم أنا عاجباني الشغلانة دي. لولا لُقمة العيش، أظن ما فيش واحدة فيكم ترضى إنها تقطّع عيش واحد زيّ مالوش في الطور ولا في الطحين. أنا مجرد واحد بينفد أوامر، إعمل كده حاضر، ماتعملش كده حاضر. هات البيانات دي أجيب البيانات دي، بلاش البيانات دي يبقى بلاش البيانات دي، اسمح لهم بدخول الأكل، نسمح بدخول الأكل، ممنوع الأكل، يبقى ممنوع الأكل، اسمح لهم بزيارات الأهل، نسمح بزيارات الأهل، ممنوع الأهل، يبقى ممنوع الأهل، فترة تكدير، حاضر فترة تكدير، شوية عكننة، حاضر شوية عكننة. هي الحكاية كده بمنتهى الصراحة. وما فيش داعي تزعلوني ولا أزعلكم. وأرجوكم خلوا الفترة دي اللي احنا قعدناها سوا مع بعض تفوت على خير لغاية ما ربنا يفرج عنكم ويفرج عني أنا كمان؛ ما هو أنا محبوس برضه زيكم.

سالمة (تنهض بسرعةٍ وتقترب منه في سذاجة): وانت محبوس في إيه؟ ومين اللي حابسك؟

(صمت. وبعد الارتباك والحرج، الضابط يرفع يديه إلى فوق.)

الضابط: ربنا.

(عن دون قصدٍ تُشير يده إلى الصورة العلوية المُعلّقة.)

الضابط (وقد تدارك الخطأ): آه مُتأسّف، أحسن الأخت سميرة تكفّرني تاني، طبعا ربنا مش بيحبس حد، اللي حابسني هو اللي حابسكم.

سالمة (تقترب منه أكثر في سذاجة): وهو مين اللي حابسنا؟

الضابط: اقعدني يا سالمة كفاية أسئلة، خلي اليوم يفوت على خير.

(يتّجه ناحية عليّة.)

الفصل الثاني

الضابط: أرجو إنني أكون وضحّ نفسي كويس، نخلّص بقّه يا ستّ عليّة؟
عليّة: تخلّص إيه؟

الضابط: البيانات، ناقص بس الاسم، خانة بس الي ناقصة وبعد كده أقسم إنكم ما تشوفوا وشي تاني هنا.

(عليّة صامته لا تردّ عليه).

الضابط: لسة مُمتنّعة؟

(عليّة صامته لا ترد).

الضابط: أقسم لك إن المسألة مُجرّد استكمال بيانات. احنا مش عاوزين حاجة من ابنك خالص. إحنا مالنا ومال الأولاد؟ مالناش دعوة بحدّ من أفراد الأسرة أبدًا، وأفراد الأسرة مالهم؟ كل واحد مسئول عن نفسه، والزوجة مسئولة عن نفسها والابن مسئول عن نفسه، احنا لا يُمكن نمس الأولاد، لا يمكن، وخصوصًا الأطفال، ما احنا كلنا عندنا أطفال، أنا عندي طفل عنده تلت سنين، وطفل تاني اتولد من تلت أسابيع، ولغاية النهاردة ماشفته، والله ماشفته. كلموني في التليفون وماقدرتش أسيب الشغل وأروح بني سويف. يعني أنا غاوي أقعد هنا؟

عزّة: على الأقل بتقدّر ترفع التليفون وتسال، لكن احنا الي مش عارفين حاجة خالص عن أي حاجة خالص. وبرضه أنت مطمئن شوية؛ مراتك في البيت وواحدة بالها من ولادك، لكن احنا ولادنا لوحدهم خالص لا أم ... (تسكت لحظة) ولا حتى أب.

الضابط: ما هو إنتم الي عاوزين كده، عاوزين شغل، واستقلال، وسياسة (يسكت لحظة) والسياسة هي كده، مرّة في السجن، ومرّة فوق، فوق، فوق.

(يرفع يده ويشير إلى الصورة).

(سالمة تتابع يده بعينها وتتنظر إلى فوق، إلى الصورة).

سالمة (تهمس في أذن اعتدال): ياخويا هو كل حاجة فوق، فوق، فوق، دي حاجة تقلب الدماغ.

اعتدال (تلكزها في كتفها): اسكتي يا بتّ إنت مالك ومال اللي فوق وألا اللي تحت، اسكتي خالص.

ليبية (بانفعال محكوم مؤدّب): أنا ماليش دعوة يا محمد بيه بالسياسة خالص، أنا موظفة عادية، قاعدة في مكتبي، سألوني رأيي، قلت رأيي، آدي كل الحكاية، أنا ماعملتش حاجة.

بسيمة (في انفعال محكوم أيضًا): ويعني احنا يا ليبية اللي عملنا حاجة؟ احنا ناس قلنا رأينا بصراحة، قالوا لنا فيه ديمقراطية، مارسنا الديمقراطية. وآدي النتيجة اللي حضرتك شايفها.

مديحة (في انفعال محكوم أيضًا): يا محمد بيه إحنا مقدّرين الكلام الإنساني اللي حضرتك قلته دلوقت، لكن بصراحة المسألة طالت ومش عارفين لها نهاية.
الضابط (وقد بدأ عليه الزهق): أنا كمان مش عارف والله، احنا مُنتظرين الأوامر الجديدة.

عزّة: فيه أوامر جديدة تاني، مش كفاية السجن، ومش كفاية رقدونا من وظائفنا، أوامر إيه تاني؟ هو فاضل حاجة ماعملوهاش؟!

(ينظر في الساعة، يتّجه إلى عليّة.)

الضابط: أظن بعد كل ده مش ممكن تكوني لسّة مُمتنعة.

(عليّة لا تردّ عليه.)

الضابط: يا ستّ عليّة، ردّي عليّ أرجوكي.

(عليّة لا ترد.)

الضابط (بغضبٍ بسيط): لسّة مُمتنعة؟

(عليّة لا ترد.)

(يزداد غضبُ الضابط بالتدريج وهو يسألها): مُمتنعة؟

الضابط (في غضبٍ شديد وقد كَشَفَ عن قسوةٍ مُفاجئةٍ شديدة): مافيش حاجة عندنا اسمها مُمتنعة! لازم تقولي! بالذوق تقولي! بالعافية تقولي! مافيش حاجة عندنا اسمها مُمتنعة عندنا أبدأ، أبدأ، أبدأ، ماحصلش قبل كده إن حدِّ امتنع، ماحصلش!

(ينظر في الساعة ويَتَّجِه نحو الباب.)

الضابط (مُحذراً عليّة): وفكري كويس قوي يا ستَّ عليّة. بقول فكري كويس قوي؛ مافيش داعي للمشاكل، ما تضطرنيش إنِّي أتَّخذ إجراءات مش كويسة. دي من حقِّي، من حقِّي إنِّي أخليكي تتكلمي. وإذا ما تكلمتِش من حقِّي إنِّي استخدم كل وسائل أخرى، ومافيش داعي أقول الوسائل الأخرى، كلكم عارفينها، سلامو عليكم.

(يخرج ضابط المباحث مُسرِّعاً، وتخرُج من خلفه الشاويشة تهرول في اضطراب.
تُغلق وراءه باب الحوش ثم تعود إلى العنبر.)

الشاويشة: يا مصيبتِي! ليه بس يا ستَّ عليّة تعمي في كده! ده راجل شرَّاني، وإنتم مش عارفينه، أنا اللي عارفاه، ده امبارح كان واقف من بعيد بيراقب البت زوبه وهي خارجه من عندكم. مسكها وقالي فتَّشها. خلاني قَلَعْتها مَلَط وفتَّشها. خلاني حتى أفْتِش جسمها، لا مؤاخذه من جوه، والحمد لله ما لِقْتش حاجة معاها، عارفين لو لَقِيت معاها، كانت راحت في داهية، وأنا رُحت في داهية، وأنتم كمان رحتم في داهية. الحمد لله ماكانش معاها حاجة. إوعوا تَدُوها جواب والأ ورقة تَهْرَبُها برّه، إوعوا والنبي أحسن تودوني في داهية، أنا أول واحدة حتروح في داهية. أنا اللي قافلة عليكم ومسئولة عنكم. ولو لقوا حاجة حيسألوني أنا ودول ناس مافيش في قلوبهم رحمة.

(صمتٌ ووجومٌ يُخَيِّم على الجميع حتى الشاويشة.)

الشاويشة (تُخاطب عليّة): بكرة يقولي وديها التأديب. حاجي أخذك على التأديب على طول، وان قالي اضربها حاضرك، وإذا أنا مقدرتِش عليكي حاجيبوا لك رجالة من سجن الرجال، أجمد منِّي، يضربوكي، حُطِّي في بالك إن السجن سجن، ومافيش يامه ارحميني. الصراحة كويسة، وأنا صريحة معاكم. (تقترب من عليّة وتهمس بصوت عال) ده أنا معاكم، لكن لازم قدامهم أعمل إنِّي أنا مش معاكم. أنا مش عاوزة أقطع

عيشي، والأولاد ياكلوا منين بس يا ربي؟ ياكلوا منين الولاد والراجل عيان وقاعد في البيت مايبشتغلش؟

الشاويشة (وهي تمسح دموعها): مرّة خلوني أضرب واحدة غلبانة، غلبانة قوي، أغلب من صباح الشحاة اللي بتشوفوها كل يوم دي، وضربتها، وضربتها، كنت عارفة إنها مظلومة لكن ضربتها، أعمل إيه، ضربتها وقلت يا رب سامحني، وروّحت البيت عيانة، رقدت فيها أسبوع (تمسح دموعها وتسكت) هو احنا مش بني آدمين؟ ده إحنا بني آدمين زيكم والله، ويمكن أكثر كمان.

(تمسح دموعها وتسكت وهي واقفة أمامهم، ثم تستدير وتخرج إلى الحوش. تغلق وراءها باب الحوش بالمفتاح. يُسمع صوت المفتاح يدور ثلاث دوراتٍ في الباب.)

(صمت في العنبر ووجوم. بسيمة تُشعل سيجارة.)

بسيمة: أنا خايفة عليك يا عليّة؛ جايز تسببي لنفسك مشاكل بالشكل ده. ما فيش داعي تعمل معارك معاهم من الأول كده على حاجات بسيطة. المسألة مش مستاهلة. **مديحة:** فعلاً يا عليّة، خليكي «فليكسبل» شوية.

سائلة: فليكسبل يعني إيه؟

عزّة (تضحك فجأة): يعني «مرنة» بالإنجليزي.

سائلة: مرنة؟ مرنة يعني إيه؟

عزّة: يعني مرنة؛ يعني راسها مش ناشفة.

لبيبة (في غضب): عليّة طول عمرها راسها ناشفة زي الحجر، ودايمًا تجيب المشاكل لنفسها واللي معاها.

نجاهة: إنت خايفة يعملوا حاجة في ابنك؟ مش متهيألي إنهم مُمكن يعملوا حاجة في طفل عمره أيام. كفاية حرموه من أمه. مش مُمكن يعملوا حاجة أكثر من كده.

عزّة (وهي شاردة في ألم): ما فيش حاجة عندهم اسمها مش مُمكن. كل حاجة مُمكنة، وأي حاجة مُمكنة، إنت ما عندكيش فكرة يا نجاهة الناس دول شكلهم إيه وغضبهم شكله إيه، أسأليني أنا.

الفصل الثاني

نِجَاة (في دهشة): مالهم ومال الولاد الصغِيرين؟
عُرَّة: لما مايقدروش على الكبار يتشَطَّرُوا على الصغِيرين، وإذا ماقدروش علينا يقدرُوا على الأضعَف منَّا، إذا ماقدروش على زينب القَتَّالَة يضربوا زينب دِعارَة، وإذا ماقدروش على زينب دِعارَة يضربوا زينب المُتسوِّلَة، وهكذا، الدنيا ماشية.
بسِيمَة (تضحك): وإذا ماقدروش على زينب القَتَّالَة يضربوا مين؟
عُرَّة: يضربوا بنتها!

بسِيمَة: وإذا ماقدروش على عليَّة هنا يضربوا مين؟
عُرَّة: يضربوا واحدة أصغر، يضربوا نِجَاة أو اعتدال أو سالمة.
سالمة (تضرب على صدرها في فزَع): يا مصيبتني يضربوني كمان! هو أنا عملت حاجة!

(الجميع يضحكن ما عدا سميرة التي تُسَبِّح وتقرأ القرآن وهي جالسة صامتة، ثم فجأةً تنتبه لسالمة.)

سميرة (في ضيق وسخرية): لأ ماتخافيش إنت! لو ضربوا كل الناس مش حيزربوكي إنت.

(تسكت لحظة) عمرهم ما يضربوا الناس بتوعهم.
سالمة (في سذاجةٍ وسرور لم تفهم كلام سميرة): إلا الضرب، أنا أستحمل كل حاجة في الدنيا إلا الضرب، وأنا كمان مُستويَّة من الضرب، أبويا وأمِّي وجوز أمي ضربوني لما قالوا يا بس، حتى ستي العجوزة دي اللي مابتشوفش، عليها بنت الإيه، حتة قلم!

(سالمة تضحك كالأطفال.)

(جميع الأخريات يبدو عليهن الكآبة والضيقة.)

(بسِيمَة تُمسِك حقيبتها، تفتحها، وتُخرج منها بعض المأكولات.)

بسِيمَة: اعلمي لنا شاي يا مديحة.

(مديحة تنهض لتعمل الشاي، نِجَاة تنهض معها لتساعدِها.)

مديحة: حدّ عاوز شاي كمان غير الأستاذة بسيمة؟
سالمة (تجري إلى مديحة): أيوة أنا.

(بسيمة تنظر إليها بشيءٍ من الضيق.)

بسيمة: أكثر واحدة بتشرب شاي في العنبر إنّي يا سالمة.
سالمة: أصلي أنا باحبّ الشاي قوي، وحطّيلي يا مديحة شوية سُكر زيادة؛ مش باحبّ الشاي وهو مُر.

(سالمة تنظر ناحية بسيمة. ترى في يدها علبة بسكوت تأكل منها.)

سالمة: اديني يا أستاذة بسيمة حاجة من اللي معاكي، أصل أنا باجوع.
الله، دي لذيذة قوي، اديني كمان واحدة والنبّي.

(بسيمة تُعطيها واحدة كمان. سالمة تضعها في فمها بسرعة وتلتهمها.)

(تجري سالمة لتجلس بجوار مديحة وهي تعمل الشاي. سالمة مُمسكة كوبها في يدها مُستعدّة لتأخذ الشاي في لهفة.)

بسيمة (تهمس في أذن عرّة): عليها شراهة!
عرّة: عندها ستاشر سنة. السن ده هو سن الشراهة لكل حاجة. بنتي في سنّها تمام
وعندها نفس الشراهة. ساعات أخبّي منها الأكل؛ عاوزاها تكون رفيعة ورشيقة.

(بسيمة تضحك والطعام في فمها.)

بسيمة: زي أمها.

عرّة (تضحك): ليه لآ، أنا لسه رشيقة برضه!

بسيمة: أنا خلاص لا رشاقة ولا يحزنون.

عرّة: لآ، أنا واخدة بالي، مش باكل كثير، عاوزة قوامي يفضل كويس.

بسيمة: أنا لا واخدة بالي ولا حاجة، يعني مانكلش كمان؟ يلعن دين الزمن! مش

فاضل إلا الأكل!

(علية تنهض وتسير ناحية الباب.)

عزّة: عليّة؟ رايحة فين؟
عليّة: أشم شوية هوا في الحوش.
عزّة: حَلَفُّ شعري وأحصَلَك.

(عزّة تفتح صندوق الزينة الكرتون. به «رولّات» الشعر ومرآة وقلم حواجب.)

عزّة (تخاطب بسيمة): عمري ما كنت أتصوّر إن القلم في عنبر السياسيات خطر بالشكل ده. تصوّرِي الضابطة كانت عاوزه تاخد منِّي قَلَم الحواجب، وتقولي جايز تكتبي بيه. قُلْت لها معقول أكتب بقَلَم حواجب. وبينني وبينك فكرت في الحكاية وقُلْت برضه مُمكن اكتب بيه كلمتين على ورقة علب السجاير اللي معاكي، وأبعثها لبنتي.
مديحة: وانتِ جِبت قلم الحواجب ده منين؟ سابوكي تدخُلي بيه ازاي؟ ده أنا فتشوني أول ما جيت وخذوا منِّي كل حاجة، حتى قَلَم الحواجب والمِلقاط.
عزّة: هو قَلَمِي؟ ده بتاع زوبة.

بسيمة (ضاحكة): زوبة الحرامية والأ زوبة القتالة.
عزّة (ضاحكة): لأ زوبة دِعارة! على آخر الزمن بارسم حواجبي بقلم واحدة من بتوع الدِعارة. والمراية كمان بتاعتها، ورولّات الشعر بتاعتها.

لبيبة (في تحذير): بس خلي بالك، ممكن يكون عندها مرض جلدي وتعيديكي!
عزّة (ضاحكة): تعديني تعديني، عشان تكمل، مش ناقصنا غير الأمراض التناسليّة.

(لبيبة لا تضحك، يبدو عليها القلق.)

لبيبة: أنا شخصياً لا يُمكن أُلِس حاجة من بتاعتهم. مش ضروري نلفّ شعرنا ونعمل حواجبنا هنا؛ هو احنا بنشوف حد. أنا مابصّتش في وشِّي في مراية من ساعة ما جيت. نسيت حتى شكل وشِّي إيه؟ متهياً لي إن شكلي بقّه يخوّف. إذا فتحوا الزيارات وجه جوزي يزورني مش هأقابله.

عزّة (ضاحكة): أقابله أنا يا ستّي. أنا شخصياً مُعجبة بجوزك من زمان وماعنديش مانع تفضّلي أنتِ هنا وأروح أنا أقابله!

بسيمة (ضاحكة): دي لبيبة كانت تقْتَلِك وتاخـد فيك تَأْبِيدَة. وعلى رأي زوبة، مُجَرَّد نقلَة بسيطة، بس المرَّة دي بقه من عنبر السياسيات لعنبر القتَّالَات.
لبيبة (باسمَة بغضب): لأ مش مُمكن أقتل عرَّة؛ عرَّة صاحبتِي وعُمري ما غرت منها.

عرَّة (في غضب مُفاجئ): ليه بقه عُمرك ما غرت منِّي؟ أد كده شكلي وحش؟
لبيبة: لأ، أبدأ، إنْت حلوة وكل حاجة، لكن قصدي عُمري ما حسيت إنك مُمكن تبصِّي لجوزي، أو جُوزي يبص لك.

عرَّة (ضاحكة): وليه ما يبصليش؟ وحشة والأ وحشة؟
 ده أنا زي القمر أهو في المراية! وبصراحة بقه جوزك ياما بص لي.
لبيبة (في ضيق): على العموم هو بصباص كبير، ما يعتقش أمه، ودلوقت لما كبر بقه يبص للبنات اللي قد بنته.

عرَّة: كلهم كده. أمال أنا يعني بَقِيَت مُطَلَّقة ليه؟ قصدي مُطَلَّقة، بكسر اللام (تضحك) أنا من هنا ورايح مش مُمكن أقول مُطَلَّقة بفتح اللام أبدأ، حاقول أنا مُطَلَّقة، بكسر اللام، فاعل مش مفعول به، مش كده والأ إيه يا عليَّة.

(عليَّة تتمشِّي في الحوش لا تسمعها.)

(عرَّة تضحك. بسيمة تضحك. لبيبة تكشِّر ولا تضحك. يبدو على لبيبة التعب والعصبية والقلق.)

(الأخوات وسميرة مُستغرقات في الصلاة أو قراءة القرآن.)

(مديحة ونجاة وسالمة يشربن الشاي مُستغرقات في حديث هامس. بسيمة تَضَع يدها على فمها.)

بسيمة: يا عرَّة بلاش ضحك، وطِّي صوتك، أحسن الضحك حرام، والله لا يحبُّ الفرحين!

عرَّة: أنا خارجة في الحوش شوية مع عليَّة.

(تخرج عرَّة إلى الحوش.)

(بسيمة تنظرُ إلى لبيبة. لبيبة تُمسكُ رأسها بيديها.)

بسيمة: باين عليكى تعبانة قوي يا لبيبة.

(لبيبة تفكُ يديها وتتنهَّد.)

لبيبة: تعبانة قوي قوي، مش قادرة أستحمِل. طول الليل صاحية أقول يا رب خَرَجْنَا من هنا بَقَه. ده سِجْن جَوَه سِجْن جَوَه سِجْن، حاجة ملهاش نهاية. آخِر ما زَهَقْتَ قُمتِ اتوضَّيتِ وصلَّيتِ، طول عُمري كنتِ أصليّ وبالذات أيام الامتحانات. ما بَطَلْتِش صلاة غير لما اتجوَّزتِ جوزي؛ أصلُه مش بيصليّ والصلاة عاوزة تشجيع، وعاوزة الواحد يتعوَّد عليها، الصلاة عادة برضه عادة ممكن تستمر أو تنقطع.

بسيمة: أنا العادة عندي انقطعت من زمان (بسيمة تضحك. لبيبة تبتسم).

بسيمة: لازم نضحك شوية ونهون على نفسنا. هانعمل إيه يا لبيبة؟ لازم نشجّع بعض لغاية ما نخرج، وجايز انتِ تخرُجي أول واحدة، أنتِ مالكيش في السياسة خالص.

لبيبة: أنا ماليش دعوة بحاجة خالص، حتى الجرائيل بطلت أقرأها.

بسيمة (ضاحكة ساخرة): وهيّ الجرائيل بقّت تنقري. والله أحسن حاجة هنا إن احنا مش بنشوف جرائيل، حاجة تغم!

(تضحك بسيمة. لبيبة لا تضحك.)

بسيمة: اضحكي بقه يا لبيبة. انسي إنك في سِجْن وفكري في حاجة كويسة. فكري في بنتك، في جوزك، وعلى الأقل أنتِ عندك بنت وجوز تفكري فيهم، وعلى الأقل لما تخرُجي من السِجْن حتلاقي حد مستنيكي، ونفسه يشوفك وانتِ واحشاه، لكن أنا، أنا مش حاوحش حد.

لبيبة (تنهَّد بحسرة): ولا أنا. أنا عُمري ما وحشت جوزي، ولا هو وحشني. واحنا عايشين كده بس، تسديد خانات، وعشان البنت. لولا البنت أنا كان زمني ... كان زمني مُطلقة.

بسيمة (باسمة): مُطلقة من فضلك بكسر اللام على رأي عليّة.

(تتوقّف بسيمة فجأةً عن الابتسام.)

بسيمة: أنا خائفة عليّة تعمل لنا مشاكل. احنا مش ناقصين مشاكل. ماكنش ضروري أبداً إنها تصمّم رأيها بالشكل ده؛ المسألة ما تستاهلش.

لبيبة (في ضيق): عليّة راسها ناشفة.

بسيمة: راسها ناشفة لنفسها. لو كانت لوحدها كان معلّش، لكن في ناس معاها تانيين. جايز تجرّ لنا مشاكل كلنا، واحنا عاوزين نهذا ونرتاح. مش فاهمة هي امتنعت ليه بس (تسكت لحظة) جايز خائفة على ابنها منهم.

لبيبة: مش متهيأ لي إنها خائفة. عليّة مش بتخاف. هي مش من النوع اللي بيخاف. أنا أعرفها قبل ما عزّة تعرفها.

بسيمة: لازم تخاف على ابنها على الأقل.

لبيبة: جايز، لكن هي مُتأكّدة إنهم مش مُمكن يعلموا فيه حاجة. حيعملوا إيه في طفل عمره أربعة وأربعين يوم؟ أقصى ما يُمكن يعملوه يفصلوه عن أمه. مش ناقص حاجة إلا إنهم يموتوه، وده لا يمكن يحصل. صحيح مافيش قانون لكن ماحناش لسّة في غابة!

بسيمة: ولما هي مش خائفة على ابنها كان لازم يعني تحكّم دماغها على حاجة فارغة؟

لبيبة: جايز تكون فارغة بالنسبة لنا، لكن بالنسبة لعلية جايز تكون مسألة مبدأ. هي ما تحبّش تخضع بسهولة.

بسيمة (بسخرية): لازم تخضع بصعوبة يعني.

لبيبة: هي دي عليّة ولا يُمكن تتغيّر. أنا أعرفها من خمسة وعشرين سنة، لا يُمكن حدّ يكسر دماغها.

بسيمة (في ضيق): دلوقتٍ مافيش قُدّامها غير الحيط، تكسر دماغها بقى في الحيط!

(عليّة وعزّة يتمشيان في الحوش معاً.)

(الشاويشة تفتح باب الحوش ومعها امرأة أخرى من المسجونات، هي زينب القتالة. زينب تحمل أكياس شاي وعلب سجائر. زينب امرأة عادية ولكن لها شخصية قويّة وكرامة، ونوع من الكبرياء الطبيعي.)

الشاويشة: زينب جابت لكم الشاي والسجاير من الكانتين. فين الست بسيمة؟
عزّة: جوّه في العنبر يا ست فهيمة.

(تسبق زينب الشاويشة إلى العنبر بخطواتٍ واثقة، فيها كبرياء طبيعي وثقة.)
(عليّة تتأمّلها.)

عليّة: الستّ دي باين لها شخصية.
عزّة: كل المسجونات الي هنا لهم شخصية، حتى صباح المتسوّلة، ده السجن ده عالم ثاني لوحده. والي دخّلت دي هي زينب القتّالة. هي تقريباً مُساعدة الشاويشة فهيمة. القتّالات بس هُمّ الي مُمكن يساعدوا الشاويشة. وإدارة السجن كلها لا يُمكن تتّق إلاّ في واحدة قتّالة. بتوع الدّعارة مُمكن يشغلوهم في المسح والكنس، لكن القتّالات يمسخوا الكانتين، يمسخوا العنابر، يمسخوا نوبتشية بدل الشاويشة لما تغيب.
عليّة: تعالي ندخل العنبر؛ عاوزة أسمع بيقولوا إيه.

(عليّة وعزّة تدخلان العنبر.)

(زينب جالسة إلى جوار بسيمة وإلى جوارها الشاويشة، فوق مرتبة بسيمة أكياس الشاي وعلب السجاير وعلب كبريت، ومن حولها تجلس مديحة ونجاة وسالمة. لبيبة جالسة بالقرب منهم. سميرة في ركنها تقرأ قرآناً وتُسبّح، في يدها السبحة. رشيدة ونفيسة واعتدال إلى جوار بعض يقرآن. هادية جالسة تقرأ وحدها بالقرب منهن.)

زينب القتّالة: الحساب كده مضبوط يا ست بسيمة.

بسيمة: أيوة مضبوط.

عزّة: اسمعي يا زينب.

زينب: نعم يا ستّ عزّة.

عزّة: معنا مسجونة جديدة مبسوطه منك.

زينب: أنا تعبانة النهاردة ومزاجي مش رايق يا ستَّ عَزَّة.
عَزَّة: ليه بَقَه يا زينب؟ ده إنِتِ دايماً تضحكي ومزاجك رايق.
الشاويشة: النهاردة جت لها أخبار من برَّه مش كويسة.
عَزَّة: إيه كفى الله الشر.
الشاويشة: بنتها عيَّانة قوي ومافيش حد عارف يعالجها.
 (زينب ترفَع يديها إلى فوق فجأة وتخطب الله.)

زينب: أهو والله، لو البنِت دي ماتت أنا خلاص حاكفُر بيك!
الشاويشة: أستغفر الله العظيم. استغفري الله يا بتُّ يا زينب. معلش يا جماعة
 سامحوها أصل البنِت دي غالية عندها قوي. دي قَتَلت جوزها عشان بنتها وأخذت تأبيدة؛
 يعني يا بتُّ يا زينب كان لازم تُدْخِلي على جوزك الأوضة في اللحظة دي؟
زينب (في حسرة): هو أنا دخلت والأ شُفت حاجة؟ ده البتُّ هي اللي قالتلي، وما
 صدَّقتهاش. قُلْت بتُّ مجنونة زي أمها، حاكم أصل أنا طول عمري شعنونة وماحبِّش
 الحال المايل، والشاطرة ملهاش إلا الخايب. أبويا جَوَزني لراجل خايب وأنا لَسَّة صغِيرة
 والعادة ماجتنيش. عِشت معاه؛ هاروح فين؟ أبويا قال لي لو سبتيه اقطعك جتت. جِبْت
 منه سبع عيال، ماتوا ما فضلش غير حِتَّة البنِت. كنت أنا اللي أروح الغِيط أزرع وأقلع
 وهو كسلان. راجل خايب مايحبِّش الشغل، ومايحبِّش إلا السرقة؛ طالع لأبوه. أصل أبوه
 كان حرامي، يسرق من غيطان الناس، وبَقَه يشترى أرض. إنما الحرام ما يدومش، راحت
 الأرض، وجوزي ده هو السبب. أصله خايب وحاله مايل ومالوش إلا في الجُوزة والمعسل.
مديحة (تهمس في أذن الشاويشة): وهي قَتَلت جوزها ليه يا ستُّ فهيمه؟
الشاويشة: ما هي قالت في الأول، ضبِطت البتُّ مع أبوها.
مديحة (في فزع): مع أبوها؟ يا مصيبتني! (في دهشة) وأنتِ اللي قَتَلتِه يا زينب؟
 (زينب تفرد يديها وتنتظر فيهما.)

زينب: أيوة أنا اللي قتلته، بإيديا دي، بس لما شُفُّه بعنيِّ دول، (تُشاوِر على عينيها)
 ضربته بالفاس، وقطَّعته حَتَّت وحطَّيَّته في شوال ورَميَّته في البحر (تضحك فجأة) زمان
 السمك خلَّص عليه، بَقَه (تنهض فجأة).

عزّة: رايحة فين يا زينب؟

زينب: رايحة أشوف بنتي، خلاص الدكاترة خلّصوا على اللي حيلتي والبت عيانة، وقرّبت تموت. حاروح فين يعني، رايحة أشوف بنتي، هي اللي حيلتي، ماحيلتيش غيرها، رايحة أشوفها.

الشاويشة (تضحك وتنهض): اللي يسمعها يفكر إنها رايحة تشوف بنتها بصحيح، يا بتّ يا زينب هي بنتك هنا؟ ده بنتك فين، في آخر الدنيا! في الصعيد! في الصعيد الجواني.

(زينب والشاويشة يخرجان إلى الحوش.)

زينب: لا جواني ولا برّاني، أهو كله على الله. ربنا هو اللي فاضل. ولو ربنا خد مني البتّ دي أنا أكفر بيه.

الشاويشة: بس يا بتّ بلاش كُفر، أحسن الست سميرة تقتلك وتقطّعك حتّ. **زينب** (تجلس في الحوش فجأةً وتنظر إلى الشاويشة في غضبٍ وتحذّر): هي مين دي اللي تقتلني وتقطّعني حتّ؟ حدّ يقدر يقتل زينب يا فهيمة؟ حدّ يقدر يقتل زينب؟ دي الدنيا كلها ماقدرتش. آه ياني! الدنيا كلها والسجن كله ماحدّش يقدر عليكي يا زينب، مافيش إلا حتّة البتّ دي اللي عياها خلاص هو اللي حيقتلني.

(زينب تمسك رأسها بيديها وتبكي.)

الشاويشة: قومي يا بتّ يا زينب قومي، ربنا حيشفيها، قومي يا زينب أحسن النهاردة باين مش فايت، وضابط المباحث رايح جاي على زنازين التأديب (تهمس في أذنها) بيدور على زنازة للمسجونة السياسية الجديدة، مافيش ولا زنازة فاضية، شفتي المسجونة الجديدة؟

زينب (في تساؤل): أنهى فيهم؟

الشاويشة: اللي كانت واقفة واحنا داخلين مع الست عزّة في الحوش، اسمها عليّة إبراهيم شوقي، صلاة النبي عليها.

زينب: والراجل ده عاوز يحطّها في التأديب ليه؟ عملت إيه؟ قتلت حدّ؟

الشاويشة: اسكُتي على اللي عملته فيه. ست جدعة ولا جدعانتك إنت يا زينب يا قَتَّالة. والنبي لولا الملامة أقول أجدع منك. وتقولُه كده وهي رافعة رأسها وعليها شَمَخَة (الشاويشة تقلد عليّة وترفع رأسها في شموخ) «أنا الفاعل مش المفعول به.»
زينب (تنهض): وأنا يا بتُّ يا فهيمة، ما أنا الفاعل برضُه؛ ياما فلَحَت الأرض وعزَّقت وِشلت على راسي وعلى زهري زي الفَعلة.

الشاويشة: الفَعلة إيه يا بتُّ اسكُتي، دي ستُّ ولا كلُّ السَّتات. باين يا بتُّ يا زينب فيه ناس في السياسيات أجدع من القتلات ولحدش عارف.

زينب: اسكُتي بلا هم، دول كلهم خرعين، ولا واحدة فيهم تملا عينك يا فهمية!

الشاويشة: هوانم يا بتُّ يا زينب مش فَعلة وفلاحين زيك.

(زينب في انفعالٍ تتوقَّف في الحوش وتُخاطب الشاويشة.)

زينب: مالهم الفلاحين يا شاويشة؟ وأنت؟ مابقتيش من الفلاحين خلاص؟ مدام خَطيتي على كتافك التلات شرايط العُجر دول، والنبي الفلاحين أحسن ناس، بس آه يا زمن!

(تنظر زينب وترى الجرجيرة المزروعة في الحوش والتي أصبحت ذابلة.)

زينب: شوفي الهوانم بتوعك مقدروش حتى يرووا الجرجيرة، حتموت خلاص.

(تخرج إلى الحوش لبيبة. تراها زينب، تهمس زينب في أذن الشاويشة.)

زينب: هي دي المسجونة الجديدة اللي بتقولي عليها؟

الشاويشة: لأ، مش دي.

(لبيبة تقترب من زينب بشيء من الحرَج والتردُّد.)

لبيبة: كنت عاوزة أعرف منك حاجة صغيرة يا زينب.

زينب: عيني لك.

الفصل الثاني

لبيبة: لما شُفتي جوزك ... مع ... قصدي لما شفتيه مع ...

زينب: مع بنتي؟ إيه يعني هو سر؟ ما كل الناس عارفة.

لبيبة: قصدي يعني حسيتي بإيه؟

زينب: ماحستش بحاجة. أنا قتلته على طول.

لبيبة: طب وبنتك؟ ماحستيش بحاجة ناحيتها.

زينب: يعني إيه؟

لبيبة: يعني مثلاً حسيتي كده بحاجة زي غيرة، غيرة من بنتك؟

زينب (تضرب على صدرها): يا مصيبتي! فيه أم تغير من بنتها؟ دي بنتي دي

روحي. لو راحت بنتي روحي تروح. باين عليكي ماجربتيش. أنت متزوجة ولا خلفتيش،

ولاً لسة متجوزتيش؟

الشاويشة: الست لبيبة متجوزة وعندها بنت زي بنتك يا زينب.

زينب: مدام أم تبقي تفهمي كلامي بقه. ده أنا عشان بنتي دي أقتل جوزي عشر

مرات. وإذا كنت متجوزة عشر رجالة أقتلهم، يا مصيبتي حد يغير من بنته؟

(تخرج عليّة وعزّة إلى الحوش. تسمعان الجزء الأخير من الحديث).

عزّة (تضحك): مين يغير من بنته؟ لازم لبيبة! أصل لبيبة يا زينب عندها حتّة بنت

زي القمر. ولبيبة طول عُمرها تغير من الهوا الطاير، وتغير من كل صاحبها الستات،

حتى أنا، مع إني صاحبتها من زمان! (ترفع رأسها في كبرياء) وأنا كمان عندي مبدأ مُهم

في حياتي، لا يُمكن أبص لراجل متجوز!

زينب (تشوّح بيديها): غيرة إيه ونيلة إيه؟ هُم الرجالة يستاهلوا إن احنا نغير عليهم!

(زينب تنظر إلى عليّة).

زينب: وإنّ يا ستّ يا حلوة، إنّ بتغيري إنّ كمان؟

الشاويشة: دي الستّ عليّة اللي جت جديد.

(زينب تتأمّل عليّة طويلاً. تنظر في عينيها وتتأمّلها.)

الشاويشة: الستُ عليّة كويسة خالص وعاجباني، بس أنا مستخسراها في التأديب، مش هاین عليّ واحدة زيّها كده يحطّها في التأديب.

عليّة: تأديب إيه يا شاويشة؟

الشاويشة: إيه؟ مش بتخافي من التأديب؟

عليّة: أخاف؟ عمري ما خُفت من حاجة اسمها تأديب! ما حدّش قدر، وما حدّش حيقدر، لا وأنا صغيرة ولا أنا كبيرة، ولا برّة السجن ولا جوّه السجن كمان.

زينب: أيوة كده، عاوزين نسمع الكلام الحلو ده! أنا بحبّ الناس اللي ماتخافش من حد. أنا مش باخاف ولا من الموت! موت إيه! ده أنا شفّت الموت ييجي مية مرّة. وكل مرّة أقول خلاص يا بتّ يا زينب مُتّ خلاص، وألاقييني صحيت تاني زيّ العفريت! أصل أنا بسبع أرواح على رأي أمي.

(زينب تنظر مرّة أخرى في عيني عليّة.)

زينب: وإنّ باين عليكِ بسبع أرواح زيّ.

الشاويشة (تضرب زينب على ظهرها): زيّك إيه يا بت يا زينب؟ الست عليّة مُتعلّمة وعندها شهادات، وباين عليها بنت ناس كويسين، أنا خايفة عليها من بهدلة الرجل ده، أصله لما ينگاظ من واحدة، عينك ما تشوف إلا النور، ده رايح جاي على زنازين التأديب زي المسروع.

زينب: مسروع مسروع! حيعمل لها إيه يعني، اللي ما يخافش يفوت في النار ولا يتحرّش. واللي يخاف من العفريت يطلّع له. تأديب إيه وضرب إيه وتعذيب إيه، ده أنا ياما شفّت تعذيب وتأديب، ده أنا فُتّ في النار الوالعة، وأديني قدامكم أهو، ناقصة إيد والأّ دراع والأّ رجل؟ وحتى لو قطعوا أيدي ودرعاتي برضه مش حقول آي. عمري ما قُلت آي أبداً، آي دي يقولها الرجّالة الخايبين اللي زي جوزي (تضحك) الله يرحمه بقّه، زمان السمك أكله على الآخر!

الشاويشة: إنتي واحدة على الشقا يا زينب، إنتِ واللي زيّك لكن السّتات الهوانم دول ما يقدروش على التأديب. ما التأديب اللي هنا شكّلُه إيه!

(سالمة تُقبل بسرعة وتشرّك في الحديث.)

الفصل الثاني

سالمة: شكله إيه يا شاويشة؟ أنا شعر راسي وقف. أول مرّة أدخل السجن، كنت كل ما اسمع كلمة السجن أخاف، يتهيأ لي كده إن جوه السجن أوضة ضلّمة فيها عفاريت، فيها فيران، فيها تعابين، فيها كلاب مسروعة تُعَض وتُخَلّي الواحد ينسرع زِيّ الكلب المسروع ويقول هب، هب.

(سالمة تُهَبِّب مثل الكلب وهي تضحك وتقفز في الحوش).

(الشاويشة تُمَثِّل حركات المُدير وتهزُّ يدها كأنَّ معها عصا).

الشاويشة (بصوت مُتَغَطِّس): **إنتِ يا بتُّ سالمة يا بت، إنتِ بتتريقي على السجن يا بت، إنتِ مش عارفة إني الشاويشة وعلى كلِّ كتف من كتافي ثلاث شرايط، وأقدر أحطك دلوقتِ حالاً في التأديب.**

(سالمة تقترِب من الشاويشة. الشاويشة توقفها بيدها).

الشاويشة: **أفني عندك! مش مفروض تكلميني إلا وأنتِ واقفة على بُعد تلت أمتار ونص، لايحة السجن بتقول تلت أمتار ونُص على الأقل، على الأقل، انتي مش عارفة اللايحة بتقول إيه يا بت؟**

سالمة: **واللايحة دي بتقول الكلام ده فين؟ ما هو انتوا مانعين الراديو، يعني نسمّعها فين؟**

(الجميع يضحكون).

سالمة: **واللايحة بتقول إيه كمان يا شاويشة؟ نفسي أعرف كل حاجة، نفسي أتعلم كل حاجة عشان ما حدّش يضحك عليّ.**

الشاويشة: **اللايحة بتقول كمان إن ... (تتكلم باللغة العربية الفصحى) إنَّ السجن تهذيبٌ وتأديب.**

سالمة: **عاوزين يؤدّبونا؟**

عزّة (ضاحكة): **ويقلموا أظافرنا. والي حصل إن ضوافرنا طولت، وكل يوم تطول أكثر، (تنظر إلى أظافرها) عشان ما فيش مقص. ما هو المقص ممنوع والملقاط ممنوع والمرآية ممنوعة وكل الأدوات الحادّة ممنوعة.**

عليّة: يظهر إن أدوات الزينة كلها أدوات حادّة.
عرّة (تضحك): حادّة كالسهم لنقتل بها الرجال.

(زينب القتالة تضحك، يبدو عليها فجأة الحنان.)

زينب القتالة (في رقة): لأ والنبي بلاش تقتلوا كل الرجّالة؛ فيه رجّالة كويسين،
وقلبهم حنين.

عرّة: إيه الحكاية يا زينب؟ مالك حنيتي كده؟
الشاويشة: أصلها بسلامتها بتجّب واحد من سجن الرجّالة، كل يوم تبعث له
جواب، ويرد عليها بجواب، ويمكن يتجوّزوا كمان سنة.

زينب: وليه سنة بقّه؟ قولي كام شهر.
الشاويشة: موافقة الإدارة يا بتّ على الأقل تأخذ سنة وأكثر. دي حكومة يا بتّ
ويوم الحكومة بسنة. وجايز كمان توافق أو ماتوافقش.

زينب (في غضب): أنا باحبّه وهو بيحبّني. الحكومة دخلها إيه؟ هي الحكومة دي
مناخيرها في كل حاجة؟

(تخرج زينب من الحوش، ثم تدخل إلى الحوش مرّة أخرى.)

زينب: والنبي أنا ما ضحكت النهاردة غير عندكم، نسيتوني البت وعياها. حاروح
أشوفها وأرجع لكم تاني. والنبي إنتم ناس كويسين، وخسارة في السجن، بس مش
مزعلني منكم غير حاجة واحدة.

عليّة: إيه هي يا زينب؟

زينب: الجرجيرة دي ما حدّش بيرويها ليه؟ حدّ يسيب الزرع يموت؟ أنا أصلي فلاحه
وماقدرش أشوف الزرع يموت، ودول عُودين جرجير. كُباية ميّه كل يوم ترويهم. تعالوا
شوفوا الحوش بتاعنا، أنا زارعاها كله جرجير وفول وملوخية وفجل وطماطم وكل حاجة.

(زينب تشد عليّة من زراعها.)

زينب: تعالي معايا شوفيه!
الشاويشة: سيبها يا زينب! ممنوع إنهم يخرجوا برّه الباب ده. ما تجيليش الكلام!

عليّة (تكلم زينب من بين القضبان): وأنتِ بتزرعي بإيه يا زينب؟
زينب: بالفاس، هازرع بإيه يعني؟
عليّة: إحنا ماعدناش فاس.

زينب: أجيب لك الفاس، بس كده، أروح أجيب لك الفاس.
الشاويشة: فاس إيه يا زينب؟ الفاس ممنوع كمان.
عرّة: إذا كان الملقاط ممنوع، عاوزه تجيبي فاس؟
سالمة: والفاس ممنوع ليه؟

الشاويشة: جايز واحدة تضرب الثانية بالفاس.
سالمة: والقنّالات عندهم فاس؟

الشاويشة: السياسيات أخطر من القنّالات.
عرّة (تكمل): والورقة والقلم أخطر من الطبنجة! دي حاجة مش معقولة، الفاس عند القتالات، والقلم والورقة في كل العنابر، الدعارة والمخدرات والقتالات وكل المسجونات يكلموا بعض ويزوروا بعض، إلا إحنا.

الشاويشة: ما هو السياسة أخطر حاجة. كان مالكم ومال السياسة بس؟ القنّالات دول غلابة، (تضرب زينب على ظهرها) مش كده والأ إيه يا بتّ يا زينب؟
زينب: أنا حاروح أجيب لهم الفاس يا فهيمة. ماحدّش حيقول حاجة؛ كل المساجين بتزرع أحواشها.

الشاويشة: وهم هيزرعوا بصحيح؟ دول هوانم.
عليّة: لأ مش هوانم يا شاويشة. حنزرع الحوش. أنا ماقدّرش أقعد كده من غير شغل. لازم أعمل حاجة، لازم أتحرك.

سالمة (تقفز وتقترب من عليّة): وأنا والنبي.
الشاويشة: يا ستّ عليّة إنتِ حتعرّفي تزرعي؟ زرعتي قبل كده يا ستّ عليّة؟

زينب: وهي الزراعة عاوزه تعليم؟

عليّة: زرعت وأنا صغيرة، في بلدنا كفر شطا، كنت أنزل الغيط مع ولاد عمّتي بهيّة وأزرع معاهم. عمّاتي كلهم فلاحين، والودي كان مُمكن يطلع فلاح لولا إن سّتي الحاجة باعت الخلال بتاعها وعلمته، وهو علمّ ولاده. لولا التعليم كان زمانني فلاحه زي فاطمة بنت عمّتي.

سالة (في حماس وفرح): بقّه أنت عمّتك فلاحه؟ أتا ريني من أول ما سُفتك شبّهت عليك، والنبي فيكي شبّه من عمّتي تفيدة، كانت كويسة (تسكت لحظة) وحلوة، أحسن من أبويا، لكن راحت رُخرة

الشاويشة: بقه عمّتك تفيدة كانت حلوة وهانم كده؟

عرّة: وراحت فين يا سالة عمّتك؟

سالة: راحت البحرين لغاية دلوقتٍ مارجعتش. قولتلها يا عمّة ماتسيبيش البلد. قالت حاقعد في البلد أعمل إيه يا سالة؛ لا أرض ولا زراعة ولا شغل، وابني بيقول الرّزق في البحرين كثير.

زينب: الرّزق في كل حتّة لي عاوز يشتغل. أنا حاروح أجيب لك الفاس يا عليّة.

الشاويشة: عليّة كده حاف يا بت؟

زينب: أيوة حاف؛ ما هي أصلها فلاحه زيّنا. وأنا كمان ما عرفش أقول يا ستّ أبداً، ولا أعرف أقول يا بيه ولا يا تيه. عمري قلت لك يا ستّ فهيمة؟ مش كده والأ إيه؟ وعمرك سمعتيني أقول للمدير أو المأمور يا بيه؟ أبداً، هي اللي تقتل تقول يا بيه؟ هي اللي تقتل تخاف؟ ده الناس هي اللي تخاف منها!

(تخاطب عليّة من بين القضبان وهي تجري.)

زينب: والنبي لاروح أجيب لك الفاس، وازرعني الحوش زي ما أنت عاوزه، ازرعني الحوش وخليه كده يخضّر ويرعرع.

عليّة: والتقاوي، هاتي شوية تقاوي ملوخية على جرجير على بقدونس على فول جراتي.

الفصل الثاني

سائلة (تقفز في فرح): أيوة أنا بحبّ الفول الحراتي قوي.
زينب (تتوقّف وتستدير وتُخاطب عليّة): أنا باخد التقاوي من البتّ زينب الحرامية.
هي بتسرق التقاوي من حوش المُخدرات. أصل بتوع المُخدرات أغنى ناس، أغنى ناس
جوّه وبزّه، كل حاجة عندهم. اطلبي أي حاجة تلاقيها عندهم. (تضحك) ده عندهم
كمان تليفزيون، تليفزيون ملوّن (تجري) أنا بروح أتفرّج عندهم. أنا حاخلي البتّ زينب
الحرامية تجيب لك شوية تقاوي حلوين.

(فجأة تنبعث صرخةً من داخل العنبر. جميع من في الحوش بما فيهم الشاويشة
يدخلن مُسرعاتٍ مُتلَهفاتٍ لِمعرفة ما حدّث.)

(رشيدة راقدة على مرتبتها على الأرض، يبدو عليها الإغماء أو الإرهاق أو الانهيار
المفاجئ الشديد، من حولها سميرة ونفيسة واعتدال وهادية ومديحة ونجاة.
بسيمة ولبيبة إلى جوارها أيضًا، على مسافة غير بعيدة منها.)
(مديحة في يدها زجاجة كولونيا.)

(سميرة تهوي على وجه رشيدة بالمُصحف. مديحة تُحاول مدّ يدها بزجاجة
الكولونيا.)

سميرة (في حِدّة): قُلنا بلاش الكولونيا.

(مديحة تضع زجاجة الكولونيا على الأرض.)

مديحة: طيّب نبعث نجيب الدكتور، يا شاويشة، والنبي اندهي الدكتور بسرعة.
الشاويشة: حاضر، حاضر، حالاً، حالاً.
سميرة: تعالي يا شاويشة، هي مش عاوزة دكتور.
(الشاويشة تتوقّف.)

سميرة: مش مُمكن رشيدة تخلي راجل يكشف عليها.

الشاويشة (في دهشة): وهو الدكتور راجل؟
هادية (في غضب): أُمّال يعني مش راجل؟ طبعًا راجل؟
الشاويشة: يعني تسيبها تموت؟
مديحة: عندكم دكتورة ستّ يا شاويشة؟
الشاويشة: أيوة عندنا الدكتورة فوقية، يا رب تكون جت النهاردة؛ أصلها مش بتيجي كل يوم، حاروح اناديلها.

(رشيدة ترفع يدها في ضعفٍ وهي راقدة علامة الرفض.)

سميرة: استنّي يا ستّ فهيمة، رشيدة عاوزة تقول حاجة.

(الشاويشة تتوقف، تقترب من رشيدة، وتجلس إلى جوارها على المرتبة.)

رشيدة (بصوتٍ ضعيف): أرجوكي ... مش ... عاوزة ... مش عاوزة حد.
الشاويشة: دي دكتورة ستّ مش راجل! والله العظيم ست. ستّ والله، مش بتنكشفي على ستّات برضه؟

(رشيدة تهزّ يدها علامة الرفض.)

رشيدة (بصوتٍ ضعيفٍ جدًّا): أنا كويّسة، مش عاوزة حد.
مديحة: إنتِ تعبانة قوي يا رشيدة والدكتورة حتديكي دوا كويس.
رشيدة (بصوتٍ ضعيفٍ جدًّا): مش عاوزة حد.
الشاويشة: ليه بس يا رشيدة؟ ليه بس؟ ده إنتي يا بنتي في سجن ولازم تشوفي صحتك والحمد لله عندنا دكتورة ست.

رشيدة (بصوتٍ ضعيف): مش عاوزة حد يشوفني.

مديحة: مش معقول يا رشيدة. لازم الدكتورة تكشف عليك.

رشيدة (بضعف): مش عاوزة حد يكشف عليّ.

الشاويشة: بلاش الكشف، أهى تيجي تشوفك وتكتب لك دوا يشفيكي على طول.

سميرة: الشفاء من عند الله.

الشاويشة: طبعًا الشفا من عند الله، أنا ماقلتش حاجة، لكن الدوا برضه يساعد.

هادية: ربنا مش محتاج مساعدة، ربنا هو اللي بيساعد.

الشاويشة (تنهّض): الدكتور حرام؟ والله يا فهيمة ياما تشوفي العجب.

هادية (في غضب): لأ ده مش عجب. ده كلام ربنا.

الشاويشة (في ضيق): هو ربنا قال بلاش دكتور؟

هادية: أيوة، يعني إيه الشفاء من عند الله؟ يعني الشفا بإيد الله سبحانه وتعالى

مش بإيد الدكتور، يعني لو الدكتور إداها دوا وربنا مش عاوزها تخفّ تخفّ؟

الشاويشة: مش حتخف إلا إذا ربنا عاز، لكن يا جماعة ...

هادية: الإيمان بربنا يعني إيه يا ست فهيمة؟ يعني إنك تؤمني بربنا بس. لو آمنت

بحاجة تانية تبقي «مُشركة» بالله.

الشاويشة: استغفر الله العظيم، أنا يختي مؤمنة وموحّدة بالله مش «مُشركة»

والعياذ بالله.

هادية: الإيمان الحقيقي بقّه إنك تؤمني إن ربنا هو اللي حيشفي رشيدة مش

الدكتورة، أي إيمان بأيّ قوّة غير ربنا تبقى شرك.

الشاويشة: حتى استشارة الدكتور.

هادية: حتى استشارة الدكتور، ما هو الشرك بالله يعني إيه؟ يعني يتهيأ لك إن حدّ

تاني أقوى منه، أو يقدر على اللي هو مايقدرش عليه.

(الشاويشة تسير ناحية الباب.)

الشاويشة: ياختي ده أنا أمّي وأم أمي ماكنوش بيقولوا كده، هو الدنيا بترجع لورا

ولا إيه؟ أنا هامشي من هنا أحسن دلوقتٍ طلعت مُشركة بالله، معرفش بعد شوية أطلع

إيه؟ (تكلم نفسها وهي تخرج إلى الحوش) اطلعي يا بت يا فهيمة من الحكاية دي، لا أنا

رايحة أنادي دكتور ولا دكتورة، أحسن كلامهم يطلع بصحيح، (تفكر لحظة وتسكت)

يا مصيبيتي هاطلع على آخر الزمن مُشركة بالله! (تبصق في فتحة ثوبها) اللهم اخزيك

يا شيطان.

(تظهر زينب القتّالة ومعها الفاس. تُنادي على عليّة من الفناء الخارجي.)

زينب القتالة: يا عليّة، يا عليّة.

(عليّة تخرج إلى الحوش ومن خلفها سالمة.)

زينب: الفاس أهو، والتقاوي جايه حالاً من البت زينب الحرامية. افتح الأرض غويط قوي، أصلها مش أرض زراعة، أرض سجون بعيد عنك. كلها حجر وصخر وخرى كلاب. الله يلعن أبو الكلاب، واللي يرمي الناس في السجن زي الكلاب. الشاويشة: يا اختي يا ستّ عليّة، بدل الفاس والزراعة ما تقعدني مع الجماعة دول تكلميمهم، خلي مُخهم يفتح شوية، قال إيه استشارة الدكتور شرك بالله. استغفر الله العظيم من كل ذنبٍ عظيم (تسكت لحظة) افتحي يا ستّ عليّة مُخهم بالكلام والنبي، هي الدنيا بترجع لورا.

زينب: وإذا الكلام مانفّش افتحي مُخهم بالفاس.

الشاويشة: يا ساتر يا رب. ليه هي الستّ عليّة قتّالة زيّك يا بتّ يا زينب، الستّ عليّة سياسية، ولا كل السياسيات، عاجباني قوي، بس أنا مستخسراها هنا في الرّمية دي، وخايفة عليها قوي من الراجل ده اللي عمّال يدور لها على زنزانة في التأديب. والنبي يا ستّ عليّة بلاش تعانديه؛ خلي أيامك تفوت على خير.

(الشاويشة تغلق باب الحوش وتخرج.)

سالمة (في حماس): ادّيني الفاس والنبي شوية، نفسي انفتحت شويّة، أنا مش واخدة على قعدة السجن دي.

عليّة: ولا أنا يا سالمة، لكن كل واحدة فينا حتفت شوية.

سالمة: نقسم الحوش، أنا حاخذ الحتّة دي، أنا حفحت الحتّة دي كلها، ما حدش يفتحها غيري

عليّة: وأنا حاخذ الحتّة دي.

عزّة: أنا شخصياً مش حاقدراً أفحت، لكن مُمكن أعمل حاجة تانية، أجيّب ميّة وأروي مثلاً.

(مديحة تقترب. كانت جالسة على الأرض في الحوش.)

مديحة: وأنا عليّ التقاوي؛ أنا بافهم في التقاوي كويس. أنا اللي بازرع الجينة في بيتنا.

(عليّة نُشْمَرُ أكام جلابها، وتضرب الفاس في الأرض بقوة. يدبُ العمل والنشاط في الحوش. كل واحدة فيهنّ تعمل شيئاً، واحدة تجري إلى داخل العنبر وتعود بجردل ماء. واحدة تكنس الزبالة في الحوش. واحدة تجمع الطوب والزّلط وتكومه في صفيحة القمامة. حركةٌ ونشاطٌ وحماس. سالمة تقفز من الحماس وهي تجري في الحوش وتجمع بعض قطع الزلط وتلقي بها خارج الحوش من فوق السور العالي الذي تعلوه الأسلاك الشائكة.)

(موسيقى مرحة، راقصة، سالمة تكاد ترقص وهي تجمع الزّلط وتلقيه من فوق السور.)

(فجأة تخرج لبيبة من العنبر. يبدو عليها الضيق والكآبة.)

لبيبة: إيه الهيصة والدّوشة اللي إنتم عاملينها دي.
سالمة (في فرح): هانزرع فول حراتي. حناكل فول حراتي (تتراقص سالمة في سرور).

لبيبة (تردُّ في كآبة): الله يلعنك يا شيخة، عاوزة تفوّلي علينا ليه؟ هو احنا حانقعد في السجن لغاية ما الفول يطلّع؟

(تعود لبيبة إلى داخل العنبر، وتجلس إلى جوار بسيمة.)

(بسيمة أمامها الحقيبة مفتوحة، في يدها سيجارة تدخّن.)

لبيبة: تصوّري المجانين، مُتصوّرين إن احنا حانقعد هنا لغاية ما الزرع يطلّع.
بسيمة: باين المسألة حتطول يا لبيبة؛ مش باين لها آخر، (تدخّن في شروود وضيق وقلق) وأنا كمان قلقانة قوي، مش عارفة إيه اللي مُمكن يحصل لنا. جايز يحصل لنا حاجات أكثر من كده، وعليّة مش عاوزة تجيبها البر.

(يُسمع صوت عليّة وهي تضحك في الحوش مع سالمة وعزة ومديحة ونجاة.)

بسيمة: باين عليها خلاص نسيت ابنها. فيه أم تنسى ابنها بالشكل ده؟ وعمره أيام؟ وسابته مع الجيران! ده أنا لو كنت أنا يمكن كنت اتجننت. معرفش! أنا عُمرى ما كنت أم، لكن متهيأً لي الأم لازم تكون كده. مش كده والّا إيه يا لبيبة؟
لبيبة: عليّة مُمكن تنسى أي حاجة. هي كده طول عمرها.
بسيمة: بس مش مُمكن تنسى نفسها؟
لبيبة: ماعرفش.

بسيمة: لا أنا أعرف، عليّة لا يُمكن تنسى نفسها؛ هي بتحبّ نفسها قوي، طول عمرها كده، طول عمري أحسّ إنها أنانية، وفردية، وعشان كده عُمرها ما تدخل حِزب ولا لجنة، ولا تعرف تشتغل مع مجموعة. لو اشتغلت مع مجموعة تعمل مشاكل، ماتحبّش يكون لها رئيس ولا رئيسة. لا يُمكن تسمع كلام حد، اللي في مُخّها وبس.
لبيبة: هي مغرورة شوية.

بسيمة: شوية بس؟ كثير. فاكرة إن مافيش غيرها، فاكرة إنها تقدر على اللي مايقدرش عليه حد. وغورها ده حيجيب لنا المشاكل، واحنا مش ناقصين مشاكل. ما كلنا أدينا الليانات واسم الأب والزوج والطلاق وغيره. مجرد حاجات شكلية. لازم هيّ تعمل إنها حاجة تانية غيرنا؟ عزة كذابة، وعناد زيّ عناد الأطفال.
لبيبة: هي عنيدة طول عمرها. تخبط راسها في الحيط.

بسيمة: حيط إيه؟ هي ماشفتش حاجة! ده احنا في سجن، ده الحيط هنا بصحيح، مش حيط وبس! ده عندهم وسائل جديدة للتأديب. تكنولوجيا، التكنولوجيا دخلت كل حتة حتى السجون (تنفث الدُخان من فمها وأنفها) على العموم هي حُرّة في نفسها، لكن احنا مش عاوزينها تجر علينا مشاكل.

(سالمة تدخل العنبر ومعها جردل. تجري إلى دورة المياه. تملؤه بسرعة وتجري إلى الحوش وهي سعيدة وفرحة ومتممسة.)

بسيمة: والّا البتّ دي اللي اسمها سالمة، لا حدّ عارف هي إيه، وأصلها إيه وفصلها إيه، لا حدّ عارف هي فاهمة والّا مش فاهمة، هي لئيمة والّا هابلة. شوفي تتنطّط أراي زيّ المجانين ومالهاش شُغلة غير الأكل. عليها شراهة! الله يلعن الزّمن اللي خلّانا نعيش وناكل وننام مع أشكال زيّ دي.

لبيبة: احنا مش في سجن، احنا في السراي الصفراء، كان مُمكن تتخيّلِي إنك تعيشي في اوضة نوم واحدة مع ناس يقولوا إن استشارة الدكتور شرك بالله؟ أنا خلاص، حيجننوني.

(رشيدة راقدة تنام وإلى جوارها تجلس هادية ونفيسة. سميرة في ركنها تسبّح وتقرأ قرآنًا. اعتدال خرجت إلى الحوش وعلى رأسها الحجاب تنفّرَج على المجموعة التي تعمل بنشاط. تنظر إليهم وهي تبتسم في هدوء. تخرج من باب العنبر إلى الحوش، تنظر إليهم، تسير حتى باب الحوش، باب الحوش مُغلق.)

(تظهر من وراء باب الحوش زينب الحرامية معها كيس به التقاوي.)

زينب الحرامية: زينب القتالة باعثة لكم التقاوي دي. كل نوع لوحده في كيس، فيه تقاوي جرجير، وتقاوي ملوخية، وبقدونس، وفول ناشف، وإذا عُزّمت حاجة تانية بس نادوا وقولوا زينب الحرامية، وأنا أجيلكم على طول.

(اعتدال تأخذ منها الكيس. تنظر إليها في دهشة.)

اعتدال: وإنتِ حرامية بصحيح يا زينب؟

زينب الحرامية: لأ بهزار!

اعتدال: بتسرّقي بصحيح من الناس؟

زينب: أمّال أنا هنا في السجن ليه يا حبيبتِي؟ باين عليكِ ماشفتيش الدنيا، لكن حتشوفها ازّاي وإنتي ملفلفة نفسك في الكفن ده.

اعتدال (في ضيق): ده مش كفن، ده حجاب ربنا، المفروض إن شعرك ده (تشير بيدها إلى شعر زينب الحرامية القصير الأكرت المنكوش) المفروض إن شعرك ده ما يبانش على رجّالة.

زينب الحرامية (تضرب على صدرها): رجّالة؟ هم فين الرجالة، هو لو كان فيه رجّالة يا شاطرة كُنت أنا بقيت هنا في السجن.

اعتدال: إنتِ جيتي السجن عشان بتسرّقي، مش عشان الرجّالة.

زينب الحرامية: لأ أنا جيت السجن عشان مالمقتش راجل يصرف عليّ. أنا لازم أصرف على نفسي. ومالمقتش غير السرقة قُدّامي. أبويا طلّعني من المدرسة الابتدائي عشان يجوّزني لراجل عجوز معاه قرشين كانوا قرشين حرام، راحوا وخدّوه معاهم. الحرام ماينفعش، وبتاع الناس كناس على رأي أمّي. مانابني من الجوازة غير ثلاث عيال

يتامى. وكان أبويا كويس وعاشين كويس ومش واحدة على البهدلة. ماقدرتش اشتغل غسالة في البيوت ولا خدامة. إلا الخدمة في البيوت، بهذلة وفقر، الاتنين سوا. لو ما كنش أبويا طلّعني من المدرسة، كان زمني بقيت زي الهوانم دول، مُدرّسة والأ أستاذة والأ دكتورة والأ مُحامية والأ حتى سكرتيرة، أدقّ على الماكينة، لكن أبويا طلّعني من المدرسة. لو كان عايش كنت قلت له إنت السبب في الرّمية بتاعتي هنا. وأنت يا بنتي مالك عاملة في نفسك كده ليه؟ أبوكي عايش؟

اعتدال: أيوة.

زينب الحرامية: وكويس؟ يعني بيصرف عليكي وبيعلّمك في المدارس؟

اعتدال: أيوة، كل اخواتي في المدارس، وأنا في المدرسة.

زينب الحرامية: يا بختك، يا ريت كل البنات لهم أب زيّ أبوكي، وأبوكي هو اللي

ملبّسك الكفن ده؟

اعتدال: ده مش كفن؟ ده لبس ربنا، وأبويا ملوش دعوة. ده حتى أبويا زعلان منّي

ومش موافق على الحجاب، وأمّي رُخرة مش موافقة، لكن لا أبويا ولا أمّي حينفعوني في

الأخرة أو يتعدّبوا بدالي، أنا اللي حاتعدّب.

زينب الحرامية: وتتعدّبني ليه يا بنتي؟ إنت عملت حاجة لسّة؟

اعتدال: الشعر العريان حرام.

زينب: حرام إيه؟ ما حرام إلا الجوع يا بنتي؟

ما حرام إلا إن واحدة زيّي كانت شاطرة وذكيّة يميلّوا بختها بالشكل ده. ده أنا

كنت أشطر واحدة في المدرسة، أشطر واحدة، بس أعمل إيه؟ لو ما كنش أبويا طلّعني

من المدرسة، كنت بقيت زي الستّ اللي واقفة هناك دي، الست الهانم الحلوة دي.

(تشير إلى مديحة.)

(زينب الحرامية تمسح عينيها بكمّها. يبدو عليها الحزن.)

زينب: حاخرج إفراج يوم الأربع، زمان عيالي متلطمّين.

اعتدال: وبعد ما تُخرجني حتّعملي إيه يا زينب؟

زينب: هاعمل إيه؟ حاسرَق تاني. دي مهنتي اللي اتعلمتها، ماعنديش مهنة غيرها. ما حدِّش علمني مهنة غيرها.

اعتدال: وهيمسكوكي تاني ويجيبوكي السجن.

زينب (وهي تترك اعتدال وتسير وحدها في الفناء): وماله؟ ما أنا بخرج وأرجع، وادخل واخرج، يجيبوها ويودُّوها ويودُّوها ويجيبوها، على رأي صباح الشحاتة، (تضحك) حاروح فين؟ كل ده عشان أبويا خرَّجني من المدرسة، مع إني كنت أشطر واحدة، وهو انا لو ما كنتش شاطرة كنت بَقيت حرامية؟ (تكلم نفسها) دي السَّرقة عاوزة شطارة، وأشطر ناس الحرامية، أجدع ناس الحرامية (تُصَفِّق بيديها في سرور).

(اعتدال لا تزال واقفةً مُمسكةً بيديها قُضبان الباب الحديد، شاردةً، ساهمة، تفكر في حزن.)

(تعود إليها زينب الحرامية مرَّةً أخرى، ومعها جردل فاضٍ.)

زينب الحرامية: إوعي يكون كلامي زَعَلِك. أنا مَبِحْبُش أزعَل حد. أنا برضه باعرَف ربنا. بصحيح مش مغطية شعري زيك، والرَّجَالَة بتشوف شعري، لكن حتشوف إيه يا حسرة، هو أنا بقَه فيَّ شعر؟ كنتِ شوفيني من ثلاث سنين؛ كان شعري ده كده (تشير إلى ظهرها بما يفهم أنَّ شعرها كان طويلًا) وكان وشِّي مدورٌ ومنورٌ. كُنت أيامها بسافر بورسعيد. ناس قالولي السرقة في بورسعيد كثير، سافرت بورسعيد.

اعتدال: وسرقت إيه في بورسعيد؟

زينب: ماسرقتش حاجة. هو أنا باسرق؟ ربنا ادَّاني، ربنا هو اللي بيديَّي ما حدِّش غيره بيديَّي. حدِّ غير ربنا بيديَّي؟

اعتدال: طبعًا لأ، الرزق من عند الله.

زينب الحرامية: أيوة كده الكلام أَمَّال. المهم ببورسعيد اتوضَّيت وصلَّيت وقلَّت يا رب ادِّيني مِية جنيه، راح ربُّنا مدِّيني مِية جنيه. صرفتُّهم، راحوا كلهم، صلَّيت تاني وقلَّت يا رب كمان مِية جنيه. راح ربُّنا مدِّيني كمان مِية جنيه، صرفتهم. أصل الدنيا غلا نار، نار، راحت كل الفلوس، والعِيال جاعوا، قلَّت ما فيش فايدة أسرَق تاني.

اعتدال: وليه ما طلبتيش من ربنا يديكي تاني زي المرّات الي فاتت؟ فلوس ربنا حلال، إنما السرقة حرام يا زينب؟

زينب الحرامية: انكسفت أطلّب تاني من ربنا. انكسفت من ربنا. هو أنا يعني عشان حرامية ما اختشيش؟ ده أنا باختشي برضه، والله العظيم باختشي. باختشي من ربنا، ولو كان عندنا مية في العنبر كنت اتوضّيت وصلّيت، لكن ما فيش مية. ما فيش غير جردل البول. انتو عندكم مية، امليلي والنبي الجردل ده من عندكم.

(اعتدال تضع كيس التقاوي على الأرض ثم تأخذ منها الجردل. تدخل إلى العنبر ثم إلى دورة المياه. تعود بالجردل مليئاً بالماء. زينب تأخذه منها وتجري بعيداً.)

(اعتدال تظل واقفة شاردة ساهمة تفكر. سالمة تقترّب منها.)

سالمة: ما تيجي يا صباح تشغلي معانا؛ جرّي الدم في عروك شوية. الدم كان حينسّف في عروقي من القعدة، (تنظر إلى الكيس على الأرض) وإيه ده اللي على الأرض؟
اعتدال: دي تقاوي.

سالمة (تقفز فرحاً): التقاوي، التقاوي (تخطف سالمة الكيس من الأرض وتجري. عليّة لا تزال تفحت الأرض بقوة ونشاط. عزة تجمع الطوب والزّلط وتلقي به من فوق السور العالي. مديحة تسوي الأرض بيديها. نجاة ممسكة بالجردل تجري لتملأه من دورة المياه).

(اعتدال تسير نحوهم وتجلس على الأرض. تراقبهم وهي شاردة.)

(مديحة تأخذ كيس التقاوي من سالمة وتفتحه.)

مديحة: عاوزين حد ينقي الفول.

اعتدال: أنا أنقي الفول.

مديحة: الفولة المسوسة ارميها؛ لو انزّعت مش ممكن تطلع. والفولة الكويّسة حطّيتها في الكيس ده.

اعتدال: حاضر.

(تجلس اعتدال على الأرض وتبدأ تنقية الفول.)

(هادية تخرج من العنبر، ترتدي الحجاب وفي يدها المصحف.)

(تجلس إلى جوار اعتدال وتقرأ القرآن.)

(رشيدة نائمة داخل العنبر. سميرة راحة تصلي وجهها ناحية الحائط. نفيسة

جالسة وحدها تفكر في يدها المصحف.)

(بسيمة راقدة تجلس إلى جوارها لبببة، يشربان الشاي.)

بسيمة: نفيسة دي هي الي فيهم؛ عاقلة وهادية وعمرها ما تتشاكل مع حد. باين عليها بنت ناس.

(لبببة تنظر إلى نفيسة. نفيسة أيضًا تنظر إلى لبببة.)

لبببة: خلي بالك هي بتراقبنا وباين عليها سمعانا.

بسيمة: وأنا بقول حاجة. أنا بقول إنها بنت عاقلة وهادية وباين عليها بنت ناس.

لبببة: اعتدال كمان كويسة.

بسيمة: وهادية كويسة وملهاش صوت إلا لما هي وسميرة يتشاكلوا.

لبببة: كل واحدة فيهم برأي.

بسيمة: تعرفي إن رشيدة عاجباني قوي. وشها حلو زي الملاك. مسكينة حامل

وعيانة. وهي الي صعبانة علي، أنا خايفة إنها تولد هنا؛ دي ممكن تتعب قوي.

لبببة: وحنقعد لما هي تولد كمان؟ ده لسه فاضل عليها كتير قوي.

(فجأة يُسمع صوت طفل يولد، وأصوات نسوة وضجيج.)

بسيمة: واحدة جارتنا في عنبر الأمهات لازم ولدت، يعني كمان مش ناقصين غير

صراخ العيال واللي بيولدوا كمان.

لببيبة: من يومين صحيت بالليل على صوت طفل بيتولد. معرفش جالي إحساس غريب قوي. زي ما أكون اتولدت هنا وها أموت هنا. وتصوّرني نسيت العالم اللي برّه السجن خالص! كأني عمري ما كنت فيه. ونسيت شكل جوزي ونسيت شكل بنتي، ونسيت شكل بيتنا.

بسيمة (في ألم تُشعل سيجارة): لا يا شيخة ده متهيألك بس. تعالي نُخرج في الحوش نشم شوية هوا؛ أنا صدري مكتوم.

(تنهضان وتخرجان إلى الحوش.)

(سميرة لا تزال راكعةً ووجهها للحائط.)

(لا أحد بالعنبر إلا نفيسة. الجميع بالحوش.)

(نفيسة في يدها المصحف.)

(تدس يدها داخل عباءتها وتُخرج قلمًا وورقة، تدوّن بعض الكلمات في الورقة ثم تُخفيها مرةً أخرى وتخفي القلم في العباءة، ثم تفتح المصحف وتقرأ القرآن وهي جالسة في مكانها.)

(تظهر الشاويشة في الفناء ومن خلفها زوبة. تفتح الشاويشة باب الحوش. تدخل زوبة. تُغلق الشاويشة الباب مرةً أخرى.)

الشاويشة (من خلال القضبان): امسحي العنبر ودورة الميه، واغسلي الهدوم، واستعجلي؛ مش عاوزه ضابط المباحث يرجع من سجن الرجال يبجي يلقاك هنا. أنا قاعدة برّة تحت الشجرة واخدة بالي، وزينب القتالة عند البوابة؛ أول ما تشوفه حاتيبي تقولي على طول، بس أنتِ يالا خلصي شغلك؛ مش عاوزه المأمور يكلمني تاني عن النظافة. مفهوم؟

زوبة (في ميوعة): مفهوم يا ماما فوفو.

(زوبة ترى الجميع مُنهمكين في الفحت والزراعة في الحوش.)

الفصل الثاني

زوبة: ده إيه الهمة دي؟ إيه اللي جرى في الدنيا؟

(عزّة في حماسٍ وقد تصبّب العرق منها، تلهث وهي تشتغل بهمة في تسوية الأرض وتبذرُ البذور.)

عزّة: عليّة جت. ولما عليّة تيجي لازم حاجة تحصل.
مديحة: عرفت يا زوبة إن عددنا زاد واحدة جديدة؟
زوبة: طبعا عرفت، هو فيه حاجة في السجن ده تستخبي؟ تعالي يا ماما عزّة أقولك كلمة.

(عزّة تقترب من زوبة. زوبة تأخذها إلى داخل العنبر. تتنحى بها ركنًا بعيدًا وتُخرج من صدرها ورقة صغيرة.)

(نفيسة جالسة تقرأ القرآن. تلاحظهما بدقة.)

زوبة (تهمس): ده جواب من بنتك.

عزّة (تقفز من الفرع): والنبي؟ جالك ازاي؟ مين اداهوك؟ قوليلي، بسرعة.
زوبة (تهمس): وطى صوتك. جالي زي ما جالي بقه. واللي اداهولي اداهولي. خديه اقره بسرعة جوّه دورة المية، وبعد ما تقره احرقه. لازم تحرقه على طول؛ أحسن يجوا يفتشوا يلاقوه معاكي. اوعي يلاقوه معاكي وإلا أنا اللي أروح في داهية.
ماحدش هيعمل لكم انتم حاجة. هم بيخافوا من السياسيين. بيخافوا منكم، لكن احنا ... احنا ... بيبهدلونا.

(عزّة تقبض على الورقة في يدها وتجري داخل دورة المياه.)

(زوبة تلم الهدوم وتضعها في الطشت في ركن العنبر استعدادًا للغسيل. تُمسك المقشة وتكنس العنبر.)

(عزّة تخرج من دورة المياه. تقفز من الفرع وهي تمسح دموعها في تأثر.
تُعانق زوبة وتقبلها في سعادة وامتنان.)

عزّة: الحمد لله، الحمد لله؛ كل حاجة كويسة، وهي كويسة، مش عارفة اعمل لك إيه يا زوبة. عاوزه أبوسك أبوسك كده على طول. مش عارفة أعمل إيه؟
 زوبة: مش عاوزه حاجة خالص، عاوزه كوباية شاي واحدة بس.
 عزّة: بس كده؟ حالاً.

(تشعل الوابور وتضع عليه الإبريق. تصنع لهما كوبين من الشاي. تشربان الشاي معاً وهما جالستان. زوبة تُدخن سيجارة تُخرجها من صدرها.)

زوبة: انتي مش بتدخني يا ماما عزّة؟
 عزّة: كنت بادخن برّه السجن، لكن هنا قلت لنفسي لازم أبطل، لازم أستغني عن السجائر، كنت باسمع دايماً عن مساجين كويسين ضعفوا عشان سيجارة أو حتى نفس من سيجارة.

زوبة: أهو أنا كده يا ماما عزّة، أبيع أمي عشان سيجارة، أبيع بنتي عشان سيجارة.
 عزّة: بنتك؟

زوبة: لأ لأ إلا بنتي ياسمين.
 عزّة: تعرّفي أنا أول ما شفت خط بنتي وأنا جوّه في دورة الميه، بقت دموعي نازلة ومش شايفة اقرا، وفرحانة، عاوزه أنط من الفرحة، ومش عارفة أعمل إيه، عمري ما فرحت بالشكل ده.

زوبة: هو ده السجن، تفرحي قوي وتحزني قوي، تخافي قوي وماتخافيش خالص. كل حاجة في السجن لها طعم، حتى الشاي الأسود المر ده اللي بنشره طعمه حلو.
 عزّة (تشرب الشاي بلذّة شديدة): أذ طعم شاي شربته في حياتي.
 زوبة: عشان فرحانة بجواب بنتك.

عزّة: وفرحانة إني حرّكت جسمي واشتغلت. جسمي كان اتصلّب من قلة الحركة. حاسّة كده بنشاط جديد وقوة جديدة، وكأن السجن بقى فيه أكسجين.

(تدخل عليّة إلى العنبر تتصبّب عزّة. تتجّه نحو دورة المياه.)

الفصل الثاني

عليّة: لازم آخذ دُش.

عزّة: نفسي أنا كمان آخذ دُش بعد العرق ده، بس الميّه ساقعة.

عليّة: مش ضروري تنزلي تحت الميّه مرة واحدة، شوية شوية، وبعدين تتعوّدي.

يالا قومي، قومي، ده الميّه الباردة بتفوّق بشكل!

(عزة تنهض. تُخرج من حقيبتها نصف الفوطه وصابونة.)

عليّة: ادخلي أنتِ الأول يا عزّة؛ أنا حاقعد شوية لغاية ما عرقي ينشف.

(عزّة تدخل دورة المياه وهي مُتردّدة.)

عزّة: أنا متعوّدة على الميّه الدافية، لكن هاحاول، شوية، شوية، شوية.

(تتراقص وهي تمشي، وتُغني لنفسها وهي تدخل من باب دورة المياه.)

عزّة (تغني وترقص): شوية، شوية، شوية، حاسب على مهلك ماتزعلنيش.

زوبة (تكلم عليّة): بعد ما تستحمي هاتي غيارك أغسله.

عليّة: كتر خيرك، أنا حاغسله أنا، متعوّدة أغسل هدومي بإيدي.

زوبة: ليه؟ ما عندكيش حد يغسلك؟

عليّة: لأ.

زوبة: أنا عمري ما غسلت هدومي في بيتي. وبيتي يا سلام لو شفتيه، زي بيوت

الناس الهايلايف تمام، هنا بس في السجن اللي باغسل، وكل ده عشان حتة سيجارة، إنما

تعملي إيه للمزاج بقّه، أنا أصلي صاحبة مزاج.

عليّة: وأنا صاحبة مزاج أنا كمان.

زوبة: والنبي؟ ومزاجك إيه بقّه؟

(تسكت زوبة لحظة، ثم تضحك.)

زوبة: مزاجك إيه يا ترى؟ سجاير والأ برشام والأ ماكس والأ اسفكس؟

(عليّة تضحك مرحة جدًّا. تشاركها الضحك زوبة.)

عليّة: إيه؟

زوبّة: مزاجك إيه بصحيح؟

عليّة: مزاجي؟ مزاجي الدنيا، باحب الدنيا، باحب السما، باحب الشمس، باحب الهوا، باحب الناس.

زوبّة: عمرك ما دَخَنْتِ سجاير؟

عليّة: لأ، وأدخّن ليه؟

زوبّة: أُمال أنا بادخّن ليه؟

عليّة: عادة، زي أي عادة تانية.

زوبّة: والعادة الواحد يغيّرُها أَرَاي؟

عليّة: المهم إنك تصمّمِي. الإنسان لما يصمّم ويكون عنده إرادة، لا يُمكن لحاجة تهزّمه.

زوبّة: والواحد يصمّم أَرَاي؟

عليّة: تسألِي نفسك انتِ بتدخّني ليه؟

زوبّة: بدخّن ليه؟ ليه؟

(زوبّة تشرد لحظةً طويلةً ساهمة.)

زوبّة: بدخّن عشان ماقدَرش أعيش من غير تدخين.

أغسل كوم الغسيل ده كله عشان سيجارة. أبيع نفسي عشان سيجارة واحدة.

عليّة: تبيعي نفسك؟

زوبّة: طبعا أبيع نفسي، نفسي ده إيه؟ ما أنا بعته خلاص. بيعت نفسي وبيعت

جسمي، والي راح راح. أُمال أنا بادخّن ليه؟ وبأخد البرشام ليه؟ عشان أنسى إنِّي بيعت

نفسي (تشرد لحظةً وهي تُدخّن) بادخّن عشان أنسى نفسي.

عليّة: وإذا ما دَخَنْتِش؟ إذا مالقيتِش سيجارة مثلاً.

زوبّة: أحسّ إنِّي أنا مخنوقة. أحسّ إنني مش طايقة الدنيا ومش طايقة نفسي، إنني

كارهة الدنيا كلها وكارهة نفسي أكثر من الدنيا.

عليّة: حدّ يكره نفسه، ونفسه حلوة كده؟ أنا لو مكانك يا زوبة لا يُمكن أكره نفسي. لازم أحبّ نفسي؛ لأنّ نفسك حلوة قوي.

(زوبة تقفز فجأةً وتسقط السيجارة من فمها على الأرض.)

زوبة (في فرح مفاجئ): والنبي؟ أول مرّة أسمع الكلمة الحلوة دي.

(تأخذ السيجارة من الأرض وتضعها في فمها. يعود إليها الحُزن والألم مرّةً أخرى.)

زوبة (في ألم): يا ريت كان فاضل فيّ حاجة حلوة. يمكن زمان وأنا صغيرة، لكن دلوقتٍ خلاص. وأنا صغيرة كان نفسي أتعلّم وأعيش عيشة حلوة. كنت حاسّة إنّي أنا حلوة، قصدي يعني حلوة بحقيقي، مش زي دلوقتٍ. دلوقتٍ الواحدة فينا مزوّقة بس، لكن حلوة مفيش. على رأي صباح الشحاتة، من برّه مزوّق ومن جوه مليون دُخان. أهو أنا كده دلوقتٍ، من برّه مزوّق ومن جوه صدري كله دخان، لكن زمان، زمان حاجة تانية، كنت كويّسة.

عليّة: وأنت كويّسة يا زوبة دلوقتٍ كمان.

زوبة: أنا كويّسة؟ حدّ يقول على واحدة في عنبر الدّعارة كويّسة؟ (تسكت لحظة) واحدة ساقطة، باعت شرفها، وباعت نفسها (تمسح دموعها وتبكي).

عليّة: الدموع دي يا زوبة معناها إنك مابعتيش نفسك، إنك لسه بتتألّم إنك لسه بتصارعي عشان تشدّي نفسك من تحت الأرض وتطلعها برّه في الشمس والهوا. إنت بتدخّني عشان تنسي الألم ده، والمفروض إنك ماتدخّنيش عشان ماتنسيش. لازم تفتكري إنك تحت الأرض، إنك في سجن، وإنك لازم تصارعي عشان تشدّي نفسك وتطلعها برّه في الشمس والهوا.

(عليّة تنظر طويلاً في عينيّ زوبة.)

عليّة: أنا باعرف الناس من عينيهم، وأنت يا زوبة إنسانة طيبة وكويّسة وحلوة قوي من جوه. أنت لسه مابعتيش نفسك، لسه عندك إنسانية، لسه عندك قلب يقدر يحب ويقدر يساعد غيره ويديّ غيره من غير بُخل ولا أنانية. أنت مش أنانية يا زوبة؛ لا يمكن تنامي ولك زميلة في العنبر جنبك جعانة.

زوبة: جعانة؟ لا يمكن أبداً، ده حتى السجارة اللي ما أقدرش استغنى عنها، باقسّمها أنا وهي، كل واحدة فينا تأخذ نفس.

عليّة: ومش بس كده، أنا باحسّ إنك جريئة ومش بتخافي، وممكن تقولي رأيك لأي حد، قصدي ماتخافيش تقولي رأيك لأي حد.

زوبة: إلا دي؛ أنا بقول للأعور أعور في عينه. ده مرّة خدوني التأديب وضربوني ضرب!

عليّة: وضربوكي ليه؟

زوبة: حاجة هايفة والله، كنت ماشية في الحوش راحت الضابطة شاتماني وقالت لي يا جبانة. ردّيت عليها وقلت لها أنتِ اللي جبانة. والله العظيم هي بتخاف من الأمور أكثر منّي، ولما تشوفه جاي من بعيد تترعش كده. (تحرك يديها على شكل الرعشة) هي تترعش من الأمور، والمأمور يترعش من المدير، والمدير يترعش من المدير الكبير، وكلهم بيخافوا من بعض، إلا ضابط المباحث، كلهم بيخافوا منه. (تضحك) مرة شفّته في الحوش بيشتم واحدة من عندنا شتيمة وحشة خالص، استخبيت ورا الحيط ورحت رمياه بطوبه. الراجل ده وحش خالص سمعت إنه ناويلك على حاجة.

عليّة: أنا برضه زيّك يا زوبة مش باخاف، وأقول للأعور أعور في عينه. أنا أحب أقول رأيي. غلط صح أحب أقوله. الإنسان عندي هو اللي يقدر يقول رأيه ولا يخافش، ومدام بتقدري تقولي رأيك ولا تخافيش تبقي إنسانة، إنسانة شريفة.

زوبة (في ألم): شريفة؟ حدّ ممكن يقول عليّ شريفة؟

عليّة: إنّت شريفة يا زوبة، وعشان كده بتصارعي وتتألّمي عشان تشدّي نفسك من تحت الأرض ومن الطين اللي رموكي فيه. بتدخّني عشان تنسي إنك في الطين. لا يمكن تنسي، لا يمكن تبطل صراع، لا يمكن. يإما تشدي نفسك وطلعيها لبره في الشمس والهوا يإما تموتي وإنّت بتصارعي. وإنّت مش ممكن تموتي، مش ممكن تنهزمي؛ باين في عينيك إنك قوية.

زوبة (في حماس): أنا ماحدّش يغلبني. الراجل جوزي طولي مرّتين. ومرة مسكّته ضربته وغلبته. مرّة كنت هاقتله، لكن قلت ما يستاهلش القتل. اودي نفسي في داهية عشانه ليه؟ تعرّفني إيه اللي قاسمٍ وسطي؟ إيه اللي رميني في الطين ومخلّيني مستحمله الطين؟ هي بنتي. لازم أعلمها أحسن تعليم، وأربّيها أحسن تربية.

عليّة: اسمعي يا زوبة، أنا أم زيّك تمام، وافهم كلامك، واعرف إحساس الأم (في ألم) أنا عندي ابن عمره أيام وسيبته وجيت السجن، (في تحدي) ومستعدّة أفضل في السجن وأموت في السجن. ليه أنا باعمل كده؟ كان ممكن أقول لنفسي سجن إيه وعذاب إيه؟ ما أفضل في بيتي وأربي ابني، كل الناس بيقولوا كده، (في شرود) كل الناس بيقولوا عاوزين نربي أولادنا. بتسمعي الناس كلهم يقولوا عاوزين نربي أولادنا، من أول الشاويشة لغاية المأمور، وضباط المباحث، والمدير، والمدير العام واللي فوق فوق المدير العام. تقابلي واحد مُحترَم ومُتعلّم وفاهم وتشوفيه خايف ومش قادر يقول رأيّه، أو يقول رأي تاني غير رأيّه، وتساّليه ليه؟ يقولك عاوز أربي ولادي. (في غضب) هي تربية الولاد دي إيه؟ أكل وهدوم ومصاريف مدارس؟ الولد اللي بيشوف أبوه جبان ومش قادر يقول رأيّه بيطلع جبان وما يقدرشي يقول رأيّه. الولد اللي بيشوف أبوه بيبيع نفسه أو بيبيع رأيّه بالفلوس، بيطلع بيع نفسه ورأيّه بالفلوس. تفتكري يا زوبة إن الإنسان اللي بيع نفسه هو إنِت بس؟ تبقي غطانة. فيه ناس تبيع جسمها عشان الفلوس، وفيه ناس تبيع رأيها وعقلها بالفلوس، واللاتنين زي بعض. يمكن بيع الجسم أخف من بيع العقل؛ ولأن دول ودول لما يربوا ولادهم لازم ولادهم يطلعوا زيهم. (تسكت لحظة) وأنا برّه السجن كنت بين حاجتين، يا أبيع رأيي يا أدخل السجن. ماقدرتش أبيع نفسي ودخلت السجن. مافيش أم باعت نفسها تقدّر تربي ابنها أو بنتها. ومافيش أب باع نفسه بيقدر يربي ابنه أو ابنته. هو اللي بيبيع نفسه يا زوبة يفصل معاه إيه؟ ويربي بإيه؟ الواحد يربي بنفسه، واللي مالوش نفس مالوش حاجة يربي بيها، ومالوش حاجة في الدنيا، وإن كان عنده بليون جنيه.

زوبة (في ألم): ده مُمكن تفضلي في السجن على طول وتموتي في السجن.
عليّة: أحسن ما أموت برّه السجن. على الأقل جوّه السجن أحسّ إنني لسّه بصارع، لسه عندي قوّة أشدّ بيها نفسي من تحت الأرض واطلّعها في الشمس والهوا، لكن برّه السجن كنت هاموت وأفضل رايحة جايّة من البيت للشغل، وابني يطلع زيّ ميّت ومالوش رأي.

(زوبة صامته شاردة، تفكر وهي مُطرقة إلى الأرض.)

(تخرج عرّة من دورة المياه شعرها مبلول. تشعر بانتعاش وحيويّة ونشاط.)

عزّة: يا سلام! الميه الباردة مُنعشة بشكل! في الأول خُفت وجِسمي ارتعش، لكن حطّيت نفسي تحت الميه شوية شوية شوية. دراعي الأول، وبعدين الدراع الثاني، وشوية شوية نزلت كلي تحت الميه. بعد شويّة ماحسيتش إن الميه باردة، لقيتها دافية.

(زوبة ترفع رأسها وتنظر إلى عليّة.)

زوبة: وعشان كده أنتم في عنبر السياسة واحنا في عنبر الدعارة. في الدّعارة الناس تبيع جسمها.

عزّة: وفي السياسة تبيع رأبها، أو ترفض تبيع رأبها يقوموا يحبسوهم في السجون. **زوبة:** أنا عمري ما فهمت في السياسة.

عزّة: هي السياسة إيه يا زوبة؟ السياسة إنك تقولي رأيك. لازم كل واحد يقول رأيه في كل حاجة، لازم كل واحد يقول ...

زوبة: يقول إيه مثلاً؟

عزّة: يقول مثلاً إن مش معقول إن واحد يبقى عنده ملايين وواحد تاني مش لاقى ياكل. يقول مثلاً إن واحدة زيك حلوة وذكيّة وعندها إنسانية وممكن تعرض نفسها للضرب عشان تجيب لأمّ جواب من بنتها. أراي واحدة زيك تغسل كوم هدوم بسيجارة أو تبيع نفسها عشان تعلم بنتها؟ ده شيء مش مفروض يحصل، وإذا حصل يبقى فه حاجة غلط في الدنيا.

زوبة: الدنيا كلها غلط في غلط، اللي يسرق ويكذب هو اللي يعيش ويكسب، والشريف يجوع والشريفة تجوع. حتى في المهنة بتاعتنا مش كل واحدة بتدخل السجن. فيه بنات مربطة مع البوليس. كل شوية تدفع، كل شوية تدفع لهم، وتفضّل برّه السجن، وحتى إذا دخلت السجن ماتطولش، تخرج على طول، المحكمة تخرّجها؛ أصلها بتدفع هنا وهنا، تدفع للمحامي وتدفع للقاضي، وتدفع للدنيا كلها. الدنيا كلها عاوزة فلوس، فلوس، الدنيا بلاعة فلوس، وجوه السجن زي برّه السجن. الكل عاوز فلوس واللي معاها فلوس هنا تعيش ملكة، زي الحاجة شلبية في عنبر المُخدّرات، عايشة في السجن زي الملكة وعندها كل حاجة، حتى التليفون، تليفزيون ملون ...

عزّة (في سخرية): عنبر المُخدّرات يشوف تليفزيون ويسمع راديو، وعنبر الدّعارة فيه ورق وأقلام وكتب، وعنبر السياسيات مايشوفش جورنال ولا كتاب، الدنيا هنا معكوسة ومشقلبة.

عليّة (تضحك في سخرية): بالعكس، هي مشقلبة برّه السجن، لكن في السجن معدولة شوية، برّه السجن الأمور متغطّية، لكن جوّه السجن كل حاجة على بلاطة، مافيش زواق، مافيش من برّه مزوّق ومن جوّه مليون دخان، على رأي صباح، فيه دُخان من برّه ومن جوّه فيه دخان.

عزّة: مدخنة السجن طول النهار تحديف علينا دُخان أسود وصدرنا اتملى دخان.
عليّة: تعرفي يا عزّة؟ أنا في السجن نفسيّتي أحسن من برّه. شايفة الأمور أوضح. شايفة الحقيقة أكثر. برّه السجن كنت تعبانة تعبانة. كنت حاسة بغربة. شايفة الزواق من برّه والدخان من جوّه وبقول اللي أنا شايفاه، واللي حواليا يقولولي يا شيخة اسكتي، إنت شايفة حاجة؟ ده الدنيا كلها مزوّقة وحلوة والناس كلها مبسوطة. إنت زعلانة ليه؟ وحسّيت بغربة. أحياناً كنت أشك في عيني، وأقول جايز مش شايفة كويس، وأبص قوي وأدقق، وأشوف الدُخان الأسود برّه وجوّه، وأقول أنا شايفة دُخان، يقولولي أبداً؛ ده زواق وكل حاجة تمام. أقولهم ده دخان يقولولي أبداً؛ ده صواريخ الأفراح، ده الانتصارات، وكل حاجة تمام. أقولهم دي الناس تعبانة وشقيانة وكل مُدّة يتعبوا أكثر ويشقوا أكثر والخير بيقلّ ويقلّ ويقولولي أبداً؛ دي الناس مستريحة ومبسوطة وفرحانة والخير بيزيد بيزيد ويزيد.

عزّة: الخير كان بيزيد عند ناس ويقلّ عند ناس. الخير كان بيزيد عند ثلاثة أربعة، ويقلّ عند مليون.

(سميرة كانت تُصلي أو تُسبح. تلتفتُ ناحيتهم وتقول بصوت عالٍ حاد):

سميرة: الخير من عند ربنا.

(تدخل اعتدال تجري في نشاطٍ وقد شمّرت جلابها الطويل، تحمل جردلاً.)

الإنسان

اعتدال (في حماس): أنا اللي حاروي الفول.

(ترى زوبة وعلية وعزة يشربن الشاي).

اعتدال: أيوة نفسي في كباية شاي.

عزة: تعالي، فاضل في الإبريق شاي يا اعتدال، تعالي معنا (تجلس اعتدال إلى جوار عزة).

اعتدال: تعرفي إنك عاجباني قوي وقلبك طيب قوي ومستخسراكي قوي.

عزة: ومستخسراني في إيه؟

اعتدال: في عذاب القبر.

عزة: عذاب القبر! ليه بقه؟

اعتدال: عشان معرية شعرك ومابتصليش.

عزة: وأنتِ تعرفي يا اعتدال إنك عاجباني قوي، وذكية قوي، ومستخسراكي قوي.

اعتدال: في إيه يا ترى؟

عزة: في إنك تحرمي نفسك من التعليم وتسيبي المدرسة عشان النقاب. حرام عليك يا شيخة عملي في نفسك كده. شفتي البنات الي انحرموا من التعليم في صغرهم طلعا إيه؟

زوبة (تضحك): لو كان أبويا علمني ولا جوزنيش الراجل ده، كان زماني بقيت أستاذة كبيرة، وبدل عنبر الدعارة كنت بقيت معاكم في عنبر السياسة.

اعتدال: أنا حاتجوز راجل كويس يعرف ربنا، يحافظ عليّ وعلى أخلاقي.

زوبة: ويصرف عليك؟

اعتدال: وماله لما يصرّف عليّ؟ عيب الراجل يصرّف على امراته.

زوبة: لأ مش عيب، لكن افرضي معهوش فلوس كفاية. الراجل الشريف دايماً معاهوش فلوس. افرضي معاه فلوس لكن اتجوز عليك واحدة تانية، افرضي طلقك، افرضي مات! مات موة ربنا أو ضربه أوتومبيل وساب لك قُرطة عيال، عملي إيه يا شاطرة؟ تشتغلي غسالة والأ حرامية والأ تَلْفِي على الأبواب تِسْحَتِي عليهم زيّ صباح المُتسوّلة؟

اعتدال (تنهض فجأة وتُمْسِكُ الجردل وتتَّجِه ناحية دورة المياه): ولية أفكر في كل المصايب دي؟

زوبة: هي دي مصايب؟ دي يا حبيبتي حياة كل يوم. ياما رجالة شُرفا وكويسين بس معاهومش فلوس، وعاوزين الواحدة تشتغل وتساعدهم. وماله لما الواحدة تشتغل شُغلة محترمة وشريفة. وياما رجالة بتتجوز على مراتها واحدة واثنين وثلاثة وأربعة. وياما رجالة بتطلق بسبب ومن غير سبب، أو الراجل عشق على امراته واحدة تانية، وياما رجالة بتموت موة ربنا، وياما رجالة بتطسها أوتومبيل، وياما رجالة بتسافر برّه تدور على رزقها ولا ترجعش، وياما وياما وياما ... دي يا حبيبتي حياة كل يوم، حدّ ضامن حاجة؟ فيه واحدة تَضْمَن جوزها أو تَضْمَن إيه اللي يحصل لجوزها، أو إيه اللي يحصل بكرة؟

(اعتدال وهي تدخل دورة المياه لتملأ الجردل.)

اعتدال: الضمان على الله، يا ترى مين يعيش، يبقى ربنا يرزقني، الرزق على الله. **زوبة:** لكن ربنا قال اسعى يا عبد وأنا اسعى معاك. ربنا ماقلش إن الواحد يقعد في حتّة والرزق ينزل من السما.

(تدخل اعتدال دورة المياه ومعها الجردل.)

(تدخل سالمة وهي تُنادي على اعتدال.)

سميرة (في غضب وهي جالسة تقرأ القرآن تخاطب زوبة): والله عال! ده اللي ناقص، إن واحدة زيّك يا زوبة تقعد تبوظ عقل البنات! إنت مش ممكن تدخل هنا، امشي اطلعي برّه.

سالمة (في دهشة): إيه اللي حصل؟ ليه بتطردوها يا ستّ سميرة؟ **سميرة** (تصرخ في ضيق): وأنت مالك يا جاسوسة أنتِ كمان؟ ولك عين تتكلمي؟ أنا حرة، أطردوها وأطردوها.

(الجميع يدخلن العنبر على صوت سميرة. عليّة تنهض تسير نحو سميرة وتقترب منها.)

عليّة: لأ يا أستاذة سميرة، إنْتِ مش حرة؛ العنبر ده مش بتاعك لوحك، العنبر بتاعنا كلنا. مش من حَقِّك إنَّك تطرُدي زوبة. إذا كنتي أنتِ مش عاوزاها هنا في العنبر فيه غيرك عاوزها، إذا كنتِ بترفعي صوتك عليها ومش بتحترمها فيه غيرك ببحترمها. اللي بتغسل لك هدمك، وتمسح لك العنبر، وتمسح لك دورة الميه، وتموت لك الصراصير؟

سميرة: وهيَّ بتمسح ليَّ أنا بس؟ هو العنبر بتاعي أنا بس؟

عليّة: أيوة، العنبر مش بتاعك أنتِ بس؛ وعشان كده مش من حَقِّك إنَّك تطرُدي زوبة منه. العنبر بتاعنا كلنا، واحنا كلنا اللي نقرّر زوبة تفضل والأ تخرج.

(زوبة تجري بسرعة خارج العنبر وخارج الحوش.)

(سالمة واعتدال ومديحة ونجاة يجرين وراءها وينادين عليها.)

سالمة: تعالي يا زوبة.

اعتدال: تعالي يا زوبة.

مديحة: تعالي يا زوبة.

نجاة: تعالي يا زوبة.

(عزّة أيضًا تخرج إلى الحوش وتنادي عليها.)

عزّة: تعالي يا زوبة.

(سالمة تمسك زوبة من يدها. زوبة تجلس في الحوش وترفض العودة إلى العنبر. تُخفي رأسها بين ركبتها وتبكي في صمت.)

(يتركها جالسة في الحوش تبكي ويدخلن العنبر ليتابعن ما يحدث داخل العنبر. عليّة واقفة في مواجهة سميرة. لا تزال تتكلم. بسيمة جالسة على مرتبتها تدخن. لبيبة إلى جوارها وإلى جوارهما مديحة جالسة. الجميع يتابعن ما يحدث في صمتٍ وانتباه، سالمة جالسة بجوار هادية.)

الفصل الثاني

عليّة: ثم مش من حَقِّ كمان إنك تتهمي زميلة لنا في العنبر بأبشع تهمه مُمكنة، إنها تكون جاسوسة؟

سميرة: أيوة سالمة جاسوسة. أنتِ لسه جاية جديد وماتعرفيهاش، احنا الي عارفينها، كل العنبر عارف إنها جاسوسة.

(عليّة تتلَفَّت حولها في العنبر وتنظر إلى جميع زميلاتها في العنبر في دهشةٍ وتساؤلٍ.)

عليّة: كل العنبر؟ مين؟ أنا مش عارفة؟ يا جماعة أنتم كلكم موجودين أهه. الأستاذة سميرة بتقول إن سالمة جاسوسة. مين فيكم رأيها زيّ رأي الأستاذة سميرة؟

(الجميع صامتات، تنظر كل واحدةٍ إلى الأخرى.)

(الصمت يطول ثم تبدأ بسيمة الكلام.)

بسيمة: بصراحة سالمة كان لها تصرُّفات تخليّ أيّ حدٍ يشكُّ فيها. طول الوقت تحاول تعمل ساذجة وهابلة. ودي تصرُّفات بصراحة خلّتني أنا أشك فيها، وأنا بطبيعتي ماحبش أشكُّ في حد. في رأيي إن المُتَّهم بريء حتى تثبّت إدانته.

عليّة: طيب يا أستاذة بسيمة مدام المُتَّهم بريء حتى تثبّت إدانته، يبقى سالمة بريئة حتى تثبت إدانتها. وأنا لغاية دلوقتٍ مش شايفة أي سبب أو أي دليل يدل على إنها جاسوسة. إذا كانت لها تصرُّفات ساذجة أو هابلة زيّ ما بتقولي، فده مش سبب عشان نتهمها أو نشك فيها. بالعكس، الجاسوسة لا يُمكن تكون ساذجة.

بسيمة: الجاسوسة ممكن تدّعي الساذجة عشان تغطي على نفسها.

عليّة: ممكن، لكن ليه ماتكونش سالمة ساذجة بحقيقي؟ ممكن تكون صحيح مش عارفة حاجة.

(نفيسة تتدخّل فجأةً في الحديث.)

نفيسة (بغضب): حد مش عارف هو في السجن ليه؟ علينا الكلام ده؟

عليّة: أنا شخصياً مش عارفة أنا ليه في السجن. أنا عمري ما اشتغلت بالسياسة ولا دخلت حزب ولا لجنة ولا ليّ أي نشاط سياسي. مجرد قُلت رأبي. أنا معرفش أنا هنا ليه.

عزّة: وأنا كمان معرفش أنا هنا ليه.

مديحة: ولا أنا.

نجاه: ولا أنا.

اعتدال: ولا أنا.

بسيمة: لآ، أنا عارفة أنا هنا ليه، أنا هنا لأنني وهبت نفسي للدفاع عن حقوق الشعب، أنا باشتغل بالسياسة في العلن زيّ زيّ غيري. مش باشتغل في السرّ أو تحت الأرض. أنا هنا لأن ليّ دور كبير ومسئولية كبيرة تجاه الوطن.

سميرة: وأنا عارفة أنا هنا ليه. أنا هنا لأنني باعبد ربنا وعارفة ربنا في عالم كلّه كفرة ومايعرفوش ربنا.

(لبببة وهادية صامتان تتابعان ما يدور.)

(رشيدة راقدة لا تزال مريضة بعض الشيء، لكنها تتابع ما يدور باهتمام.)

عليّة: احنا اتناشر واحدة هنا، نُصنا تقريباً مش عارفين هم هنا ليه. يا جماعة مش معقول نتهّم زميلة لنا زي سالمة بتهمة كبيرة كده بدون دلائل. مش كده والأ إليه يا أستاذة بسيمة؟ المتهم بريء حتى تثبت إدانته.

سميرة: أبوة فيه دلائل؛ ضابط المباحث خدها على جنب قدامنا كلنا وشوشها بكلام مارضيتش تقولنا عليه. بينها وبين ضابط المباحث أسرار، وبتنقل له أسرارنا، وهو اللي مشغلها هنا.

عليّة: وهو لو كان مشغلها هنا يا جماعة كان يكشفها كده قصاد الجميع. دول ناس مُدربين وعارفين شغلهم كويس. وخصوصاً دلوقتِ بقّه فيه إتقان وكفاءات وطرق علمية.

عزّة: لا يمكن يكون ده دليل أبداً. أنا شخصياً باعتقد إن سالمة لا يُمكن تكون جاسوسة. صحيح هي كلامها كتير وسانجة زيادة عن اللزوم، لكن مافيش أي حاجة ضدّها. أنا رأبي إن سالمة بنت طيبة وقلبها صافي.

اعتدال: قلبها صافي زيّ اللبن.

نجاة: أيوة بصحيح.

مديحة: سالمة طيبة بس ظروفها سيئة.

هادية: فعلاً ظروفها صعبة، لكن هي بنت كويسة جداً، وأنا شخصياً عرفتها كويس لأننا بنأم جنب بعض، وبنحكي لبعض همومنا.

(هادية تُمسك يدَ سالمة جوارها.)

عليّة: متهيّأ لي يا أستاذة سميرة إن معظمنا في العنبر شايفين إن سالمة لا يمكن تكون جاسوسة. مافيش داعي إنك تقولي عنها إنها جاسوسة؛ هي برضه زميلة لك. **سميرة** (في غضب): أرجوك، هي مش زميلتي، وأنا حافضل أعتقد إنها جاسوسة. أنا على يقين من ذلك، أنا على يقين.

عليّة: واليقين ده يا أستاذة سميرة جالك منين؟

سميرة (وهي تُسبح): من ربنا.

عليّة (في دهشة): ربنا هو اللي قالك إنها جاسوسة؟

سميرة: أيوة ربنا، ربنا بيقولي حاجات كتير، ربنا دايمًا يقول لأي إنسان مؤمن قلبه صافي ونقي. عمر ما ربنا قالي حاجة وطلعت غلط؛ لأنني باعرف ربنا. **عليّة:** هو أنتِ بس اللي بتعرّفي ربنا في العنبر؟ كلنا بنعرف ربنا. **سميرة** (بجدّة): لأ مش كلكم.

عليّة: ربنا مش مُمكن يحبّ الظلم، وإنّ بتظلمي سالمة بالشكل ده.

سميرة: لأ مش باظلمها، أنا مُتأكدة إنني مش باظلمها.

(سالمة جالسة إلى جوار هادية. تُطرق سالمة إلى الأرض. تُخفي وجهها بين ركبتيها وتبكي.)

هادية (بغضب): لأ إنّ بتظلميها يا سميرة.

سميرة (في حدة): لأ، مش باظلمها، أنا مُتأكدة.

هادية: وإيه اللي أكّد لك.

سميرة: ربنا، ربنا بياكد لي يوم بعد يوم إنها جاسوسة.
هادية: وإيه رأيك بقه إن ربنا بياكد لي يوم بعد يوم إنها مش جاسوسة.
سميرة: كلام ربنا لي هو الصح.
هادية: وليه مايكونش كلام ربنا ليِّ أنا هو الصح؟ هو ربنا بتاعك أنتِ بس، ربنا بتاعنا كلنا. ربنا بتاعي زيِّ ما هو بتاعك.
سميرة (بغضب): لأ، ربنا بتاعي أنا.
هادية: لأ، ربنا بتاعي أنا.
سميرة: أنا عرفت ربنا.
هادية: وأنا عرفت ربنا.
سميرة: أنا شفت ربنا، إنتِ ماشفتيش ربنا.
هادية: مين قال إني أنا ماشفتش ربنا؟ أنا شفت ربنا كمان.
سميرة: أنا شُفت ربنا قبلك.
هادية: لأ أنا اللي شُفت ربنا قبلك.
سميرة (في غضب شديد): أنتِ ماشفتيش ربنا خالص؛ إنتِ فراموية.
هادية (في غضب أشد): أنتِ اللي خومينية وعلوية.

(فجأة يُسمع صوت الشاويشة من الخارج تفتح باب الحوش، وتكلم زوبة التي كانت جالسة في الحوش.)

الشاويشة (في اضطراب): الراجل ضابط المباحث واقف على البوابة وجاي حالاً دلوقت. اجري ليشوفك هنا يودِّينا في داهية. النهاردة مش فايت.

(زوبة تجري بسرعةٍ وتختفي.)

(الشاويشة تدخل إلى العنبر في سرعةٍ واضطراب.)

الشاويشة: ضابط المباحث جاي دلوقت. الراجل مش عارفة جري له إيه. جهز زوزانة في التأديب تجهيز غريب قوي. رايح جاي يجهز فيها. عمرنا ماشفنا حاجة بالشكل ده. الشر راكبه وعينه زيِّ ما تكون بتطُقُّ شرار. بقى لي عشرين سنة في السجن ده عُمرِي ما شُفت راجل شرَّاني بالشكل ده، وعمرِي ما شُفت الأجهزة دي في التأديب.

الفصل الثاني

الرجالة بتوعه داخلين خارجين يشيلوا حاجات عُمرنا ما شُفناها، والسجن واقف على رجله. الناس كلها خايفة. أنا جسمي كله بيتنفّض.

(الشاويشة تنظر إلى عليّة. الجميع ينظرون إلى عليّة.)

الشاويشة: يعني يا ستّ عليّة مش كُنت تطاوعيه على قد عقله وخلص.

عليّة: أطاوعه ازّاي يا شاويشة، هو الغلطان مش أنا.

الشاويشة: أيوة هو غلطان، والغلط راكبه من فوق ومن تحت، لكن هو الي معاه القوة، أنا خايفة عليك، هو يقدر يكسرك، وأنا مستخسراكي.

عليّة: ماحدّش قدير يكسرنى طول حياتي يا شاويشة. والدي الله يرحمه ماكسرنيش. أخويا الكبير كان عاوز يكسرنى مرّة.

مرّة وأنا صغيرة أخويا حاول يكسرنى. كان عندي عشر سنين وأخويا ضربني قلم على وشّي، راح والدي ضربه قلم وقاله طول ما أنا عايش إياك إيدك تتمدّ عليها. ولما والدي مات كنت أنا كبرت وأخويا كان سافر واتجوّز. وحاول جوزي يكسرنى، ماقدرش؛ لأنّي قدرت أسببه وقدرت أعيش من غيره. وفي الشغل حاولوا يكسروني ماقدروش. وكان دايمًا والدي يقوّل الطفل الي أبوه عمره ما ينكسر، ما ينكسرش، والي يخاف من أبوه يفضل طول عمره خايف. أنا يا شاويشة ماخُفتش من أبويا، عاوزاني أخاف من حتّة ضابط؟ ده أنا جيت السجن هنا عشان ماخُفتش من حدّ. عاوزاني أخاف من حتّة ضابط؟ إذا كنت ماخُفتش من الي أكبر منه، عاوزاني أخاف منه؟

(سالة تقفز وتُعاقب عليّة.)

سالة: والنبي أنا بحبّك. أنا كمان مش باخاف من حد.

(تظهر في الحوش زينب الحرامية تجري خائفةً وتدخل إلى الحوش. الشاويشة تطرّدها.)

الشاويشة: اخرجي يا بتّ من هنا، ضابط المباحث جاي.

زينب الحرامية: يقولوا الستُّ عليّة وقفت قَدَّامه ولا خافتش منه وإنه ناويلها على الشر.

الشاويشة: طب اطلعي يا بتُّ برّه الحوش.

(تظهر زينب القتالة أيضًا تجري نحو الحوش وتدخل.)

الشاويشة: والنبي يا زينب اطلعي برّه؛ الراجل جاي دلوقت، بلاش تودّيني في داهية.

زينب القتالة: كلام إيه الفارغ ده؟ ازّاي الراجل ده يحطُّ عليّة في التأديب؟ بقّه مالقاش غير عليّة؟ ده ضُفرها يساوي مليون راجل زيّه.

الشاويشة: طب اخرجي بسرعة، مش عاوزاه يشوف واحدة منكم جوّه الحوش بتاعهم، ممنوع حد يخُش عندهم.

زينب القتالة: أخرج ازّاي؟ مش خارجة، دي عليّة دي حبيبتي.

(الشاويشة تدفع زينب خارج الحوش، وتُحاول غلق الباب.)

(تأتي بعض المسجونات الأخرى من بينهنَّ صباح المتسولة، صباح تعرُّج وتجري في اضطرابٍ نحو الحوش.)

صباح المتسولة (وهي تُغني):

بنت الحلال في السجن مرميّة،

وابن الهيفة بيتحكم على كيفه.

الشاويشة: وأنتِ كمان يا بتُّ يا صباح يا عارجة لك نفس؟ يا بتُّ امشي انجري من هنا.

(إحدى المسجونات تدفع باب الحوش لتدخل. الشاويشة تمنعها.)

المسجونة: عاوزين نشوف الست عليّة، مين هي؟ مين فيهم؟

(الشاويشة تدفعها وتغلق الباب وتدخل إلى العنبر.)

الفصل الثاني

(المسجونات واقفات في الفناء الخارجي. بعضهن يُمسِك قضبان باب الحوش. زينب القتالة بينهم وغيرها أخريات، بينهن أيضًا زوبة وصباح الشحانة وزينب الحرامية وغيرهن.)

زينب القتالة (تقول وسطهن): دي ضفرها يساوي مليون راجل زيّه.

(الشاويشة تدخل إلى العنبر في اضطراب. الجو كلُّه مشحون ومكهرب. الجميع صامتات واجمات. بعضهن خائف، بعضهن غاضب.)

(عليّة تتمشى في العنبر بثقة وإصرارٍ وتحذُّ.)

(عزّة واقفة في غضب. سالمة تبكي. اعتدال تبكي أيضًا. هادية ترفع يديها وتدعو الله.)

هادية: يا رب ارزقه بأتوميل يطسه وهو جاي في السكة.

الشاويشة: سكة إيه؟ إذا كان هو جوه السجن وواقف على البوابة، ربنا حيرزقه بأتوميل فين يا هادية؟ قولي ربنا يرزقه بسكته قلبية يطب يموت وهو واقف على البوابة. قولي يا رب.

هادية (ترفع يديها): يا رب.

(الشاويشة تُخاطب سميرة.)

الشاويشة: ادعي كمان أنتِ يا ست سميرة؛ ربنا يمكن يستجيب لدعوتك أكثر منها.

سميرة: ربنا ياخذُه وياخذ أمثاله.

اعتدال: يا رب ياخذُه يا رب.

رشيدة (تفتح فمها وهي راقدة، بصوتٍ ضعيف): إلهي تأخده.

عزّة (في غضب): هو الراجل ده إيه؟ يعني مافيش غيره؟ مالوش رئيس نبعت له

شكوى أو احتجاج.

هادية: الشكوى لغير الله مذلة.

سائلة: أيوة لازم نبعت شكوى.

مديحة: ونكتب الشكوى بيايه ولا على إيه؟ لا معانا لا ورقة ولا قلم.

اعتدال: أنا معايا ورقة وقلم، زوبة جابتهم لي أمبارح عشان أكتب جواب لأمي.

(تُخرج من عباءتها ورقةً وقلمًا.)

عزة: أيوة، أنا حاكبت الشكوى وكلنا نمضي عليها بأسامينا كلنا.

سميرة: لأ، أنا مش هامضي على أي ورقة ولا أي احتجاج.

عزة: ليه يا سميرة؟

سميرة: أنا لا أشتكي طاغوت لطاغوت.

نفيسة: أيوة، ولا أنا، كلهم طواغيت.

(يُسمع ضجةً كبيرة بالخارج. تظهر الضابطة. المسجونات يُفسحن لها

الطريق.)

الضابطة: كل واحدة تروح عنبرها. الي مش حتروح عنبرها دلوقت حاطها فورًا

في التأديب.

(المسجونات يتفرقن بسرعة. الشاويشة تجري وتفتح الباب للضابطة. تدخل

الضابطة العنبر. يبدو عليها الاضطراب والخوف أيضًا.)

الضابطة: فين نفيسة؟

(نفيسة تنهض بسرعة. تبدو الدهشة والمفاجأة على الجميع.)

الضابطة: تعالي يا نفيسة ضابط المباحث عاوزك بره.

نفيسة (في فرع): يا مصيبيتي! ليه؟ هو أنا عملت إيه؟ لازم حيحطني في التأديب

بدل الست عليّة؛ ما هم كده دايمًا يتشطروا على الصغيرين الي زيّنا.

الضابطة: ماتخافيش يا نفيسة، هيحطك في التأديب ليه؟ أنتِ عملت حاجة.

(عليّة تسير نحو الضابطة.)

الفصل الثاني

عليّة: أنا لا يمكن أوافق إن حدّ غيري يروح التأديب. حُدّيني أنا دلوقت، أنا جاهزة. **الضابطة:** لأ، هو مش عاوزك دلوقت؛ عنده حاجات لسّه بيخَلصّها. متستعجلش يا ستّ عليّة. يعني كان لازم تقلبي السجن بالشكل ده؟ كنا هاديين ومرتاحين قبل ما تيجي لنا، ومش عارفين حاناخد في حكايتك دي كام يوم شُغل إضافي. يعني كنا ناقصين شغل؟

(الضابطة تأخذ نفيسة وتخرج، نفيسة مرتدية النقاب لا يظهر منها شيء، الشاويشة تغلق بعدهما باب الحوش، بعض المسجونات يتجمعن مرة أخرى بعد اختفاء الضابطة.)

هادية (في ألم): أنا خايفة على نفيسة، خايفة يضربوها. **الشاويشة:** حيضربوها ليه؟ هي عملت حاجة؟ **اعتدال (في قلق):** أمّال خدوها ليه يا شاويشة؟ **الشاويشة:** يمكن لها زيارة. **عزّة:** ده احنا مالناش زيارات؛ الزيارات ممنوعة. **الشاويشة:** يمكن لها جواب والأ حاجة مستعجلة. يمكن حدّ عندهم عيّن وحالته متأخرة.

سائلة (تدعو الله): ربنا يساعذك يا نفيسة يا رب. **هادية:** يا رب، يا رب ارحمها، وارحمنا. **هادية (تركع على الأرض وترفع يديها إلى فوق وهي تردّد):** يا رب ارحمنا، يا رب ارحمنا، يا رب ارحمنا.

(ظلام في المسرح كله، لا يظهر على المسرح إلا الصورة العلوية الكبيرة ومن حولها لمبات النور. وجه الرجل داخل الصورة ظاهر وواضح. له عينان غاضبتان، لكن شفّاه تبتسمان ابتساماً عريضة، تهتّزُّ الصورة عدّة اهتزازات في حركات تشنجية غاضبة، كأن الوجه داخل الصورة غاضب. يُسمع صوتٌ خشنٌ أجشٌ يخرج من فم الرجل في الصورة.)

صوتُ خَشِنٍ أَجَشٍ: لن أرحم.

(يُضيء المسرح مرَّةً أُخرى. تظهر هادية في العنبر لا تزال راكعة. تنظر إلى أعلى في غضبٍ وتكلم الصورة في غضب): هو أنا بكلمك يا شيخ؟ أنا بكلم ربنا، هو أنت ربنا؟ هو أنت ربنا؟

(يُظلم المسرح كله مرَّةً أُخرى. لا تزال الصورة فقط هي المضيئة.)

(في الرُّكن البعيد جدًّا من المسرح يظهر ضوء صغير يكشف عن نفيسة وهي واقفة وحدها تنتظر مُرتديَّة النقاب. لا يظهر من وجهها شيء. يبدو عليها الاضطراب والخوف.)

(إلى جوارها مكتب صغير عليه تليفون.)

(ترفع يديها إلى فوق وكأنها تُناجي الله.)

(تهمس لنفسها بشيء. يظهر ضابط المباحث على عينيه نظارة سوداء يقف خلفها. نفيسة لم تره بعد. لا تزال مُستغرقةً في مُناجاة الله.)

ضابط المباحث: يا ترى بتكلمني حدًّا يا نفيسة؟

نفيسة (تستدير بسرعة في اضطراب): أبدًا، بكلم ربنا.

ضابط المباحث: طبعًا، من حقك تقولي لربنا أي حاجة. كل إنسان من حقه إن يقول لربنا اللي هو عاوزه، ومش ضروري أبدًا إن واحد زيي يتدخل بينك وبين ربنا، لكن بسرعة كده قوليلي كنت بتقولي لربنا إيه؟ وشيلي البتاع ده من على وشك؛ خلاص احنا لوحدنا وماحدش شايفك.

(نفيسة تلخع النقاب، تُعطيهِ الورقة التي كانت معها، يقرؤها ضابط المباحث بسرعة ثم يضعها في جيبه.)

ضابط المباحث: النوع ده من الناس بيتعبنى أنا وبيسبب لي مشاكل، وأنا مش ناقص مشاكل. مش عارف أعمل فيها إيه يا نفيسة.

نفيسة: حُطَّها في التأديب فورًا، دي عاملة مشاكل في العنبر كله.
ضابط المباحث: خايف أخطَّها في التأديب يقولولي حطتها ليه. ما عنديش أي أوامر واضحة بخصوص تأديب السياسيين. وجايز إذا ما حطتهاش في التأديب يقولولي ما حطتهاش ليه، مش عارف أعمل إيه. وبينني وبينك خايف أخطَّها في التأديب تحصل حاجة ويفرجوا عنهم، وأروح أنا في شربة ميه. أنا طلبت ينقلوني مباحث الجنايات؛ هناك المسائل واضحة والقانون واضح، وأعرف راسي من رجلي. إنما الشغل مع السياسيين حاجة توجع الدماغ، وجايز أروح في داهية.

نفيسة: ولا داهية ولا حاجة، حُطَّها في التأديب وخلَّص نفسك؛ دي قلبت العنبر كله وممكن تقلب السجن كله كمان، وإنت المسئول، ما حدش مسئول غيرك، أنا شخصياً ماليش دعوة بحاجة.

الضابط: إنتِ محبوسة معاهم ومش دريانة إيه اللي بيحصل برّه. احنا بنمُر بأزمة كبيرة، قصدي هو (يشير إلى أعلى) هو بيمر بأزمة كبيرة؛ عنده شك إن الناس مش معاه، مع إن البيانات كلها اللي عنده إن الناس معاه.

نفيسة: له ناس بيندسُّوا وسط الناس ويبلِّغوه الحقيقة.
الضابط: تبقى مصيبة.

نفيسة: مُصيبة واحدة، الدنيا كلها مصايب، وقبل ما تحصلنا المصايب لازم نحطها في التأديب.

الضابط: إنت رأيك كده؟

نفيسة: أيوة ده رأيي. أنا عايشة معاهم وعرفتُهم واحدة واحدة، هي أخطر واحدة فيهم.

الضابط: فعلاً هي أخطر واحدة فيهم.

نفيسة: أنا خارج العنبر بقّه.

الضابط: خلي بالك. حتقولي أنا كنت عاوزك ليه؟

نفيسة (تضحك): عشان أبويا مات.

الضابط (يضحك): ده أبوكي مات أكثر من عشرين مرة. أنت عندك كام أب؟

(نفيسة ترتدي النقاب وتُخفي رأسها تمامًا.)

نفيسة: كثير، ماتعش، اللي يعدُّ يتعب.

(ظلام كامل على المسرح.)

(يُضيء المسرح مرةً أخرى. يظهر العنبر والحوش. الجميع داخل العنبر كما كانوا. المسجونان مُتجمّعات أمام باب الحوش المغلق. الشاويشة تحاول طردهن. يبتعدن عن الباب. تدخل الشاويشة إلى العنبر. بمجرد أن تدخل الشاويشة إلى العنبر تتجمّع المسجونان مرةً أخرى على الباب داخل العنبر. الجو كلُّه يسودُه الخوف والاضطراب والتوتُّر. الجميع ينتظرن قدوم ضابط المباحث بين لحظةٍ وأخرى لأخذ عليّةٍ إلى التأديب.)

(عليّةٌ تتمشّى في العنبر بخطواتٍ واثقةٍ قويةٍ متحديةٍ. الجميع صامتات واجمات ينظرن إلى عليّةٍ بعيونٍ مختلفةٍ. سالمةٌ تبكي. اعتدالٌ تمسح دموعها. عزةٌ غاضبةٌ. هاديةٌ تدعو الله. نجاةٌ صامتةٌ حزينةٌ. مديحةٌ حزينةٌ. لبيبةٌ تُمسك رأسها بيديها. بسيمةٌ تدخُن. سميرةٌ أعطت وجهها للحائط وراحت تصليّ. رشيدةٌ لا تزال راقدةٌ مُتعبةٌ. نفيسةٌ أيضًا موجودةٌ جالسةٌ في مكانها في يدها مُصكفٌ تقرأ قرآنًا. الشاويشة تروح وتجيء من العنبر إلى الحوش في اضطرابٍ تحاول إبعاد المسجونان عن باب الحوش المغلق أمامهن.)

(لحظة صمت كامل.)

(فجأةً يرنُّ في الجو صوت طلقاتٍ مدفعٍ أو رصاص. تُسمع ضجّةٌ وهرج ومرج.)

صوت امرأةٍ تصرّخ: ضربه.

(ظلام. ينطفئ المسرح كله لحظة. الصورة لا تزال مُضيئةً. فجأةً تنطفئ الأنوار حولها وتختفي الصورة من المسرح. يُضيء المسرح كله مرةً أخرى. تظهر الشاويشة تجري وتفتح باب الحوش وتخرج إلى الفناء تهرول. المسجونان اللائي كنّ واقفاتٍ عند الباب يُهرولن وراءها في اضطرابٍ ودهشةٍ وفزع.)

(المسجونان داخل العنبر يقفن جميعًا ينظرن ناحية الحوش في دهشةٍ وتساؤلٍ وفزع.)

الفصل الثاني

(بعد لحظات تعود الشاويشة وهي تجري وتلهث في اضطراب، تدخل إلى العنبر، الجميع يتجمعون حولها.)

الشاويشة (تلهث): ضربوه وهو جاي في السكة.

الجميع (في نفس واحد): مين ضربه؟

الشاويشة (تلهث): ناس، مانعرفش مين لسة. (تلهث) خلاص يا ستّ عليّة ماحدّش جاي ياخذك التأديب، وكلكم إفراج، إفراج.

(فجأة ترقص اعتدال وهادية وسالمة.)

(رشيدة تنهض من رقدتها وتشاركهن الرقص وهي لا تزال ضعيفة الجسم.)

(بسيمة ترقع على الأرض وهي تقول):

بسيمة: أحمك يا رب، أحمك يا رب.

لبيبة (أيضاً ترقع كأنها تصلي لله): أشكرك يا رب.

(عزّة تعانق عليّة في فرح.)

عزّة: مبروك يا عليّة.

عليّة: مبروك يا عزّة.

(نفيسة تخرج مُسرعةً من العنبر. المسجونات يدخلن إلى العنبر ويشتركن مع الجميع في الرقص والغناء والفرح.)

الجميع (في صوت واحد): إفراج، إفراج.

(ظلامٌ تام. صمتٌ تام.)

(يستمرُّ الظلام والصمت بضعة لحظات.)

(يُضيء المسرح مرةً أخرى. صورةٌ أخرى لرجلٍ آخر مُعلّقة أعلى المسرح، ومن حولها لمبات صغيرة.)

(يظهر العنبر خاليًا من جميع المسجونات إلا عليّة.)

(واقفة وحدها في العنبر. باب العنبر مُغلق.)

(باب الحوش مُغلق. صباح المتسوّلة واقفة وراء الباب مُمسكةً بيديها القضبان تغني.)

صباح المتسوّلة (تغني): آدي الزمن اللي لوع اللي كان على كيفه، وبلبل الصبر في الفنجان وسقاه على كيفه، وآدي بنت الحلال في السجن مرميةً وابن الهيفة بيتحكم على كيفه، الصبر كله حِكَم واللي شبك أهو بان، من برّه مزوّق ومن جوّه مليون دخان، واصبر يا عين ده كل شيء بأوان.

(تظهر الشاويشة فهيمة ومعها المفتاحان الكبيران. تفتح باب الحوش. يُسمع صوت دوران المفتاح في الباب ثلاث مرّات.)

الشاويشة: جيتي تاني يا بت يا صباح، أنت يا بت مش حتموتي بّقه.

صباح المتسوّلة: يخذوها ويجيبوها.

ويجيبوها ويودّوها.

مالهُمش سُغلة غيرها.

الشاويشة: يا بت امشي انجري من هنا أحسن ضابط المباحث جاي دلوقتِ حالاً.

(تفتح الشاويشة باب العنبر وتُطلُّ من الشقِّ الصغير فيه.)

الشاويشة: ضابط المباحث جاي دلوقتِ، خبّوا المنوعات، مش عاوزة مشاكل، عاوزة أربي العيال.

(يظهر ضابط المباحث يرتدي نظارة سوداء. ضابط آخر جديد، لكن حركاته ومشيته تُشبه الضابط السابق.)

(يدخل إلى العنبر ومن خلفه الشاويشة. عليّة واقفة في وسط العنبر شامخةً كما كانت لم تتغيّر.)

الفصل الثاني

ضابط المباحث: مُتأسّف، شوية بيانات بسيطة ناقصة لازم أكملها.

(يُخرج ورقةً وقلماً من جيبه.)

ضابط المباحث: أيوة يا فندم الاسم إيه؟

(عليّة لا ترد، تنظر إليه في غضبٍ وتحذّر.)

الضابط: أيوة، الاسم إيه؟ أنا مُنتظر.

(عليّة لا ترد.)

الضابط: أظن بعد كل ده لازم تقولي بقّه أنتِ ماتعبتيش؟

(عليّة لا ترد.)

الضابط: أنا بسأل أنتِ ماتعبتيش؟

(عليّة لا ترد.)

الضابط: أرجوكي، اتكلّمي، أنا تعب، أنا تعب. (يردّد في إرهاق) أنا تعب، أنتِ

ماتعبتيش؟

إنتِ ماتعبتيش؟

إنتِ إيه؟

إنتِ إيه؟

مصنوعة من إيه؟

من الفولاذ؟

عليّة (تردّد بهدوءٍ شديد): أقوى من الفولاذ.

الضابط (في دهشة): فيه حاجة في الدنيا أقوى من الفولاذ؟

عليّة: أيوة؟

الضابط (في تساؤل): إيه هو؟

الإِنسان

عليّة: الإنسان.

(صوت الكراون.)

(صمت، ظلام.)

(انتهت المسرحية.)

